

Matyu

Jesus Wõ Yen In Ibor *(Luk 3:23-38)*

¹ Jesus Kristus wõ yen, anĩ nẽ ibor gĩ isin, Ì Dawid tubu, Abraham nẽ ibor.

² Isak, ne tama Abraham,
Jakop, ne tama Isak,

Juda, ne tura tar geid, idi temeid Jakop,

³ Feres Sera ado, nedi temeid Juda, nedi sineid
Tamar,

Hesron, ne tama Feres,
Ram, ne tama Hesron,

⁴ Aminadab, ne tama Ram,
Nason, ne tama Aminadab,
Salmon, ne tama Nason,

⁵ Boas, Ì yogon tama Salmon, Boas sina Rahab, Ì
haiden kayau, Israel kayau sã,
Obed, Ì yogon tama Boas, yogon sina Rut, Ì haiden
kayau, Israel kayau sã,

Jesi, ne tama Obed,

⁶ King Dawid, ne tama Jesi.

Solomon, ne tama Dawid, Solomon ne sina Ì,
kulu kusĩ mudur Uria nẽ kayaun,

⁷ Rehoboam, ne tama Solomon,
Abiya, ne tama Rehoboam,

Asa, ne tama Abiya,

⁸ Jehosafat, ne tama Asa,
Jehoram, ne tama Jehosafat,

Usia, ne tama Jehoram,

⁹ Jotam, ne tama Usia,

Ahas, ne tama Jotam,
 Hesekia, ne tama Ahas,
¹⁰ Manase, ne tama Hesekia,
 Amon, ne tama Manase,
 Josia ne tama, Amon,

¹¹ Jekonia in tura tar geid, nedi temeid Josia, sain
 anĩ bun, Babilonem Israel tamo kayau guri
 difeid dirou, Babilon kalabus bun dilen.

¹² Babilon kalabus bun dilen sain anĩ bunem,
 Sieltiel, ne tama Jekonia,
 Serubabel, ne tama Sieltiel,

¹³ Abiud, ne tama Serubabel,
 Eliakim, ne tama Abiud,

Asor, ne tama Eliakim,

¹⁴ Sadok, ne tama Asor,

Akim, ne tama Sadok,

Eliud, ne tama Akim,

¹⁵ Eleasar, ne tama Eliud,

Matan, ne tama Eleasar,

Jakop, ne tama Matan,

¹⁶ Josef ĩ, ne tama Jakop, Josef ĩ Maria aiwa, Maria
 ĩ Jesus gõ fen, Jesus ĩ anĩ Kristus* dedig.

¹⁷ Anĩ nigin, ibor Abraham bun tamal ile Dawid,
 are ibor 14, Dawid bun tamal ile Babilon kalabus
 dilen, are ibor 14, kalabus bun tamal ile Kristus
 wõ yen, are ibor 14.

Jesus Kristus Wõ Yen

(Luk 2:1-7)

¹⁸ Jesus wõ yen anĩ eig fiya: In sina Maria Jose-
 fem yalouf nigin digirkenen, anĩ ere, idi uruwom

* **1:16:** Grik od Kristus, are Hibru od Mesia dedig. Anĩ nẽ gariya
 are, kabĩ ifeněya nigin, Negurem ĩ bouwa bun mouf fi felen.

fau mois diyo ken, Awa Uur Fateul bunem Maria bou adon anī dilen.

¹⁹ Josef, Maria ne aiwa, ī nun karīya tamo, anī ī Maria atun meleid bun yana sane ifenēya itor ken, yaor to wogō yen, ī namen kayau anī itornēf nigin kisi fen.

²⁰ Agef kisif mog, Negur nē engel, imīya bun ī wagen wō ye fen, iron, “Josef, Dawid naal, Maria wale fō bun on kayau ibodōf nigin to kumī wo, ere nigin, Maria namen kare fef are, Awa Uur Fateul bunem.

²¹ Kayau anī kesu monog gō foug, ō yana ū Jesus wouf, ere nigin, yogon tamo kayau mosor bun temeleid kel gei foug.”

²² Negur nē od, profet sigor bun eig ye wogō yen anī kisi falauf nigin, enī ganan wō yen:

²³ “Kayau taulei kesu adouf, kesu monog gō foug, idi yana dū Imanuel douf,”† anī nē gariya, “Negur ī ada ado.”

²⁴ Sain Josef irik yen, Negur nē engel wogō fiyen kilei agef fen, Maria yale fō bun irou ile, in kayau ibodon.

²⁵ Anī ere, ī kayau ado bouweid bagu fiya san, ile kesu monog matu gō fen, anī Josef kesu yana yū Jesus yen.

2

Gaa Iseyan Keleī Tamo Ki Dilen

¹ King Herod nē sain bun, Jesus Betlehem fonō Judia distrik bun wō yen, anī bure fele di, keleī tamo gaa iseyan temeleid Jerusalem disin,

† **1:23:** Asaia 7:14

² Idi to difen, “Kesu momou Juda neid king wõ youf den anĩ, nain wõ yen? Amã in barisa gaa iseyan melem mailen, ã yana malesauf nigin masin.”

³ King Herod od anĩ karĩ yen, ã wau morõ fen, idi Jerusalem dibodon anĩ ganan geid waud morõ fedin.

⁴ Agef fen, tamo kayau neid pris odudug ganan ado, lo ifelnēdiya tamo ganan iweigneĩd, guru dife di, ã to fedin, “Kristus nain bagai wõ youf?”

⁵ Idi aiten dalen, “Oun Betlehem fonõ Judia distrik an, age fouf nigin kulu profet eig ye itoton:

⁶ “ Õ Betlehem, Juda teneub bun,

õ Juda neid uyu irouya atun naal bagai sã,
fau õ bunem tamo yana odug ado wõ youf,

ã anim neu tamo kayau Israel marau ibodõf.’*

⁷ Age de di, Herod gaa iseyan keleĩ tamo im-
inēyan iweigneĩd fen, ere sain bagai barisa anĩ wõ
yen anĩ kelein.

⁸ Ì idi Betlehem sur feid fen, iron, “Ulagauf,
kesu anĩ foinenem ed ge umirēgouf. Kesu anĩ fata
gouf, kaisã bagai aya urokanag, ago ge di, ayag ele
fen, yana alesauf.”

⁹ King nē od karĩ del fen, idi naab dale dilen,
age de mog, barisa oun gaa iseyan idi dilen anĩ, ã
ket uyu ile, kesu yenen nē modoũ an bagai dē yel
ifaren.

¹⁰ Barisa anĩ dē yele di, dile fen, idi waud kulīya
odug bagai adon.

¹¹ Fõ namen disorũ dilen, kesu sina Maria ado
diledin, idi bobou dife fen, in yana dalesen, age de

* **2:6:** Maika 5:2

fen, nedi faa diwareïd fen, safina ege luwa eneidi difenen, are gol, aa gaula sumeĩ nigin tō fiyadig, moul aa bun tamal sumeĩ biya biya ado anĩ.

¹² Herod wagenem to ke de dilauf nigin, imĩya bunem wedereid iroun, anĩ nigin, idi neid teneub bun ke douf nigin naab taka dalen.

Isip Diya Dilen

¹³ Idi dilel mog, Odug nē engel, imĩya bun Josef wagen wō yen, ĩ iron, “Fā wo, kesu sina ado gei wo, uyag Isip uleg, an ubodōg uleg mog, aya fau arokonōf, gama bagai Herod kesu imirek yukesiyouf nigin age fef.”

¹⁴ Anĩ nigin, Josef fā yen, kesu sina ado gei feid, bō turan Isip diya dilen.

¹⁵ Josef fau an ibod mog, Herod laa fen. Anĩ bun, Odug nē od, profet sigor bun eig ye wogō yen anĩ, wō ye kisi felen, “Isip bun tamal aya neu kesu aweignen.”†

¹⁶ Herod mogo kisi yalen, “Gaa iseyan keleĩ tamo aya didegnan,” ye fen, ĩ mogo fatuk bagai seye yen, keleĩ tamo naa nigin solo de dirokenen anĩ bun kisi es fe fen, Betlehem fonō kalilĩ fiya anĩ kesu monog yar uru, yar tekelei anĩ ganan didenkesiyouf nigin bagai ari fedid, didenkesin.

¹⁷ Anĩ bun, Negur, profet Jeremaia bunem eig ye wogō yen anĩ, agef kisi felen:

¹⁸ “Rama fonō ait taka,
inā wau gudū fiya odug karĩ den,
Rahel inā odug gere tar nigin yalen,
ĩ taka nem bobo fiyēf anĩ itoron,
ere nigin, yogon kesu taka to mata ibodon.”‡

† **2:15:** Hosia 11:1 ‡ **2:18:** Jeremaia 31:15

Nasaret Ke Den

¹⁹ Herod laa fe di, Odug nē engel, Josef Isip ibod mog, imīya bun ï wagen wō ye fen,

²⁰ iron, “Fã wo, kesu sina ado gei wo, Israel teneub bun ule, ere nigin, idi kesu yukesiya nigin age difen are mogo gare den.”

²¹ Age fe di, Josef fã yen, kesu sina ado gei feid, Israel teneub bun diyok dilen.

²² Anĩ ere, ï, Akelaus ï mogo tama Herod fotokar Judia teneub lo fef ya anĩ karĩ ye fen, ï an iley a nigin kumĩ yen. Imīya bun weder iroun nigin, ï tokō fel, Galili distrik ilen.

²³ Josef ilen, taun taka Nasaret dedig an ibodon. Anĩ bun, profet od eig de wogō den anĩ kisi felen, “Ï Nasaret tamo douf.”

3*Jon Naan Igunēdiya Tamo Naab Dodok Fenen
(Mak 1:1-8; Luk 3:1-18; Jon 1:19-28)*

¹ Sain anĩ bun, Jon naan igunēdiya tamo isin, gerere tuan Judia teneub bun biya od wogō ye fen,

² iweig iron, “Wauĩ falei gei, ere nigin, saa tano mogo melsak.”

³ Tamo enĩ nigin profet Asaia eig ye wogō yen, “Ait taka gerere tuan iweig iron, ‘Odug nē naab dodok gei, in naab madur gei.’ ”*

⁴ Jon ne gabar are kamel siwi, ï gaar gabar nem lū diwan anim luwa gu fedig. Yogon saaf totobi nin te ado.

* **3:3:** Asaia 40:3

⁵ Tamo kayau Jon wagen guru difen, idi Jerusalem, Judia teneub ganan, Jordan naan kalilī fiya anī adok bun temeleid.

⁶ Idi neid mosor yaor difele di, Jon Jordan naan igunēdin.

⁷ Anī ere, ī naan iguneīd mog, Farisia tamo, Sadusia tamo geid musei disi di, ileid fen, ī idi irokenēdin, “Ā, gogour sane gere tar! Didi isiyouf anī wal ge fen, uyagauf nigin aim irokenein?”

⁸ Wauī falei gef are, age fiya gen faat biya ū gouf.

⁹ Ā aug nigin kisi to eig ye irōf, ‘Abraham nemā tamamā.’ Aya arokeneik, meein eneidi bun Negur sã irō di, Abraham gere tar wowã douf.

¹⁰ Safor aayũ gariyan mogo ibodok, aayũ ganan faat biya to yuk, are itu ira ken, yã malan irãf.

¹¹ “Wauī falei gef nigin, aya naan nem naan aguneik, anī ere, taka ī aya dumeun isiyouf, ī megeir barikã aya wal fiya, ayam yogon ye su inukeis kenēya kisi feleya sã.† Ī Awa Uur Fateul yã ado nem naan iguneīf.

¹² Ī susu fiya nē fok iman ado, ī yogon susu fiya nē mayã waī fouf, yogon wit biya are wit fō bun kuruf fen, wit ido yã mala faimud bun an irãf.”

Jon Jesus Naan Igunen
(Mak 1:9-11; Luk 3:21, 22)

¹³ Anī bure fele di, Jesus Jonem naan igunēf nigin Galili tamal Jordan naanũ isin.

† **3:11:** Juda neid tobonnã anī, sain tamo yana ado isi di, idi neid kabī tamo in ye su nē malū biru difedig.

¹⁴ Anĩ ere, Jon Jesus gudũ fiye ken, iron, “Onom aya naan igunaya, ere nigin aya garan usif?”

¹⁵ Jesus aiten yalen, “Arokonok nem ago. Negur nē madur bagai anĩ ganan kisi falauf nigin ada age tafouf, are biya.” Age ye di, Jon dōf age fen.

¹⁶ Jesus naan yale bure fel fen, kaisā bagai ĩ naanũ tamal fā yen. Agef mog bagai, saa ilun bobog kā fele di, ĩ lof mog, Negur nē Awa Uur, ninā kuburir gen Jesus muduren isi, lalan ifenen.

¹⁷ Ait taka saa ilun iweig iron, “Eĩ neu Kesu, ĩ nigin aya wau laa fedig, ĩ nigin aya wau kulĩ yedig.”

4

Satan Jesus Kisi Fiyen

(Mak 1:12, 13; Luk 4:1-13)

¹ Anĩ bure fele di, Awa Uur Jesus itonē di, gerere tuan ile, Satanem kisi fiyen.

² ĩ kuri ibodon, naa foti bō foti bure fele di, ĩ naũ fen.

³ Kisi fiyēya tamo Satan, ĩ bun wō ye fen, irokenen, “Ō Negur Naal ouf are, meein enidi urō di, bret falei fediyouf.”

⁴ Jesus Satan aiten yalen, “Negur nē Itotoya bun eig ye irok, “Tamo bretem dogol to mata ifenēf, sã, od ganan Negur sigor bun isif anim mata ifenēf.”*

⁵ Age fe di, Satan Jesus yale irou, fateul taun Jerusalem irou iselen, an tempel fō soko ilun bagai inenē ifaren.

* **4:4:** Diuteronomi 8:3

⁶ Satan iron, “Ō Negur Naal ouf are, ogo ufũ urã. Ere nigin, Negur nẽ Itotoya bun eig ye irok, “Negur õ nigin yogon engel ari fedì di, idi õ imedim ololon daleyõf, age dife di, õ yẽ meein takam to itutu ouf.’† ”

⁷ Jesus Satan aiten yale iron, “Negur nẽ Itotoya taka buneg eig ye irok, ‘Odug ogon Negur kisi fiya bun to unenẽf.’‡ ”

⁸ Baban, Satan Jesus yale irou, arei odug ilun biya isel fen, teneub enei nẽ tano ganan, nedi biya fiya adok ifelnen.

⁹ Satan iron, “Enidi ganan aya afonõf, õ wageun bobou wo, selu wabiyouf are.”

¹⁰ Jesus Satan irokenen, “Satan, utorna ule! Ere nigin, Negur nẽ Itotoya bun eig ye irok, ‘Odug ogon Negur seli wabi fen, ï dogol aruna walouf.’§ ”

¹¹ Age ye di, Satan Jesus itornẽ ile di, engel disi Jesus aruna dalen.

Jesus Biya Od Wogõya Gariya Inon
(Mak 1:14, 15; Luk 4:14, 15)

¹² Jesus mogo, Jon kalabus ibodon anĩ karĩ ye fen, kel Galili distrik ilen.

¹³ Jesus Nasaret taun itor ile, Kapenaum taun ibodon, Kapenaum are Galili daliyou sirin, Sebulun Naptali ado idi neid teneub akor bun ibodon.

¹⁴ Od profet Asaia eig ye wogõ yen anĩ kisi falauf nigin, agef wõ yen,

¹⁵ “Sebulun nẽ teneub, Naptali nẽ teneub, are naab maaĩwõ ileyan, Jordan naan sitakã,

† 4:6: Sam 91:11, 12 ‡ 4:7: Diuteronomi 6:16 § 4:10: Diuteronomi 6:13

Galili distrik haiden Israel sã anidi dibodok
 nẽ,
 16 tamo kayau gugum bun difaren,
 idi lalan odug dilen,
 tamo kayau laa teneub ado laa nẽ buri bun
 dibodon
 idi bun lalan iran.”*
 17 Sain anĩ bunem ilen anĩ, Jesus biya od
 wogõya gariya inon, “Wauĩ falei gei, ere nigin, saa
 tano mogo melsak.”

Jesus In Dõ Fiya Tar Uyulil Iweignẽdin
 (Mak 1:16-20; Luk 5:1-11)

18 Jesus Galili daliyou yeri iyok isil fen, mala
 iran uru tura ado iledin, Simon yana taka Pita,
 yogon tura Endru ado. Idi maaĩ daliyoun kakãg
 diran, ere nigin, idi gau yaleya tamo.

19 Jesus iron, “Usig, aya dõ wiyag len, aya ã
 tamo gei fiya tamo aneneĩf.”

20 Kaisã bagai, idi neid kakãg folõ difel fen,
 Jesus dõ difen.

21 Anenem iyok ile fen, Jesus baban mala iran
 uru tura ado iledin, Jems Sebedi ne naal, yogon
 tura Jon ado. Idi waag bun nedi temeid Sebedi
 geid kakãg madur difedif dibodon. Jesus disiyouf
 nigin iweignẽdin.

22 Kaisã bagai, temeid waag ado ditor ken, Jesus
 dõ difen.

Jesus Dagi Adodo El Fedin
 (Luk 6:17-19)

23 Jesus Galili distrik akor anĩ adok iyo ken, Juda
 neid uub fõ bun od ifelneĩd, saa tano ne biya od

* 4:16: Asaia 9:1, 2

anĩ wogõ fedin, agef fen, tamo kayau atun dagi fire fire ado ilõyabidiya adok el fedin.

²⁴ Ì nigin od anĩ, Siria teneub ganan bun iyoken, age fe di, tamo kayau idi, dagi taka taka adodo anidi ganan Jesus wagen guri difeid, disin, idi darau odug biya adodo, idi kaa sesen adodo, idi mir adodo, idi bouweid ilolaisidiya anĩ, Jesus el fedin.

²⁵ Guru fiya odug, Galili temeleid, Dekapolis† temeleid, Jerusalem temeleid, Judia teneub ado Jordan naan sitakã teneub akor anĩ ganan tamo kayau Jesus dõ difen.

5

Jesus Arein Biya Od Wogõ Yen (Luk 6:20-23)

¹ Gama tamo kayau musei guru dife di, Jesus ileid fen, arei wala bun isel ibodon. Yogon dõ fiya tar Jesus wagen disin. ² Jesus gariya ino ifelneĩd fen, iron,

³ “Aib idi uur nigin maleg dibodok, gama idi el fedif,

ere nigin, saa tano are idi neid.

⁴ Aib idi waud gudũ fedif, gama idi el fedif, ere nigin, idi waud yo fediyouf.

⁵ Aib idi molol dibodok, gama idi el fedif, ere nigin, idi teneub akor adouf.

⁶ Aib idi Negur nẽ madur bagai nigin naũ fedif, naan ail fedif, gama idi el fedif, ere nigin, idi weit fediyouf.

⁷ Aib idi waud ifenẽdif, gama idi el fedif,

† 4:25: Anĩ nẽ gariya, Ten Taun.

ere nigin, idi wau ifenēya dalouf.

⁸ Aib idi waud bun karētut, gama idi el fedif, ere nigin, idi Negur dilouf.

⁹ Aib idi maur gudū difedig, gama idi el fedif, ere nigin, idi Negur gere tar difediyouf.

¹⁰ Aib idi Negur nē madur bagai nigin darau dalef, gama idi el fedif, ere nigin, saa tano are idi neid.

¹¹ “Aib ā aya nigin tamo kayau idi kono diyeik, darau difeneik, idegēya bun od sane ganān ā bun dirarak, gama ā nigin el yeik.

¹² Wauī kulīg fen, sereg, ere nigin, āgenei mala solo saa tano bun odug, profet idi ket dibodoneg kulu darau age fiya bagai dalen.

Sol Lalan Ado
(Mak 9:50; Luk 14:34, 35)

¹³ “Ā teneub enī nē sol, anī ere, sol in kai sa kalauf are, ere naig fe di, baban kai adouf? Ī baban ereb kabī taka ifenēya kisi feleya sā, diraile di, tamo anī teten dilef, disi difouf dogol.

¹⁴ “Ā teneub enī nē lalan. Taun taka uya bun ibodok anī inokeleya kisi feleya sā.

¹⁵ Age fiya gen, tamo kayau lam tō de fen, beī kur to dinouf. Age fiya ban, idi yoki bun diseginnē di, anī lalan tamo ganān fō anī bun ifenēdif.

¹⁶ Age fiya bagai, āgenei fula fiya tamo kayau lalan ifenēdiyof, ago ge di, tamo kayau idi āgenei tobonuneī biya anī dile fen, āgenei Temeī saa ilun ibodok anī seli dabiyouf.

Lo Od Kisi Fel Age Fen

17 “Aya asin anĩ, Moses nẽ Lo, profet neid od ado alelauf nigin asin to gouf, aya anĩ yaleleya nigin to asin, anĩ kisi afalauf nigin asin.

18 Aya momoi bagai arokeneik, sain saa teneub ado iminkeleya sã mog, sifa naal bagai, pen togo fiya anĩ Lo bun taka to fitol yale iminkalauf, idi anĩ ganan dibod mog, ereb ereb ganan kisi falauf.

19 Aibem taka, ãtãfiya enĩ nẽ tekelei naal bagai anĩ to dõf fen, tamo tunĩ ã dõ difiyẽ age difouf nigin ifelnẽdiyof are, ã saa tanon yana naal bagai youf, anĩ ere, aib taka ãtãfiya eneidi dõf agef kisi fel ifelnẽdiyof, saa tanon yana odug yalouf.

20 Anĩ aya arokeneik, ãgenei madur bagai anim, Farisia tamo ado lo ifelnẽdiya tamo neid madur bagai to wal gouf are, ã saa tanon ileyã nigin kisi feleyã sã bagai.

Seyeya Nigin Ifelnẽya
(Luk 12:58, 59)

21 “Tamo ãtãfiya kulu eig den anĩ karĩ gen, ‘Õ tamo to ukeis, taka ne tã yukesif are, es fiya bun ifarauf.’*

22 Anĩ ere, aya ã arokeneik, aibem taka tura seye ifenek are, ã es fiya bun ifarauf. Baban, aib taka tura irokenek, ‘Daku,’ ã kot bun ifarauf. Takag, aibem irok, ‘Õ neneya!’ age youf, hel nẽ yã uruwa dõya kelẽ fiyek.

23 “Anĩ nigin, õ Negur bun sesewi wou fenẽ kisi wale, alta garan safina urou ule fen, õ turã õ bun nauseir ado anĩ õ weder fokõ fouf are,

* 5:21: Eksodas 20:13

²⁴ safina an alta garan utor yen, kel ule turã ado komo weleg fen, gama usi, Negur safina wenẽ, sesewi wouf.

²⁵ “Aib õ kot bun irouleyõya nigin, ã uruwom naab luwe uleg fen, on kiwai tamo ado kaisã komo gouf. Sãf, ï õ es fiya tamo bun inenõf. Age fe di, es fiya tamo õ irouyõ polis imeid bun ino di, idim õ kalabus bun dirãyõf.

²⁶ Aya momoi arokonok, õ kalabus bun kutũ yesiya sã mog, wareg ganan unolauf.

Seseirã To Inoyauf Nigin Ifelnẽya

²⁷ “Tamo ïtãfiya eig den anĩ karĩ gen, ‘Õ seseirã to uno.’†

²⁸ Anĩ ere, aya ã arokeneik, taka ï malam kayau lof fen, mala yũ yalef, ï mogo wau bun kayau anĩ bun seseirã inol.

²⁹ Õ malã biyalem mosor bun inenõf are, ubodol uraile. Õ boũ adok hel bun irãya anĩ fotokar, õ boũ tunĩ taka iminkalauf, are deuf.

³⁰ Õ imã biyalem mosor bun inenõf are, gudũ uraile. Õ boũ adok hel bun irãya anĩ fotokar, õ boũ tunĩ taka iminkalauf, are deuf.

Tamo Kayau Ado Bagu Fiya To Fara Fiyauf Nigin Ifelnẽya

(Matyu 19:9; Mak 10:11, 12; Luk 16:18)

³¹ “Ïtãfiya eig fe yenen, ‘Aibem taka yogon aiwa iruwau fenẽ, kayau ado bagu fiya anĩ fara fiya nẽ pepa ifen ken, bagu fiya fara fouf.’‡

³² Anĩ ere, aya ã arokeneik, aibem taka, yogon kayau ï tamo taka ado to seseirã dino mog, iruf

† 5:27: Eksodas 20:14 ‡ 5:31: Diuteronomi 24:1

are, ï kayau anĩ seseirã naab bun inenek. Anĩ aibem taka kayau anĩ yalef, tamo anĩ mogo se-seirã inof.

Wau Kuturoleya Od Nigin Ifelněya

³³ “Takag, tamo ïtãfiya kulu eig den anĩ karĩ gen, ‘Ă wau kuturoleya od anĩ to waleleg. Ă wau kuturoleya od, Odug mala bun unogen anĩ kulatun gouf.’

³⁴ Anĩ ere, aya arokeneik, od megeir ifeněya bun, saa mala bun to bagai wouf, ere nigin, saa are Negur ně iboděya modoũ.

³⁵ Oo teneub mala buneg to wouf, ere nigin, teneub are Negur ye inoya ně sawa. Oo Jerusale-meg mala bun to wouf, ere nigin, are King Odug in taun yana.

³⁶ Ő muduremeg anĩ nigin megeir to unouf, ere nigin, õ ogon fatiya age fe di, lalau be karos be taka wōya kisi feleya sã.

³⁷ Ă nigin yo yeya are yo gouf, sã de sã gouf dogol, od enĩ wal fe fen, tobol fiya are Satan bunem isif.

Sane Solo Fiya Nigin Ifelněya

(Luk 6:29, 30)

³⁸ “Tamo ïtãfiya eig den anĩ karĩ gen, ‘Mala fagã difouf, mala solo abag mala fagã wo. Willa are willa tura.’Š

³⁹ Anĩ ere, aya arokeneik, tamo sane mala solo to weně. Tamo taka ogon walã biyalě fakã fouf are, falei wel len, walã sitakãg fakã fouf.

Š 5:38: Eksodas 21:24; Levitikas 24:20; Diuteronomi 19:21

⁴⁰ Tamo taka ogon kolos yalouf nigin kot yō fenē, malakaĩ ogon saket anīg utorken.

⁴¹ Tamo taka mail tekelei ileyā nigin nugo yōf, malakaĩ uruwom mail uru ulagauf.

⁴² Aibem erēb taka nigin to yok, are wenēf. Aibem erēb taka wareg ō bun yalou fenēf, ō to dudum wiyē.

Kiwai Nigin Wau Laa Fiya

(Luk 6:27, 28, 32-36)

⁴³ “Tamo itāfiya eig den anī karī gen, ‘Ō nē tā nigin wau laaf fen, on kiwai anī kiwai wenē.’* ”

⁴⁴ Anī ere, aya arokeneik, āgenei kiwai nigin wau laaf fen, tunī darau difeneik idi niginēg kosē gouf.

⁴⁵ Ago gouf are, ā Temeĩ saa ilun ibodok gere tar wowā gouf. Ī yogon gaa sur fef, tamo sane, tamo biya adok daledig, taka uyēg sur fef, tamo madur, tamo madur sā adok ifenēdidig.

⁴⁶ Idi ā nigin orodidig anidi nigin dogol wau laa fouf are, ere mala solo anī ā walogouf? Are takis yaleya tamog to age difedig de?

⁴⁷ Ā tureĩ tar dogol aan wiyēdigouf are, ere anī tunī wal fediya ago gef? Haiden are idig, anī to age difedig de?

⁴⁸ Anī nigin, Temeĩ saa ilun ibodok ĩ madur bagai gen, āg de madur bagai agog.

6

Maleg Isennēya

* **5:43:** Levitikas 19:18

¹ “Ã lo welegei, ãgenei tobonuneĩ madur anĩ seluma kulõ difouf ge mã, anĩ tamo kayau meleid bun yaau to du wog. Ã ago gouf, Temeĩ saa ilun ibodok mala solo to ifeneif.

² “Sain õ maleg tamo usennēdiyou fenē, õ anĩ taur to fũ fen, ait bagauf, mala yaleya tamo Juda neid uub fõ bun ado naabur, tamo idi seluma kulõ difouf de fen, age difedig gen. Aya momoi arokeneik, idi anĩ nē mala solo adok mogo dalen.

³ Anĩ õ maleg tamo usennēdif, on imã kilē to keleĩ mog, imã biya melē age fouf,

⁴ anĩ õ iminēyan dor walef. Ago di, on Tamã, õ iminēyan agol, ile fen, mala solo ifonõf.

Kosēya

(Luk 11:2-4)

⁵ “Sain ã kosē gouf bun, ã mala yaleya tamo age difedig gen to agog. Idi tamo dilemãf de fen, Juda neid uub fõ namen ado naab kaleyan difar fen, kosēya orodidig. Aya momoi arokeneik, idi anĩ nē mala solo adok mogo dalen.

⁶ Sain õ kosē wou fenē, õ ogon aabē ule, sukar unol fen, Tamã Negur, ã iminēyan ibodok, kosē wiyē. Anĩ on Tamã õ iminēyan agol, ile fen, mala solo ifonõf.

⁷ Sain ã kosē gouf, haiden age difedig gen, od musei to dīg, ere nigin, idi neid kisi, nemã od musei nigin karĩ famãf de fen, idi od musei biya wogõ dedig.

⁸ Ã, idi age difedig gen, to agog, Negur ãgenei Temeĩ ã ereb ã lau gef anĩ mogo keleĩ mog, dum ã to wiyēgedig.

⁹ “Kosē gou fenē, ã eig wog urõgouf:

“ Õ nemã Dei õ saa ilun ubodok,
õ yanã fateul ibodõf,

¹⁰ ogon tano isiyouf,
ogon oroyok saa ilun age fef gen,
tenebur eineg age fouf.

¹¹ Saaf naa enĩ nẽ wanamãf.

¹² Õ amã nemã mosor nigin wederẽ tu kalauf,
are idi amã bun mosor dinof, amãg idi neid
mosor nigin wederamã tu kelef gen.

¹³ Kisi famãya bun to uroulemãf,

sesen anĩ bun tamal amã walelnamãf.*

¹⁴ Tamo idi ã bun mosor dinoyeif, ã idi neid mosor
nigin wedereĩ tu kalauf are, ãgenei Temeĩ saa ilun
ibodok, ãg ãgenei mosor nigin weder tu kalauf.

¹⁵ Anĩ ere, ã tamo idi neid mosor nigin wedereĩ to
tu kalauf are, ãgenei Temeĩ, ãg ãgenei mosor nigin
weder to tu kalauf.

Kuriya Nigin Ifelnẽya

¹⁶ “Sain ã kuri gouf, mala yaleya tamo sãya nẽ
neweid age difedig gen to ago gei, ago gouf, tamo
anĩ dile fen kuri def douf. Aya momoi arokeneik,
anĩ nẽ mala solo adok mogo dalen.

¹⁷ Anĩ ere, sain õ kuri wouf, fatiyã moul u ken,
nawã usurũf.

¹⁸ Anĩ bunem, õ kuri bek oo sã be, tamo idi õ
nigin to keleĩ youf. Ogon Tamã, Negur iminẽyan
ibodok, ã yogo dogol keleĩ youf, anĩ ogon Tamã õ
iminẽyan ereb ago wouf ile fen, mala solo ifonõf.

Safina Biya Bagai Saa Ilun

(Luk 11:34-36; 12:33, 34; 16:13)

* **6:13:** Itotoya tunĩ agef yenek: *walelnamãf*. Anĩ tano, megeir
ado, fula fya medeĩa faimud ogon ibodõf. Momoi.

19 “Aug nigin safina biya biya tenebur ein to kuru wog. An dedek yāf, maat te yūf, bē tamog narī de, bē dalouf.

20 Ā aug nigin safina biya biya saa ilun kuru wog. An dedek to yāf, maat te to yūf, bē tamog to narī de, bē dalouf.

21 Ogon safina biya biya ibodok nē an, ogon waūg an yenēf.

22 “Mala are bouwa nē yal. Ō malā biyauf are, ogon bouwā ganān lalan lauf.

23 Anī ere, ō malā sane lauf are, ogon bouwā ganān gugum kalauf. Lalan ō ado anī gugum kalauf, gugum are odug bagai!

24 “Aib taka ī yogon marau uru bun kabī to yalouf. Anī taka kiwai ifen ken, taka anī nigin wau laa fouf. Ī taka anī dōf fen, taka anī mala irim fouf. Anī nigin, ā uru to aruneid walogouf, Negur ado moni.

To Osig

(Luk 12:22-31)

25 “Age fiya nigin, aya ā arokeneik, ā āgenei bouweī mata ibodōf nigin to osig fen, ere saaf tāf, ere naan tāf gouf. Ā āgenei bouweī nigin to osig fen, ere gabar tafilaīf gouf. Mata anī saaf wal fiya, bouwa anī gabar wal fiya sā de?

26 Saa ilun ā ninā uledigouf, idi saaf to ditenēdig, idi saaf u de fen, kin to dinodig, anī ere, āgenei Temeī saa ilun yogo ifoutnēdidig. Ā idi anī wal fediya sā de?

27 Ā takam yogon mata nigin osi ye fen, aua tekelei tobol fiya kisi feleya de?

²⁸ “Ere nigin ã gabar nigin osi gef? Dubur aa munĩ, naig fe odugedig anĩ ulogouf. Idi kabĩ to daledig, to diwadig.

²⁹ Anĩ ere, aya ã arokeneik, kulu King Solomoneg, yogon saki gegẽ biya biya ifonun anim, aa munĩ eig fediya taka to wal fen.

³⁰ Anĩ ere, Negur, dubur aa munĩ gama dogol ifarauf, nile di, yã irãf anĩ, agef naki fediyouf are, ã bun idi wal fediya bagai Negur ifounneĩf, age fiya sã de, ã momoiya naal bagai ado?

³¹ Anĩ nigin, to osi wog urõgouf, ‘Ere saaf ada tãf?’ oo ‘Ere naan ada tãf?’ oo ‘Ere gabar ada tafilaĩf?’

³² Haiden idi enĩ ganan nigin meleid dimirẽdig. ãgenei Temeĩ saa ilun lau gef anĩ ganan keleĩ.

³³ Anĩ ere, Negur nẽ tano ado yogon madur bagai ketem umirẽg, ago ge di, safina eneidig ganan ifeneĩf.

³⁴ Age fiya nigin, naa nil nẽ anĩ nigin to osi wog, nil nẽ are yogo nigin osi youf. Naa mugu mugu nẽ morõ are idi dogo dalouf.

7

Tunĩ Es Fediya

(Luk 6:37, 38, 41, 42)

¹ “Taka to es wiyẽg, ago gouf, ãg es yeĩf.

² Anĩ nigin, tunĩ es wedigef gen, ãg agef es yeĩf. ãgenei es fiya nẽ naab de tekelei bun ãg agef es yeĩf.

³ “Õ ere nigin turã mala teteur lo fen, õ ogon aa masak malã bun ibodok anĩ to ulef?

⁴ Aa masak ogon malã bun ibod mog, naig fe di, turã nigin dogol urokenek, ‘Utor len, aya ogon malã teteur alelkonõf’?

⁵ Õ mala yaleya tamo, õ ogon malã bun ketem aa masak walel kelê wol fen, dum turã bun mala teteur walelauf.

⁶ “Ereb fateul anĩ gaũ to urakenëdig. ãgenei maaĩ tuwa meli bagai pel anĩ bor to urakenëdig. ã ago gouf, yedim lalai difouf. Age de fen, falei del, ã serek de fisik diyeĩf.

To Wouf, Umirëf, Godu Wouf
(Luk 11:9-13)

⁷ “To gouf, agef ã ifeneĩf; umirëgouf, ã gurug gouf; godugodu gouf, ã sukar kã feneĩf.

⁸ Aibem taka to fef, yalouf; aibem taka imirek, gurug fouf; aibem taka godugodu fef, sukar kã fel kenëf.

⁹ “ã anĩ takam, ã naal bret nigin to fef, ã meein ifenëf de?

¹⁰ Takag, ã gau nigin to fef, ã gogour ifenëf de?

¹¹ Seseneĩ bagai ã, ãgenei kesu safina biya biya anĩ ifenëdiya ã keleĩ bagai, age fiyauf are, Temeĩ saa ilun ibodok, safina biya biya aib idi to difiyek, ãgenei wenëdigedig anĩ wal fiya, idi ifenëdiyof!

¹² Anĩ nigin, erab erab ganam bun, erab taka idim age diyeĩf anĩ oroyeik anĩ, ãg idi nigin ago gouf. Od enĩ Lo od ado Profet od neid kaũ.

Bobog Kidõ Bobog Bilalã Fiya Ado
(Luk 13:24)

¹³ “Bobog kidõ bun usorug ulagauf. Ere nigin, daũ fiya bun ileya nigin bobog bilalã fiya, naab odug. Tamo kayau musei naab odug anĩ diledig.

14 Anĩ ere, mata tano bun ileya nigin bobog kidõ, naab naal. Anĩ nigin, tamo kayau teke tekeleim dogol, anĩ fata difedig.

Aayũ Yogon Faat Ado
(Luk 6:43, 44; 13:25-27)

15 “Idegẽya profet anidi lo weledigei. Idi ege sipsip siwi difoun ken, ã garan disif, anĩ ere, idi namedin gaũ kuĩ sane ado.

16 Idi neid faat yũf bun, ã idi dogo anibo be biya be ulogouf. Tamo kayau idi wei biya barik bun, gira udum bun daledig de?

17 Age fiya gen, aayũ biya are faat biya yũdig, aayũ anibo are faat anibo yũdig.

18 Aayũ biya ã, faat sane yũya kisi feleya sã, aayũ anibo are faat biya imaya kisi feleya sã.

19 Aayũ ganan faat biya to imaf are, ditu dale yã malan dirãf.

20 Age fiya nigin, idi neid faat yũdig bunem, ã idi nigin yaor keleĩ youf.

21 “Idi aya ‘Odug, Odug’ de fen dirokanadig, idi ganan saa tanon to dilauf. Aibem ã, neu Dei saa ilun ibodok in oroya dõf age fef anim dogol ilauf.

22 Naa anĩ bun, musei aya dirokanauf, ‘Odug, Odug, amã õ yanã nem profet od wogõ maun, amã õ yanã nem kaa sesen maruid fen, õ yanã nem memelik musei manodin!’

23 Age de di, aya yaor arokenẽdiyof, ‘Aya ã keleĩ sã. ã sane gide gedig, uyaleleg!’

Fõ Inoya Nẽ Keleĩ Tamo Neneya Tamo Ado
(Luk 6:47-49)

24 “Age fiya nigin, taka ã neu od eneidi karĩ ye fen, dõf age fef, ã kelei tamo yogon fõ meein teten inon gen.

25 Sain uyẽ burabura isin, kuwei odug ile, solalã fel fen, yau odug fã ye fen, fõ yoũ fe di, to kubũ yen, ere nigin, tor gariya meein teten inon.

26 Anĩ ere, aib taka ã neu od eneidi karĩ ye fen, to dõf age fef, ã neneya tamo yogon fõ subusir teten inon gen.

27 Sain uyẽ burabura isin, kuwei odug ile, solalã fel fen, yau odug fã ye fen, fõ yoũ fe di, kubũ ye narĩf irailen.”

28 Od ganan Jesus wogõ ye idikele di, tamo kayau in od ifelnẽdin anĩ nigin terẽ den,

29 ere nigin, Jesus ifelnẽdin are, taka ã yana adom gen age fiya od wogõ fedin, idi neid lo ifelnẽdiya tamo age difedig gen sã.

8

Tamo Lepra Dagi Ado

(Mak 1:40-45; Luk 5:12-16)

1 Jesus arein tamal kutũ yesi di, tamo kayau musei dõ difiyen.

2 Tamo lepra dagi ado isi, Jesus wagen ibor bobou fe fen, irokenen, “Odug, õ waũ irom are, aya el fiyaya nigin kisi feleyam.”

3 Jesus ima iran, tamo anĩ kobũf fen, iron, “Aya wau irok, bouwã biyaf.” Age ye di, kaisã bagai yogon lepra dagi sa kelen.

4 Jesus irokenen, “Õ aib taka to urokenẽf. Õ ogo pris wagen ule, bouwã ufelne ken, Moses nẽ od dõ

fen, safina sesewi wo, anī bunem ò biya lel anī, tamo kayau dilouf.”

*Kusī Tamo Neid Orowa Nē Momoiya
(Luk 7:1-10)*

⁵ Jesus Kapenaum taun wō ye di, Rom kusī tamo neid orowa Jesus wagen isi fen, isennēf nigin to fiyen.

⁶ Ī iron, “Oduḡ, neu kabī tamo fō bun darau odug ado ilolaisin yenek.”

⁷ Jesus irokenen, “Aya ele, el afiyēf.”

⁸ Age ye di, kusī orowa aiten yale iron, “Oduḡ, aya to biya nigin aya kisi afef, ò neu fō bun to usiyouf. Malakaī, ò od dogol urō di, anī neu kabī tamo dagi sa kalauf.

⁹ Aya yug nigin age fiya, ayag neu odug anī farumen abodok, kusī tamo idig aya farumeun dibodok. Aya taka enī arokenek, ‘Ule’ afiyek, ĩ ilauf. Aya taka arokenek, ‘Ō usi’ au di, ĩ isidig. Neu kabī tamo enī ago afiyek, ĩ agef age fedig.”

¹⁰ Od anī kusī orowa age irō di, Jesus od anī karī ye, terē ye fen, tamo kayau dō difiyen anidi irokenēdin, “Aya ã momoi arokeneik, aya Israel bun āgenei momoia odug eig fiya taka to ailen.

¹¹ Aya arokeneik, musei fau gaa iseyan gaa ileyan temeledim disiyouf, idim modoũ dalel fen, saa tano nē tar odug bun, Abraham, Isak, Jakop geid saa tanon dibodōf.

¹² Anī ere, Israel tamo kayau musei Negurem idi nigin saa tano dodok fe kenēdin anidi, fau dumeitur gugum bē mayarē irarāf, an inā odug ado firi de fen, goboreid kikokō youf.”

¹³ Jesus age wogō yel fen, kusī orowa irokenen, “Kel ule! Ō ogon momoiya kilei bagai, ō nigin dōf agef ifonōf.” Sain anī wogō ye mog bagai, yogon kabī tamo dagi sa kelen.

Jesus Dagi Tamo Kayau Musei El Fedin
(Mak 1:29-34; Luk 4:38-41)

¹⁴ Jesus Pita nē fō bun ilen, Pita nē mam bouwa uruwa odug ado fatarē yen mog, ilen.

¹⁵ Jesus kayau ima anī kobū fe di, bouwa uruwa fara fiye kele di, kaisā bagai kayau fā yale, Jesus aruna yalen.

¹⁶ Gugum mog, tamo kayau kaa sesen adodo musei guri difeid, Jesus wagen disin. Age dife di, Jesus od nem kaa sesen iruid fen, dagi adodo ganan el fedin.

¹⁷ Jesus enī ganan age fen, are Negur ã, profet Asaia bunem od eig ye wogō yen anī kisi falauf nigin:

“Ï yogo neda ilōyabiya yales,
neda dagi faali fen.”*

Jesus Dō Fiyēya Bun Kafī Fiya Fire Fire
(Luk 9:57-60)

¹⁸ Sain anī Jesus mala iran, tamo kayau musei kalilī difiyē di, daliyou sitakā dibal dilauf nigin in dō fiya tar irokenēdin.

¹⁹ Age fiyeīd mog, lo ifelnēdiya tamo taka wagen isi fen, irokenen, “Tise, ō narib ulauf are, aya ō dō ayōf.”

* **8:17:** Asaia 53:4

20 Jesus aiten yale iron, “Gaũ kuĩ idi yenēya nē modoũ ku ado, ninã lalo bun diyok idi uru ado, anĩ ere, Tamo Naal ĩ mudur inoya nē modoũ sã.”

21 In dō fiya taka irokenen, “Odug, fau de, folō wiya len, aya ele fen, neu dei mũ afel fen.”

22 Anĩ ere, Jesus ĩ irokenen, “Õ aya dō wiya, laa tamo idi, laa tutur abob mumã difouf.”

Jesus Uyē Yau Ado Irokenēdi Di, Kee Delen
(Mak 4:36-41; Luk 8:22-25)

23 Jesus waag owor isile di, in dō fiya tar ĩ geid dilen.

24 Idi keleĩ sã mog, maaĩ daliyoun yau total fã yen. Agef mog, maaĩ odug fã ye, waag yũ di, waag anĩ naanũ imutkesilau fenē age fen. Anĩ ere, Jesus mulã yenen.

25 In dō fiya tar dilen, turĩ difiyē, diron, “Odug, usennamã! Amã mogo naanũ mamutatã gare mausiyou fenē!”

26 Jesus aitedin yalen, “Ãgenei momoiya naal bagai, ere nigin ã fatuk kumĩ gef?” Age ye fen, ĩ fã ye, maaĩ yau ado ou fiyēdi di, oditekei kee delen.

27 Tamo idi terē de fen, to difen, “Tamo eĩ naig fiya bagai? Maaĩ yau ado karĩ difiye ken, dō difef!”

Tamo Uru Kaa Sesen Adodo El Fedin
(Mak 5:1-17; Luk 8:26-37)

28 Jesus Gadara neid teneub bun daliyou sitakã ilen, kaa sesen adodo tamo uru matmat bunem dile fen, Jesus tarabã difen. Tamo uru kuĩ bagai diledin nigin, tamo ganan naab anĩ to diyōdig.

²⁹ Anĩ idi diweig fen, diron, “Negur Naal, õ amã nigin ere naig wamãf? Õ naa wenen anĩ fau mog, gama bagai daig wamã fenē ein usif de?”

³⁰ Idi difaren sitakã gerõ nuwa an, bor musei saaf doko diyon.

³¹ Kaa sesen idi Jesus digonen, “Õ tamo eneidi bun tamal urumã fenēf are, amã bor musei namedin sur wamãf.”

³² Jesus kaa sesen irokenēdin, “Uleleg!” Idi ulolõ deis fen, diselen bor namedin dilelen. Bor ganan gududu de bebeigir disil, daliyoun naanũ gare desin.

³³ Bor lo fiya tamo diya, taun disil fen, Jesus kaa sesen irudi di, bor gare den anĩ ganan wogõ den. Age de fen, idi ereb tamo uru kaa sesen adodo bun wõ yen anĩ nigineg wogõ den.

³⁴ Age de di, tamo kayau taun temeleid adok, Jesus ileya nigin dilen. Idi Jesus dile fen, idi neid fonõ anĩ itor ilauf nigin digonen.

9

Jesus Tamo Bouwa Ilolaisin Anĩ El Fiyen (Mak 2:1-12; Luk 5:17-26)

¹ Jesus waag taka sõ ye, daliyou ibal fen, yogon taun ilen.

² Tamo tunĩ tamo bouwa ilolaisin gabgab bun yen mog, Jesus wagen diroulen. Idi neid momoiya Jesus ile fen, Jesus tamo bouwa ilolaisin irokenen, “Kesu, waũ unois, ogon mosor alelkonok.”

³ Anĩ karĩ de fen, lo ifelnēdiya tamo tunĩ, idi neid kisi bun diron, “Tamo eĩ Negur kono fiyek!”

4 Idi neid kisi kelei ken, Jesus iron, “Ã ere nigin wauĩ bun kisi sane agef wõ yef?”

5 Nanĩ anĩ irõya nigin karika: ‘Ogon mosor alelkonok,’ de? Oo ‘Fã, ufar uyok ule?’

6 Anĩ ere, Tamo Naal ã tenebur ein mosor yaleleya nigin yana ado anĩ ã keleĩ youf nigin...” Age ye fen, tamo bouwa ilolaisin irokenen, “Fã ufar, ogon gabgab wale urou, fonõ ule.”

7 Age ye di, tamo fã yale, fonõ ilen.

8 Tamo kayau guru difen ganan anĩ meledim dile fen, terẽ de kumĩ den. Negur yogo tamo yana enĩ ifenẽdin anĩ nigin, idi Negur yana dalesen.

Jesus Matyu Iweignen

(Mak 2:13-17; Luk 5:27-32)

9 Jesus an tamal iyok ile fen, mala irakelen, tamo yana Matyu takis yaleya fõ bun ibod mog, ilen. Jesus ã irokenen, “Aya dõ wiya.” Age ye di, Matyu fã yale, Jesus dõ fen.

10 Jesus Matyu nẽ fõ bun bõ saaf yõ mog, takis yaleya tamo, mosor ado tamo kayau musei disi fen, Jesus in dõ fiya tar geid weim saaf don.

11 Farisia tamo idi anĩ dile fen, idi Jesus nẽ dõ fiya tar to difedin, “Ere nigin ãgenei tise, takis yaleya tamo, mosor ado tamo kayau geid saaf doko?”

12 Od anĩ Jesus karĩ ye fen, iron, “Idi bouweid biya bagai, dokta gein ileya nigin to waud yenẽdig, tamo dagi ado idim dogol, dokta gein ileya nigin waud yenẽdig.

13 Uleg fen, od enĩ dir ge fen, kaũ ere yeĩf anĩ keleĩ youf, ‘Aya wau ifenẽya anĩ orouf, sesewi

fiya sã.* Anĩ nigin, aya tamo madur anidi iweignēdiya nigin to asin, aya mosor adodo anidi iweignēdiya nigin asin.”

Kuri Nigin Jesus To Difiyen
(Mak 2:18-22; Luk 5:33-39)

¹⁴ Age ye mog, Jon naan igunēdiya tamo nē dō fiya tar disin, Jesus to difiyen, “Naig fe di, amā Farisia tamo geid kuri mau di, ogon dō fiya tar idi kuriya sak?”

¹⁵ Jesus aitedin yalen, “Tamo, kayau yalou fenē tar bun, ne tã tar disennek idi fau weim dibod ken, naig ĩ nigin waud gudū foug? Dum sain wō ye di, an ne tã tar bun tamal yalelnēf bun anĩ, idi gama kuri douf.

¹⁶ “Tamo taka, gabar masak mata, gabar tubu ado baguf fen, to iwauf. Anĩ age foug, gabar masak matam gabar tubu dī fe di, tubu kudef, awa kanouf.

¹⁷ Takag, tamo idi wain mata anĩ meme gabar† tubu anĩ bun to ditinēf. Age difoug, meme gabar kude fele di, wain oho yalauf. Meme gabar sane lauf. Age fiya sã, idi wain mata are meme gabar mata bun ditinēf. Age fe di, uru idi kabī ifenēdiya nigin biya difarauf.”

Kayau Naal Laa Fen, Dagi Kayau Taka Ado
(Mak 5:22-43; Luk 8:41-56)

¹⁸ Od enĩ Jesus fau wogō ye mog, Juda neid uub fō nē uyu irouya taka isin, Jesus wagen ibor bobou fe fen, iron, “Gama bagai neu barai laa fel.

* **9:13:** Hosia 6:6 † **9:17:** Juda neid tobonunā, idi meme gabar nem darum diwadig.

Õ uma fen, imã teten uno di, kayau naal baban kel mata ibodõf.”

¹⁹ Jesus fã yale, uruwom dile di, yogon dõ fiya tar idig dilen.

²⁰ Dile mog, kayau taka ogõ dagi faimud ado yar tuwelf iyon anĩ, Jesus dume dume isi fen, Jesus nẽ kolos iri kobũ fen.

²¹ Kayau anĩ yogon kisi iron, “Aya de yogon kolos dogol kobũ afouf, anĩ aya neu dagi sa kalauf.”

²² Jesus falei yelen, kayau anĩ ile fen, iron, “Nau barai, waũ unois, ogon momoiya anim dagi sa kel konok.” Age ye mog bagai, kayau in dagi sa kelen.

²³ Jesus uyu irouya nẽ fõ bun isour ilen, mala iran, tamo kayau musei kokũ de, i de mog, iledin.

²⁴ Jesus iron, “Uyaleleg, kayau naal enĩ laa fiya sã, mulã yenek.” Age ye di, idi kasã difiyen.

²⁵ Tamo kayau mayarẽ irud laisi fen, Jesus aab namen ilen, kayau naal ima yale iron. Age fe di, kayau naal fã yen.

²⁶ Nenerĩ anĩ wogõ de di, teneub anĩ ganan bun iyokelen.

Jesus Tamo Towo El Fedin, Uru Meleid Ifofakeleya Ado Taka Ait Ifokeleya

²⁷ Jesus modoũ anĩ itor ken, iyok ile mog, tamo uru meleid ifofakeleya Jesus dõ difiyen, diweig diron, “Dawid Naal, amã nigin waũ inõ!”

²⁸ Jesus fõ aaben ile di, tamo uru meleid ifofakeleya wagen dilen, Jesus idi to fedin, “Ã momoi gef, aya ã meleĩ el afe di, lo gouf nigin kisi feleya?”

Idi aiten dalen, “Ao, Odug.”

²⁹ Age de di, Jesus imam meleid kobū feid fen, iron, “Momoi gef kilei, ã nigin age feneif.”

³⁰ Idi neid meleid gama kelē delen. Jesus total bagai katū feid fen, iron, “Enī nigin taka to urokenēgouf.”

³¹ Anī ere, idi kututū deis dile fen, Jesus age fen anī, teneub anī nē akor ganan bun od dinof diyon.

³² Idi Jesus ditornē dile mog, tamo taka kaa sanem ait ifokelen anī Jesus wagen dirousin.

³³ Kaa sane iru di, iyan, tamo ait ifokeleya wogō yen. Tamo kayau guru difen ganan terē de fen, diron, “Kulu nem isi gama, Israel bun eig fiya taka to tailen.”

³⁴ Anī ere, Farisia tamo idi diron, “Are kaa sane neid mudur yana bunem, ī kaa sesen irudif.”

Kabī Tamo Musei Sā

³⁵ Jesus taun ganan fonō fonō ganan bun iyo ken, nedi uub fō bun ifelneīd, saa tano nē biya od wogō feid fen, dagi gariya fire fire ganan el fedin.

³⁶ Sain Jesus mala iran, tamo kayau musei guru difen anī ileid fen, idi nigin wau yun, ere nigin, idi morō adodo isennēdiya sā, idi sipsip marau sā age fiya gen.

³⁷ Anī yogon dō fiya tar irokenēdin, “Kabier saaf musei biya ima bure felen, anī ere, kabī tamo musei sā.

³⁸ Age fiya nigin, kusu fiya marau, Odug to wiyēg, kabī tamo susur fedi di, yogon kabier kusus fiya nigin dilauf.”

10

Jesus In Dō Fiya Tar Tuwelf Sur Fedin (Mak 3:13-19; Luk 6:12-16)

¹ Jesus in dō fiya tar tuwelf iweignēdi di, wagen guru difen, kaa sesen irudiya, dagi gariya fire fire ganan el difediyouf nigin megeir ifenēdin.

² Eī aposel tuwelf yeneid, Simon (in yana Pita dedig), yogon tura Endru, Jems Sebedi naal, ne tura Jon,

³ Filip, Batolomyu, Tomas, taka Matyu takis yaleya tamo, Jems Alfeus naal, taka Tadeus,

⁴ Simon Selot,* taka Judas Iskariot, ī anī Jesus kiwai ifenen.

Jesus In Dō Fiya Tar Tuwelf Kabī Ifenēdin (Mak 6:7-13; Luk 9:1-6)

⁵ Idi tuwelf enidi, Jesus fadim enī ado dō difouf nigin sur fedin: “Idi ibor fire Juda ibor sā wagedin to ulagauf, Samaria neid taun taka taka buneg to uleg.

⁶ Israel atun idi sipsip fō delen anidi bun dogol ulagauf.

⁷ Sain ā ulagauf, od enī anī wogō gef uyōg, ‘Saa tano mogo melsak.’

⁸ Dagi el wedig, gare den turī wedig, lepra dagi ado el wedig, kaa sesen urudig. Megeir anī ā na yaleya sā ege walegen, anī nigin, ege luwa wenēdigouf.

⁹ Ā gol moni, silwa moni, kapa moni be, āgenei kodolē taka to bagai ufeg.

* **10:4:** Juda neid kusī mala taka, idi Rom gawaman ado kusī dedig.

¹⁰ Delē uyōgou fenē, delē iyōya nē faa sã, gabar uru, sendel uru, manig uru agog to guri gouf, tamo kabī dalef, idi de mala ereb lau difef anī difenēdiyadidig.

¹¹ “Narib gouf, taun be, fonō taka be bun ulegef, ã meleī unog, tamo ã nigin sere yeīf, yogon fō bun ubodōg, dum utorōg uleg.

¹² Æ fō anī bun ulegef, āgenei wau inosiya nē aanya wenēdigouf.

¹³ Fō anī bun tamo kayau biya diyeik, āgenei wau inosiya nē aanya an urofosisig, idi age fiya sãf, āgenei wau inosiya nē aanya anī baban keg waleg.

¹⁴ Aib taka ī ã nigin to sere yeīf, āgenei od to karī youf, āgenei yeī aasu tu weleg fen, fō be taun anī utorōg ulagauf.

¹⁵ Aya momoi arokeneik, Sodom Gomora ado darau dalen anī wal fiya, es foug naa anī bun, taun anī in darau odug bagai yalouf.

Kafī Fiya Fire Fire Fau Isiyouf
(Mak 13:9-13; Luk 21:12-17)

¹⁶ “Aya ã sur ayeik are, sipsip gaū kuī atun sur fiya gen. Anī nigin, ã gogour age fedig gen, kisi ed ge waleg fen, ago gouf, ninã kuburir gen, imatkesiya ubodōgouf.

¹⁷ Æ tamo nigin lo walagauf, idi fau kaunsel imeid bun dineneī di, idi Juda neid uub fō bun wagagã diyeīf.

¹⁸ Idi aya nigin de fen, ã guri diyeī diroule, gawaman mudur, king ado wagedin difarnei ken, ã idi geid fen, haiden Israel sã anidi meleid bun, aya nigin wogō gouf.

19 Anĩ ere, idi ã kot bun ifareya nigin gei diyeyf, ã wauĩ to morõ ken, ere od tarõf, naig ta tarõf anĩ nigin to kisi fatuk walogouf. Sain anĩ bun, ã ereb od urõgouf nigin fau ifeneif.

20 Are ãgem to urõgouf, ãgenei Temeĩ nẽ Awa Uur ĩ yogo ã bunem wogõ youf.

21 “Tura fã youf, tura nigin kiwai fen, idegẽ di, laa bun inenẽf, tamag naal ado age difouf, kesu fã douf, idi neid sina tama nigin kiwai dino fen, idi dogo laa bun dinenẽdiyof.

22 Tamo ganan idi, aya nigin fau kiwai difeneif, anĩ ere, aib taka megeir ino ifar ile idikeleya bun ouf, Negur isennẽf.

23 Teneub taka bun, ã darau odug difeneif are, uyu takã uyag uleg. Aya momoi arokeneik, ã fau Israel neid taun ganan bun to uyõg udikeleg mog, Tamo Naal kel isiyof.

24 “Skul kesu ĩ yogon tise to wal fouf, age fiya gen, ferfer ĩ yogon marau to wal fouf.

25 Skul kesu ĩ yogon tise genẽf, are de. Takag, kabĩ tamo ĩ yogon orowa genẽf, are de. Fõ anĩ tama yana dun Belsebub,† anĩ nigin, fõ anĩ tamo ganĩ be dibodok idi yeneid sane bagai dalef!

Negur Dogol Kumĩ Fiyẽya
(Luk 12:2-7)

26 “Age fiya nigin, ã idi to kumĩ wedig. Gama ereb ein dede fiya yenek, are fau lelek falauf, gama ereb iminẽyan yenek, are dum fau keleĩ youf.

† **10:25:** Belsebub are Satan nẽ yana taka.

²⁷ Gama ereb aya gugum bun wogõ ayeik, are fau gaa lalan bun wogõ gouf bagai; gama ereb kosesëyam karī gef, dum fau fõ agaran ufareg fen, uweigig urõgouf bagai.

²⁸ Idi bouwa dukesif, anī ere, malakanon yuke-siya kisin sã anī to kumīg. Anī ere, taka ï malakanon bouwa ado yũ orok fe, hel bun irãya kisi feleya anī dogol kumī gouf.

²⁹ Fisisir uru ten toea nem na nigin sur gedig. Anī ere, ãgenei Temeï yogon wau to irõ mog, taka tenebur to kubũ youf.

³⁰ ãGenei mudureï bun fatiyeīg ganan iwes yalen.

³¹ Age fiya nigin, to kumīg, ã Negur mala bun safina odug bagai, fisisir musei wal fediya.

*Kristus Nigin Kurõ Fesiya Ado Wa Fiya
(Luk 12:8, 9)*

³² “Aibem taka aya nigin tamo meleid bun kurõ falaisiyouf, ayag ï nigin neu Dei saa ilun ibodok wagen kurõ afalaisiyouf.

³³ Anī ere, aibem taka aya nigin tamo meleid bun wa fouf, ayag ï nigin neu Dei saa ilun ibodok wagen wa afouf.

*Wau Inosiya Sã, Anī Ere, Soworu
(Luk 12:51-53; 14:26, 27)*

³⁴ “Ã to kisi eig wog, aya tenebur ein wau inosiya irou isiya nigin asin gouf. Aya wau inosiya irou isiya nigin to asin, anī ere, aya soworu irou isiya nigin asin.

³⁵ Anī nigin, aya tubi kobõ fiya nigin asin,
“Tamo ï tama nigin kiwai inouf,

ne barai yogon sina nigin kiwai inouf,
yanawau ï sina yana nigin kiwai inouf.

³⁶ Tamo nē kiwai are, de tamo anī nē ibor bun tamalem fã de fen, kiwai difenēf.’

³⁷ “Aibem taka ï, yogon tama sina nigin wau fatuk ifen ken, aya nigin to age fef, ï aya dō fiya nigin to kisi falauf. Aibem taka ï, yogon naal be, ne barai be wau fatuk ifen ken, aya nigin to age fef, ï aya dō fiya nigin to kisi falauf.

³⁸ Aibem taka ï, yogon aa tetek orowa to sef fen, aya dō fiyaf, areg aya dō fiya nigin to kisi falauf.

³⁹ Aib taka tenebur ein nē mata alouf ye fen imirek, yogon mata fō yalouf. Aib taka yogon mata aya nigin iraillef, yogon mata kel yalouf.

Mala Solo
(*Mak 9:41*)

⁴⁰ “Tamo aibem ã yaleyeik, are aya yaleyaf, tamo aibem aya yaleyaf, are aib ï aya sur fiyan ï yalef.

⁴¹ Aibem taka ï, ï profet nigin ye fen, profet taka yalef, ï profet mala yalouf, aibem taka ï, ï madur tamo nigin ye fen, madur tamo taka yalef, ï madur tamo nē mala yalouf.

⁴² Aibem taka, naan medir kap tekelei, tamo yeneid sã anī taka ifen yãf, ere nigin, ï neu dō fiya tamo, aya ã momoi arokeneik, ï yogon mala solo to bagai wal fiyēf.”

11

Jesus, Jon Naan Igunēdiya Tamo Ado
(*Luk 7:18-35*)

¹ Jesus yogon dō fiya tamo tuwelf tai feid bure fel fen, anenem tokō fel, Galili taun taka taka bun ifelneĩd fen, biya od wogō fediyouf nigin ilen.

² Age fe di, Jon naan igunēdiya tamo kalabus bun ibod ken, Kristus kabī agef yalef de di, od anī karī yen, Jon yogon dō fiya tar Jesus to difiyēf nigin

³ sur fedi di, dilen, to difiyen, “Tamo isiyouf den, o ogo yeir de? Oo amā fau taka nigin tari mafouf?”

⁴ Jesus aitedin yalen, “Kekug uleg fen, ā wedereim karī gel, meleim ulegel anī Jon wogō wiyēg,

⁵ meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif.

⁶ Tamo aya nigin wau to firagagaũ fef, Negur ī el fiyek.”

⁷ Jon nē dō fiya tamo ditornē dilele di, Jesus, tamo kayau guru difen anidi, Jon nigin irokenēdiya anī gariya inon, “Ā ere bagai anī ulogouf nigin, gerere tuan ulegen? Ā unin yaum walala fe di, ulogouf nigin ulegen de?”

⁸ Anī sãf are, ere bagai ā ulogou fenē, ulegen? Tamo taka kolos biya bagai ifonun de? Sã, idi kolos biya bagai difonuk age fiya are, king nē fō bun dibodok.

⁹ Ba, ere bagai anī ā ulogou fenē, ulegen? Profet taka de? Are de yeir, aya ā arokeneik, ī profet wal fediya.

¹⁰ Tamo anī, ī nigin Negur nē Itotoya bun eig ye itoton:

“‘Aya neu arũ tamo sur afe di, ī ket uyu ilauf,

im uyulil ogon naab dodok fouf.’*

11 Aya ã momoi arokeneik, kayau onoudi kesu dalen idi atun an, taka nem Jon naan igunēdiya tamo to wal difiyen, anī ere, aib taka saa tanon yana naal bagai ado ī Jon wal fiya.

12 Jon naan igunēdiya tamo in sain bunem isi gama, saa tano, megeir ado bilalaũ fedig, megeir ado tamom saa tano anī irou irouledig.

13 Profet ganan Moses nē Lo ado, saa tano nigin profet od wogō def disin, isi Jon bun daun.

14 ã walogou fenē wauī oroīf are, ī Eliya, ī fau isif ya anī.

15 Aib ī weder adouf, karī youf.

16 “Tamo kayau sain enei bun, idi nigin ere bunem aya kisi afouf? Idi simom maket modoũ bun dibod ken, abob diweignēdidig gen:

17 “ ‘Amã ã nigin kelel maun,
anī ere, ã to kui gen;

amã kanon seg malen,

anī ere, ã to wauī gudū fen.’

18 Anī Jon isin, saaf to yon, wain to yon, idi dirōdig, ‘Ī kaa sane ado.’

19 Tamo Naal isin, saaf yon, wain yon, idi dirōdig, ‘Eī saaf wan, wainei yedig, dobu irāya tamal, ī, takis yaleya tamo, mosor tamo ado geid nigal difedig.’ Anī ere, kisi biya ī in tobonunã anī bunem, biya yaoref.”

*Taun Tunī Waud Faleiya Sã Nigin Isisnēdin
(Luk 10:13-15)*

* **11:10:** Malakai 3:1

²⁰ Jesus ĩ, taun tunĩ bun memelik musei inodin, anĩ ere, idi waud to falei den, anĩ nigin, Jesus ou fiyēdin.

²¹ “Korasin taun, õ malalon ado! Betsaida, õ malalon ado! ã bun memelik musei anodin, age fiya gen anĩ Taia taun Saidon taun ado bun wõ yem are, mogo kulu waud falei de fen, wau gudũ fiya nē gabar difoun ken, aasur dibodom.

²² Anĩ ere, aya ã arokeneik, es fiya sain bun, morõ Taia taun Saidon taun ado dalouf anĩ wal fiya, ã walougouf.

²³ Õ Kapenaum, õ yanã anĩ saa ilun iselauf de? Sã bagai, õ laa neid modoũ bun usilauf. Memelik õ bun wõ yen anĩ age fiya, Sodom taun an wõ yem are, ĩ gamag eig fe di, ibodom.

²⁴ Anĩ ere, aya ã arokeneik, es fiya sain bun, morõ Sodom yalouf anĩ wal fiya, õ walouf.”

Morõ Ado Aya Bun Usi, Waũ Unois

(Luk 10:21, 22)

²⁵ Sain anĩ bun, Jesus iron, “Dei, saa ado teneub nē Odug, aya õ yanã alesef, ere nigin, safina eneidi, kisi biya ado keleĩ adodo to dilouf nigin õ unokon, ago fen, simõ dibodon anidi bun yaor won.

²⁶ Ariya, Dei, enĩ are ogon waũ filolõ fiya biya bunem agon.

²⁷ “Ereb ereb ganan, neu Dei ĩ aya bun inon. Taka nem Naal keleĩ sã, Dei yogo dogol. Taka nem Dei keleĩ sã, Naal yogo, tunĩ idi Naalum Dei ifelnēdiyof nigin igirnēdif anidim dogol keleĩ.

²⁸ “ã ganan morõ yei ken, sii yeik, wageun usig, ago ge di, aya wau inosiya afeneĩf.

²⁹ Neu sũ waleg, oroweĩ seg fen, aya bun keleĩ walogouf, ere nigin, aya molol fen, aya imatke-siya. Ago gouf, meleikanon siwo inoya gurug fouf.

³⁰ Ere nigin, neu sũ karika fen, neu morõ yal bagai.”

12

Jesus, Ĩ Sabat Naa Nẽ Odug (Mak 2:23-28; Luk 6:1-5)

¹ Sain anĩ Juda neid Sabat naa* bun, Jesus wit kabĩ atu atu iyok ilen. Jesus in dõ fiya tar naũ feid fen, wit tunĩ gei fiya gariya dino fen, don.

² Farisia tamo idi anĩ dileid fen, idi Jesus diroke-nen, “Ulef! On dõ fiya tamo tar idi, ĩtãfiya difodul ken, Sabat naa bun oug difef.”

³ Jesus aitedin yalen, “Dawid in kusĩ tamo anidi geid naũ fedid di, Dawid age fen anĩ, ã Negur nẽ Itotoya bun to uwesegen de?”

⁴ Ĩ Negur nẽ fõ namen ilen, agef fen, ĩ in kusĩ tamo anidi geid, bret fateul anĩ don, anĩ idi age fiya kisi feleya sã, anĩ idi ĩtãfiya difodul ken, age difen anĩ, prisem sã age difoũ nẽ anĩ.

⁵ Oo ã Lo od anĩ to be uwesegen de? Are Sabat naa bun, pris tempel namen kabĩ dalef bunem naa anĩ didodok, anĩ ere, anĩ mosor sã.

⁶ Aya ã arokeneik, tekelei ĩ tempel wal fiya anĩ, are yeir.

⁷ Ā od enĩ, ‘Aya wau ifenẽya anĩ orouf, sesewi fiya sã,† anĩ nẽ gariya keleim are, ã tamo morõ sã ege mosor ado to wiyẽdigem.

* **12:1:** Sabat naa anĩ, Juda neid uub nẽ naa. † **12:7:** Hosia 6:6

⁸ Ere nigin, Tamo Naal yogo dogol Sabat naa nē Odug.”

*Tamo Taka Ima Sitakā Gege Fefu Fiya
(Mak 3:1-6; Luk 6:6-11)*

⁹ Jesus modoũ anī itor ken, iyok ile, Juda neid uub fō namen ilen,

¹⁰ tamo taka ima sitakā gege fefu fen, ī an ibodon. Idi Jesus bouwa bun od dinou fenē nigin naab dimir ken, abugā to difiyen, “Sabat naa bun tamo madur fiya anī idodōya sā de?”

¹¹ Jesus idi irokenēdin, “Ā anī taka, ā atun ī sipsip taka ado anī Sabat naa bun mekur isilauf, ā to uleg waleseg unenēgouf de?”

¹² Tamo ī sipsip wal fiya bagai! Anī nigin, biya anī Sabat naa bun age tafef, are idodōya sā.”

¹³ Age ye fen, ī tamo anī irokenen, “Imā fara wol.” Age ye di, ī ima fara fele di, oditekei ima madur len, age fe di, ima sitakā gen wō yen.

¹⁴ Anī ere, Farisia tamo idi dilelel fen, Jesus yukesiya nigin katō difen.

Kabī Tamo Negurem Igirnen

¹⁵ Idi neid kisi kelei ken, Jesus modoũ anī itoron. Tamo kayau musei ī dō difiyē di, ī idi neid dagi ganan el fedin,

¹⁶ tamo kayau ganan wedereid iroun, ī aib yeya anī to yaor difouf nigin.

¹⁷ Enī Negur, profet Asaia bunem eig ye wogō yen anī kisi falauf nigin, agef wō yen:

¹⁸ “Eī neu kabī tamo ayam agirnen,
ī nigin aya wau laa fedig, ī nigin aya wau kulī yedig;

aya neu Awa Uur ï bun anouf,
 ï anï teneub ganan haiden bun Negur nē
 madur bagai anï kurō fesiyouf.

19 ï to seye ye fen, ait bagam to iweig irōf;
 takam in ait naabur to karï youf.

20 Werï felu reya ï to were fouf,
 takag, lalan komomor fe mog, ï to gare falauf,
 agef mog, Negur nē madur bagai anim ganan wal
 fouf.

21 In yana bun, teneub ganan haiden, idi neid
 waud an yenēf.”‡

Jesus Belsebub Ado Difiyen
(Mak 3:20-30; Luk 11:14-23)

22 Tamo taka kaa sanem irou di, mala sigor ado
 ifofakelen, idi anï dirousi di, Jesus ï el fiyen. Age
 fe di, ï mala kelē ye fen, od wogō yen.

23 Tamo kayau adok waud bun terē de fen,
 diron. “Enï anï Dawid Naal de?”

24 Anï ere, Farisia tamo idi karï de fen, diron,
 “Are kaa sane neid mudur Belsebub yana bunem
 dogol, tamo enï kaa sesen irudif.”

25 Jesus idi neid kisi kelei ken, idi irokenēdin,
 “Tano ganan yogo kiwai ifen ken, fara fouf, are
 sane lauf, taun ganan bun be, fō ganan bun be,
 idi dogo fara difouf, idi to difarauf.

26 Satan ï yogo Satan iruf, ï yogo nigin faraf,
 yogo kiwai ifenek, naig fe fen, anï yogon tano
 ifarauf?

27 Are aya Belsebub yana bunem kaa sesen
 arudif, ere bunem āgenei tamo kayau kaa sesen
 dirudidig? Anï nigin, idim ā es diyēif.

‡ 12:21: Asaia 42:1-4

²⁸ Anĩ ere, aya Negur nẽ Awa Uur bunem kaa sesen arudif are, Negur nẽ tano mogo ã bun isil.

²⁹ “Takag, taka megeir ado nẽ fõ bun ile, in safina bẽ yalou fenẽ, are ĩ tamo megeir ado anĩ ket ifokel fen, gama ĩ in safina fõ bun bẽ yalouf.

³⁰ “Taka ĩ aya to fedẽ fiyaf, ĩ neu kiwai, takag, taka ĩ aya ado to guru mafef are, ĩ firagagaũ fef.

³¹ Anĩ nigin, aya ã arokeneik, mosor kono fiya ado ganan tamo bun wõ yef, are yalelauf, anĩ ere, Awa Uur kono fiyek, are mosor to yalelauf.

³² Taka ĩ Tamo Naal nigin kiwai ifen ken, kobu yef are, in mosor yalelauf. Ani ere, taka ĩ Awa Uur Fateul nigin kiwai ifen ken, kobu yef are, in mosor to yalelauf, gama sain enĩ bun ado dumen isiyouf buneg to yalelauf.

Aa Taka Yogon Faat Ado
(Luk 6:43-45)

³³ “Aa biya are faat biya yũdig, aa sane are faat sane yũdig, anĩ nigin, aa ganan faat bunem keleĩyadig.

³⁴ Æ, gogour sane gere tar, naig fe di, ã sane anim ã biya nigin wogõ gouf? Ereb ã namein isokosef, are sigoreim kaaresi gef.

³⁵ Tamo biya, safina biya ĩ bun kuru fef anĩ irou isidig, age fe di, tamo sane, safina sane ĩ bun kuru fef anĩ irou isidig.

³⁶ Anĩ ere, aya ã arokeneik, tamo idi od kisi sã wogõ den anĩ ganan, fau es fiya sain bun, idi fau dogo Negur mala bun, mugu mugu kurõ difesiyouf.

³⁷ Anĩ nigin, ogon od bunem õ mosor sã yõf, ogon od bunem õ mosor ado yõf.”

Jona Nē Uris

(Mak 8:11, 12; Luk 11:29-32)

³⁸ Age fe di, Farisia tamo tunī, lo ifelnēdiya tamo tunī geid, idi Jesus dirokenen, “Tise, amā ō bun memelik nē uris taka mailau fenē.”

³⁹ Jesus aitedin yalen, “Sane seseirā ibor, sain enei nē tamo kayau anī, memelik nigin to difef! Anī ere, taka to ifelneif, de profet Jona nē uris anim dogol ifelneif.

⁴⁰ Ere nigin, Jona naa towo bō towo, gau odug namen ibodon, age fiya gen, Tamo Naal naa towo bō towo, teneub akor ilon yenēf.

⁴¹ Niniwe tamo kayau fā de fen, es fiya naa bun, ibor enī, sain enei nē tamo kayau sane difiyēdiyof, ere nigin, idi mogo Jona wogō ye di, waud falei den, gama taka Jona wal fiya are yeir.

⁴² Kuin Saut tamal fā ye fen, es fiya naa bun, ibor enī, sain enei nē tamo kayau sane fiyēdiyof, ere nigin, kayau anī, King Solomon nē keleī biya karī youf nigin teneub idiyān tamal isin, gama taka King Solomon wal fiya are yeir.

Kaa Sane Kel Isiya Gen

(Luk 11:24-26)

⁴³ “Sain kaa sane tamo bun tamal ulō yeis fen, gerere tuan ile, si inoya modoū imirek ile to fotou fef.

⁴⁴ Agef fen, ī irok, ‘Aya fō atoron anī bun baban kelauf.’ Sain ī kel isif, fō ani daku, wāi difel fen, madur difen anī ilef.

⁴⁵ Anī nigin, ī ile fen, baban kaa sesen ī wal fiya sewen anī geif irou isif, age de fen, idi namen dile, an difaref. Age dife di, tamo anī gai sane bagai lef, uruwa bun ne tobonunā anī wal fiya. Age

fiya bagai, sain enei nē tamo kayau, ibor sane enī gama difaref, idi tobonunā anī adouf.”

Jesus Sina, Tura Tar Geid
(*Mak 3:31-35; Luk 8:19-21*)

⁴⁶ Sain Jesus tamo kayau wogō feid mog, in sina tura tar geid serē difar fen, ī geid od wogō douf nigin orodin.

⁴⁷ Takam ī irokenen, “Ogon sinā turā tar geid serē difaref, idi ō geid od wogō dou fenē orodif.”

⁴⁸ Jesus aiten yalen, “Ai anī neu naai, ai anī neu turau tar?”

⁴⁹ In dō fiya tar bun imam ifelneīd fen, ī iron, “Enidi anī neu naai, neu turau tar.

⁵⁰ Taka ī, neu Dei saa ilun ibodok anī nē oroya dōf age fef anī ī, neu turau, neu mainou, neu naai.”

13

Faat Irarāya Tamo Nē Yaab Od
(*Mak 4:1-12; Luk 8:4-10*)

¹ Naa de anī bun, Jesus aaben tamal kutū yeis ile, daliyou sirin ibodon.

² Guru fiya odug kalilī difiyē di, tamo kayau adok ubun difar mog, ī waag namen isil ibodon.

³ Agef fen, erab erab musei yaab od nem iro-keneīd fen, iron, “Kabī marau taka, faat irarāf nigin ilen.

⁴ Sain ī irarak ile mog, tunī naab luwen kuku ren, are ninā disi dakasin.

⁵ Tunī meein tuar kuku ren, an teneub badagar. Are kaisā bagai fokū den, ere nigin, teneub are badagar bagai.

⁶ Anĩ ere, sain gaa ise di, bali are ilala di, laasi yedin, ere nigin, idi warumutei sã.

⁷ Faat tunĩ malũ duri atun kuku ren, are malũ duri anĩ fã ye fen, bali sile feledin.

⁸ Faat tunĩ teneub biya bun kuku ren, are idi biya imadin, taka biya hundred, taka biya siksti, taka biya teti age fef ilauf.

⁹ Aib ĩ weder adouf, karĩ youf.”

¹⁰ In dõ fiya tar ĩ wagen disi to difiyen, “Ere nigin õ yaab od nem tamo kayau urokenẽdif?”

¹¹ Jesus aitedin yalen, “Saa tano nẽ waa keleĩ youf nigin are mogo ã ifenein, anĩ ere, tamo kayau to ifenẽdin.

¹² Ereb taka aib ĩ ado are, anĩ wal fiya ifenẽf, anĩ ĩ musei adouf. Ereb taka aib ĩ sã, ererb ererb ĩ ado areg ĩ bun yalelauf.

¹³ Anĩ nigin, aya yaab od nem arokenẽdif, ere nigin,

“Idi meledim diledig, anĩ ere, idi meleid fokõya sã,

idi wederedim karĩ dedig, anĩ ere, idi wedereid fokõya sã, to keleik.

¹⁴ Idi bun, Asaia nẽ profet od kisi felef:

“ ã wedereim karĩ gouf, anĩ ere, wedereĩ to fokõ youf,

ã meleim ulogouf, anĩ ere, meleĩ to fokõ youf.

¹⁵ Ere nigin, tamo kayau enei, idi waud katĩ felen, idi wederedim karĩya malai bagai,

age de fen, idi meleid difofakelen,

age fiya sam are, idi meledim dilem,

wederedim karĩ dem ado,

idi waud fokõ ye fen,

falei de di, aya idi el afedim.’*

¹⁶ Anĩ ere, ãgenei meleĩ nigin el fedif, ere nigin, ã ulegef, ãgenei wedereĩ nigin el fedif, ere nigin, ã karĩ gef.

¹⁷ Anĩ aya ã momoi arokeneik, profet musei, madur tamo geid, ã ulegef anĩ dilou fenē nigin waud yenen, anĩ ere, idi meledim to dilen, takag, karĩya ã karĩ gef anĩ karĩ dou fenē nigin waud yenen, anĩ ere, idi wederedim to karĩ den.

*Jesus Faat Irarãya Tamo Nē Yaab Od Faded Fen
(Mak 4:13-20; Luk 8:11-15)*

¹⁸ “Yaab od bun, faat irarãya tamo nē gariya anĩ karĩg:

¹⁹ Taka ĩ, saa tanon nē od karĩ ye fen, ĩ weder to fokō yef, sane taka isi, faat yogon wau bun iraran anĩ son fiyek. Are faat naab luwen iraran anĩ age fiya.

²⁰ Takag, faat meein tuar kubū yen are, tamo ĩ od karĩ ye fen, kaisã bagai ĩ od anĩ yale fen, wau bun kulĩ yef.

²¹ Anĩ ere, ĩ warumutei sã, anĩ nigin, ĩ sain meluk to ibodōf. Sain, biya od nigin morō be, kafĩ fiya be isif, ĩ kaisã bagai irofosif.

²² Takag, faat taka malū duri atun kubū yen are, tamo ĩ od karĩ yef, anĩ ere, tenebur mata ibodōya nē sii fiya, safina ado ibodōya nē kisi fiya anidim, biya od sile fe di, anim biya to yūf.

²³ Takag, faat teneub biya bun kubū yen are, tamo ĩ od karĩ ye fen, fokō yef, are ĩ biya yūf, taka biya hundred, taka biya siksti, taka biya teti agef imauf.”

* **13:15:** Asaia 6:9, 10

Lili Nē Yaab Od

²⁴ Jesus yaab od taka irokenēdin, “Saa tano ĩ, tamo taka yogon kabĩ bun, wit faat biya iraran gen.

²⁵ Anĩ ere, tamo adok mulaĩ den mog, yogon kiwai isin, lili wit kabier irara ken, agef yen ilen.

²⁶ Sain wit bali fokũ ye fen, biya olili den, agef mog, lilig wowã den.

²⁷ “Marau nē kabĩ tamo, ĩ wagen disin diron, ‘Tamo biya, õ faat biya on kabier to uraran de? Lili anĩ nainenem disin?’

²⁸ “Ĩ aitedin yalen, ‘Kiwai takam age fen.’

“Ne kabĩ tamom to difiyen, ‘Amã mele anĩ kususu mafelauf anĩ õ oroyok de?’

²⁹ “Ĩ aitedin yalen, ‘Sã, ere nigin, lili kususu ge mã, ã wit ado kususu gouf.

³⁰ Malakaĩ, weim difar mog, fau kusu fiya sain bun. Sain anĩ bun, aya kususu fiya tamo arokenēdiyof: Lili ketem kurug fen, ufafãg, dum yakur feid isaikalauf nigin; agog fen, wit kurug, neu kin gurig uleg.’ ”

Masted Faat Yis Ado Nē Yaab Od

(Mak 4:30-32; Luk 13:18-21)

³¹ Jesus yaab od taka irokenēdin: “Saa tano ĩ, masted faat tamo takam yale fen, yogon kabier itenen gen.

³² Anĩ ĩ faat ganan nigin naal bagai, anĩ ere, ĩ odugouf, ĩ kabier saaf ganan wal fediya aa wõ youf. Age fe di, ninã ilun temeleid disi, were bun dibodõf.”

³³ Jesus baban yaab od taka irokenēdin: “Saa tano ĩ, yis kayau takam yale fen, flawa odug ado falei fe di, ganan gẽ yedig gen.”

³⁴ Jesus od enĩ ganan, yaab od nem tamo kayau wogõ fiyēdin. Ĩ od ganan to kurõ falaisi irokenēdin, yaab od nem dogol.

³⁵ Anĩ bunem, Negur profet bunem eig ye wogõ yen anĩ, agef kisi felen:

“Aya yaab od bunem sigoroum kurõ afesiyouf, gariya bun teneub ino fen, ereb ereb inokakan anĩ aya yaor afouf.”†

Jesus Lili Nē Yaab Od Faded Fen

³⁶ Jesus tamo kayau itorneĩd fen, fõ namen ilen. In dõ fiya tar ĩ wagen disi fen, diron, “Kabier lili nē yaab od anĩ, amã faded wamã.”

³⁷ Jesus aitedin yalen, “Tamo tekelei faat biya iraran, are Tamo Naal.

³⁸ Kabĩ are tenebur tamo kayau, faat biya anĩ, are Negur nē tano nē gere tar, lili are Satan nē gere tar,

³⁹ kiwaim lili iraran, are Satan. Kusu fiya are saa teneub ado idiyēf bun, kusus fiya tamo are idi engel.

⁴⁰ “Anĩ nigin, lili kusus feid, yã yakur feid isaikalauf, age fiya gen, saa teneub ado idiyēf bun, age fouf.

⁴¹ Tamo Naal ĩ, yogon engel sur fediyouf, idi yogon tano bun ereb ereb ganan mosor dinodig ado, tamo kayau ganan sane age difedig gei difeid fen, dalelnēdiyof.

⁴² Idi yã mala bobo rouf bun dirarãf, an inã odug ado firi de fen, goboreid kikokõ youf.

† **13:35:** Sam 78:2

⁴³ Age fe di, madur tamo idi, gaa gen nedi Temeid nē tanon fula difouf. Aib ĩ weder adouf, karī youf.

Safina Biya Bagai Inokon Ado Maaĩ Tuwa Meli Bagai Pel Nē Yaab Od

⁴⁴ “Saa tano ĩ, safina biya bagai kabier inokon gen. Tamo taka fotou fe fen, baban kabier inokon. Agef fen, wau al fef ile, safina adok ĩ ado anĩ, na nigin sur fe fen, akor anĩ na yalen.

⁴⁵ “Takag, saa tano ĩ, na yaleya tamo, maaĩ tuwa meli bagai pel biya, na nigin imirek gen.

⁴⁶ ĩ meein medeĩya taka moni odug nē anĩ fotou fe fen, ile, safina adok ĩ ado anĩ na nigin sur fe fen, meein medeĩya anĩ na yalen.

Kakãg Nē Yaab Od

⁴⁷ “Takag, saa tano ĩ, kakãg daliyou bun gau bou fire fire gei fiya nigin dirãdig gen.

⁴⁸ Sain kakãg isokose di, gau yaleya tamo dĩ dife, ubun ise di, anĩ idi dibod ken, gau biya gei de, karam namen difeid fen, sesen anĩ are dirarailen.

⁴⁹ Age fiya bagai, saa teneub ado idikalauf bun eig fouf. Engel idi diso fen, idi madur tamo atun sesen anidi gei de dale,

⁵⁰ yã mala bobo ref bun dirarãf, an inã odug ado firi de fen, goboreid kikokõ youf.”

⁵¹ Jesus to fedin, “Ã od enĩ ganan wedereĩ fokõ yef de?”

Idi diron, “Yo, amã karī mauf.”

⁵² Jesus idi irokenēdin, “Anĩ nigin, lo ifelnēdiya tamo ganan saa tano nigin ifelnēdin are, idi fõ

tama gen, ï safina biya nē aaben tamal safina mata tubu ado irou isidig.”

Profet Yana Sã Gen

(Mak 6:1-6; Luk 4:16-30)

⁵³ Jesus yaab od eneidi bure fel fen, anenem iyok ilen.

⁵⁴ In fõ gariyan isi fen, ï an tamo kayau dogo neid uub fõ bun ifelnēdin, age fe di, idi terē den. Idi to difen, “Tamo eĩ, kisi biya ado memelik nē totol enei, nain yalen?”

⁵⁵ Ï kapenta naal sã de? In sina Maria sã de? In tura tar Jems, Josef, Simon, Judas ado sã de?

⁵⁶ In main tar ganan, ada weim to tabodok de? Tamo enĩ enei ganan nain yalen?”

⁵⁷ Age de fen, idi ï kiwai difenen.

Anĩ ere, Jesus idi irokenēdin, “Profet taka ï, in fõ gariyan ado in fõ bun dogol, ï yana sã.”

⁵⁸ Ï an memelik musei to inon, ere nigin, idi to momoi den.

14

Jon Naan Igunēdiya Tamo Ula Gudũ Fen

(Mak 6:14-29; Luk 9:7-9)

¹ Sain anĩ bun, Galili nē uyu irouya Herod Jesus nigin od karĩ ye fen,

² in kabĩ tamo irokenēdin, “Enĩ Jon naan igunēdiya tamo, ï laa fen anĩ kel fã yen! Anĩ nigin, memelik nē totol ï bun kabĩ yalef.”

³ Kulu Herod, in tura Filip nē aiwa, Herodias nigin, Jon yale ifõ, kalabus bun inenen.

⁴ Ere nigin, Jon ï irokenēdig, “Õ ïtäfiya ufodul ken, turã nē kayau walen.”

⁵ Herod Jon yukesiya nigin wau yenen, anĩ ere, tamo kayau kumĩ fedin, ere nigin, idi ĩ profet taka dedig.

⁶ Herod sina gō fen anĩ nē naa bun, Herodias nē barai seg kui ye fen, dole kenēdi di, Herod wau al bagai fen.

⁷ Age fe di, ĩ wau adok kuturol fen, ne barai ereb taka nigin to fouf, de anĩ bagai ifenēf yen.

⁸ In sinam weder te yabi di, ĩ iron, “Beĩ taka bun Jon naan igunēdiya tamo mudur uno fen, ein wanauf.”

⁹ King ĩ wau togun, anĩ ere, wau kuturol fen, tamo kayau meleid bun kurō fesin anĩ nigin, in oroya dōf anĩ bagai ifenēf nigin wogō ye fen, tamo sur fe di,

¹⁰ Jon kalabus bun ula gudū fen.

¹¹ In mudur beĩ bun dino diroule, ne barai difenē di, ĩ sina gein irou ilen.

¹² Jon nē dō fiya tar disi, in bouwa buru dale mū difen. Age de fen, idi dilen, Jesus dirokenen.

Jesus Faif Tausen Tamo Saaf Ifenēdin
(Mak 6:30-44; Luk 9:10-17; Jon 6:1-14)

¹³ Jesus, Herod Jon ula gudū fen anĩ karĩ ye fen, ĩ mugu bagai waag bun moilin ilen. Tamo kayau idi anĩ karĩ de fen, taun temeleid yedim dō difen.

¹⁴ Sain Jesus kutū yeis fen, mala iran, tamo kayau musei iledin, ĩ idi nigin wau yu ken, idi neid dagi el fiyēdin.

¹⁵ Mogo bok isi di, in dō fiya tar Jesus wagen disi diron, “Eĩ gerere tuan, sain mogo sa kelef. Tamo kayau susur wo di, dilalauf, ago di, idi fonō fonō dile fen, dogo neid saaf na dalouf.”

¹⁶ Jesus irokenēdin, “Idi ileya nigin kisi to yenēf. Saaf yōya nigin āgem wenēdigouf.”

¹⁷ Idi dirokenen, “Amā ein bret faif, gau uru ado dogol.”

¹⁸ Ī iron, “Wageun gurig urousig.”

¹⁹ Tamo kayau fisir bun dibodadāf nigin Jesus irokenēdin. Bret faif gau uru ado, imam yale, saa ilun itad fen, ĩ Negur de fiye ken, bret mumā fen. Agef fen, in dō fiya tar ifenēdi di, idim tamo kayau difenēdin.

²⁰ Idi ganan don anī kisi felen. Age fe di, in dō fiya tar, tamo kayau bret dokon, tunī ditoraran anī fito difen, karam tuwelf eweid gere fen.

²¹ Tamo bret don anī, idi faif tausen age fiya, kayau kesu geid iwesediya sã.

Jesus Naan Teteatu Iyon

(Mak 6:45-52; Jon 6:15-21)

²² Kaisã bagai, Jesus, in dō fiya tar waag bun idi ketem sitakã dilauf nigin sur fedin. Age de mog, ĩ tamo kayau irudin.

²³ Jesus idi irud le fen, ĩ yogo arein kosē youf nigin iselen. Ī an mugu ibod mog, bõ irou isin.

²⁴ Anī ere, waag mogo teneub itoron gerõ ifaren, yau odug fã ye di, moloun wī ye fen, waag yū di, ilef isif fen.

²⁵ Wef mog, Jesus daliyou teteatu idi gedin iyok ilen.

²⁶ Sain in dō fiya tar meleid diran, daliyou teteatu iyõ mog, dile fen, idi tererē den. Idi diron, “Eī baraū,” kumī de fen, ui guru den.

²⁷ Anī ere, kaisã bagai Jesus irokenēdin, “Total ufareg! Are ayam. To kumī wog.”

²⁸ Pita solof iron, “Odug, onom ouf are, urokana len, naan teteatu ò garan asiyouf.”

²⁹ Jesus iron, “Usi.”

Age fiyē di, Pita waag bun kutū yeis, naan teteatu Jesus wagen iyok ilen.

³⁰ Anī ere, ī yau ile fen, kumī ye di, gamai imutuk isil fen, iweig iron, “Odug, usenna!”

³¹ Kaisā bagai, Jesus ima iran, yalesne ken, irokenen, “Ō momoiya naal, ere nigin ò waū uru ado?”

³² Age ye fen, idi uru waag namen sosō de di, yau kee relen.

³³ Anī dile fen, idi waag namen difaren, Jesus nigin seli dabi diron, “Momoi bagai, ò anī Negur Naal.”

*Jesus Genesaret Oun Dagi Adodo El Fedin
(Mak 6:53-56)*

³⁴ Sain idi daliyou sitakā dibal dilen, Genesaret teneub bun wō den.

³⁵ Tamo kayau fonō anī bun temeleid, Jesus kelei ken, idi fonō anī kalilī fiya fō fō ganan od dinon. Fonō fonō idi neid dagi tamo guri difeid, Jesus wagen disi fen,

³⁶ idi dagi tamo yogon gabar irig kobū difouf nigin, Jesus digonen. Ganan idi ī kobū difen, dagi fara feledin.

15

*Amuyē Sā Ado Amuyē Ado
(Mak 7:1-23)*

¹ Sain anĩ bun, Farisia tamo tunĩ, lo ifelnēdiya tamo tunĩ geid, Jesus garan Jerusalem temeleid disi to difiyen,

² “Ere nigin on dō fiya tar, mudur ado neid tobonunã wal difedig? Idi neid imeid kulo fiya sã, saaf dōdig!”

³ Jesus solof irokenēdin, “Ere nigin ã āgenei tobonuneĩ dōg fen, Negur nē ĩtãfiya wal gedig?”

⁴ Ere nigin, Negur iron, ‘Ō sinã tamã yeneid wales,’* ‘Aibem taka sina be tama be gelu fiyēf, ĩ laa bun dinenēf bagai.’†

⁵ Anĩ ere, ã urōgedig, ‘Tamo taka, sina be, tama be idi bun irōf, “Ereb taka ō isennōya nigin ayam ifonōya anĩ, ayam Negur afenem,”

⁶ ĩ age fef anĩ bunem in tama yana seli kulō fiya nigin to age fouf,’ gedig. Āgenei tobonunã age fiya bunem Negur nē od to dō gedig.

⁷ Ā mala yaleya tamo! Asaia ĩ, ã nigin profet od eig ye wogō yen in od tutuk:

⁸ “Tamo kayau enidi, nedi sigoredim aya selu kulō difedig, anĩ ere, idi neid waud aya nigin gerō ifaref.

⁹ Idi aya yanau dalesedig, are ege.

Idi neid ifelnēdiya are tamo nē keleĩ dogol dō difedig.’‡ ”

¹⁰ Jesus tamo kayau iweig laisi, irokeneid fen, iron, “Karīg fen, wedereĩ fokōf.

¹¹ Ereb taka mayarem tamo awa kurē isilef anim, ĩ amuyē to ifenēdig, anĩ ere, erab taka

* **15:4:** Eksodas 20:12; Diuteronomi 5:16 † **15:4:** Eksodas 21:17; Levitikas 20:9 ‡ **15:9:** Asaia 29:13

namenem awa kurem ulõ yesif anim, ï amuyẽ ifenẽdig.”

¹² Age ye di, in dõ fiya tar ï garan disi to difiyen, “Farisia tamo idi od enĩ karĩ de fen, waud õ nigin to biyaf anĩ, õ karĩ wof de?”

¹³ Jesus aitedin yalen, “Aayũ ganan, neu Dei saa ilun tamal im to itenanan, are warumutei ado kususu foug.”

¹⁴ Utornẽdig; idi uyu irouya nigin meleid ifofakelen. Mala ifofakeleya tamo taka, mala ifofakeleya taka gim fiyẽf are, idi uruwom mekur kuku douf.”

¹⁵ Pita iron, “Yaab od enĩ nẽ gariya faded wo urokanamã.”

¹⁶ Jesus to fedin, “Ã fau nene gef de?”

¹⁷ Ã to ulegedig de? Ereb taka awa gerinem te namen isilef are te ado iledig.

¹⁸ Anĩ ere, ereb taka awa bun wõ yef are wauda bunem isedig anim, tamo amuyẽ ifenẽdig.

¹⁹ Ere nigin, wauda bun tamal wõ yef, are kisi sesen, tamo yukesiya, seseirã inoya, noli tobonunã, bẽ, kot bun idegẽya od bou bun yũya, dumen od wogõya.

²⁰ Enĩ ganan anĩ tamo amuyẽ ifenẽdig, anĩ ere, ima kulo fiya sã saaf doko anim, tamo amuyẽ to ifenẽdig.”

Kanan Kayau Nẽ Momoiya

(Mak 7:24-30)

²¹ Jesus modoũ anĩ itor ken, Taia Saidon ado neid teneub akoron ilen.

²² Haiden kayau Kanan tamal taka, melsã an tamal Jesus wagen isin iweig iron, “Odug, Dawid

Naal, aya nigin malalon yō! Neu barai kaa sanem irou di, to biya bagai yenek.”

²³ Anī ere, Jesus od taka to solo fenen. Anī nigin, in dō fiya tar Jesus wagen disi, total bagai dirokenen, “Kayau sur wo di, ile, ere nigin, ī iweig fen, iweig fen, dō fadaf.”

²⁴ Jesus kayau aiten yalen, “Negur aya sur fiyan are, sipsip Israel atun fō delen anidi bun dogol.”

²⁵ Kayau anī isin, wagen ibor bobou fe fen, ī iron, “Odug, aya usenna!”

²⁶ Jesus aiten yalen, “Kesu nanaal neid saaf yale fen, gaū irarak kenēdiya are to biya.”

²⁷ Kayau anī iron, “Odug, are momoi, anī ere, gaū idig moroid tar tebol bun saaf dō di, momout kuku re di, dōdig.”

²⁸ Age ye di, Jesus aiten yalen, “Kayau, ō mo-moiya odug ado! Ogon waū irok agef ifonok.” Sain anī bun bagai, ī ne barai el felen.

*Jesus Fo Tausen Tamo Saaf Ifenēdin
(Mak 8:1-10)*

²⁹ Jesus an itor ken, Galili maaī yeri dō fen. Agef fen, ī arein isel ibodon.

³⁰ Tamo kayau musei wagen disin, yeid kirorōya, meleid ifofakelen, iborodim gogo dedig, aiteid ifofakelen, dagi fire fire museig, Jesus ye gariyan guri dife dirou disi di, ī el fedin.

³¹ Aiteid ifofakelen od wogō den, iborodim gogo dedig madur feid difaren, yeid kirorōya diyon, meleid ifofakelen lo difen, anī ganan tamo kayau dile fen, terē den. Age fe di, idi Israel nē Negur yana dalesen.

³² Jesus, in dō fiya tar iweignēdi di, wagen disi di, irokenēdin, “Aya tamo kayau enidi nigin waud inaf, idi mogo aya geid naa towo dibodon, anī ere, gama ereb taka yōya sã. Aya, idi naū susur afedi di, dilauf anī to orouf, age afouf are, idi luwen kuku douf.”

³³ In dō fiya tar dirokenen, “Amã gerere tuan ein bret kisi feleya nain male fen, musei enī weit mafediyouf?”

³⁴ Jesus to fedin, “Bret ganī ã ado?”

Idi diron, “Bret sewen, gau nanaal teke tekelei ado.”

³⁵ Jesus tamo kayau tenebur dibodadãf nigin irokenēdin.

³⁶ Agef fen, Jesus, bret sewen gau ado, imam yale iroun, ã Negur de fiye ken, bret anī mumã feid fen, in dō fiya tar ifenēdi di, idi bagam tamo kayau difenēdin.

³⁷ Idi ganan don anī kisi felen. Dumen in dō fiya tar, tamo kayau bret dokon, tunī ditoraran anī fito difen, karam sewen eweid gere fen.

³⁸ Tamo bret don anī idi fo tausen, kayau kesu geid iwesediya sã.

³⁹ Jesus tamo kayau susur feid, dilele di, ã waag bun sō ye, Magadan akoron ilen.

16

Farisia Tamo Sadusia Tamo Geid, Saa Ilun Nē Uris Nigin To Difen

(Mak 8:11-13; Luk 12:54-56)

¹ Farisia tamo Sadusia tamo geid, Jesus wagen disi, kisi difiye ken, saa ilun nē memelik taka meledin inouf nigin to difiyen.

² Jesus aitedin yalen, “Sain aragau isi di, ã urõgedig, ‘Sain biyau fenẽ, ere nigin, saa giri yef,’

³ bonimei di, ã urõgedig, ‘Gama uyẽ yau ado fouf, ere nigin, saa giri ye fen, budũ iyokelef.’ Æ saa bun es fiya nigin keleĩ bagai, anĩ ere, ã ereb sain nẽ uris es fiya nigin kisi feleya sã.

⁴ Sain enei nẽ tamo kayau, ibor sane seseirã inoya nẽ anĩ, memelik nẽ uris dimerẽdig, anĩ ere, taka to ifenẽdiyof, de Jona nẽ uris dogol ifenẽdiyof.” Age ye fen, Jesus idi itorneĩd ilen.

*Farisia Tamo Ado Sadusia Tamo Neid Yis
(Mak 8:14-21)*

⁵ Sain idi daliyou sitakã dibal dilen, in dõ fiya tar bret yaleya nigin wedereid tu kelen.

⁶ Jesus idi irokenẽdin, “Lo welegei! Farisia tamo ado Sadusia tamo neid yis nigin, ã lo welegei.”

⁷ In dõ fiya tar idi dogo dogol katõ de fen, diron, “Ĩ agef irok, ere nigin, ada bret to tarousil nigin.”

⁸ Idi neid wogõya Jesus kelei ken, to fedin, “Æ momoiya naal bagai, ere nigin ã bret sã ge fen, aug tutur wogõ gef?”

⁹ Æ wedereĩ fau to fokõ yef de? Æ to karĩ welegef, bret faif anĩ faif tausen don, age fe di, karam ganĩ ã kuru ge di, eweid gere fen?

¹⁰ Takag, bret sewen anĩ fo tausenem don, age fe di, karam ganĩ ã kuru ge di, eweid gere fen?

¹¹ Æ naig fe di, wedereĩ to fokõ yef, aya bret nigin ã to arokeneim de? Anĩ ere, ã lo welegei, Farisia tamo ado Sadusia tamo neid yis nigin.”

¹² Age ye di, idi mogo wedereid fokõ yen, ĩ yis bret bun dinodig anĩ nigin to wogõ fedin, ĩ Farisia

tamo ado Sadusia tamo neid ifelnēdiya anī nigin wogō fedin.

Pita Kristus Nigin Kurō Fesin

(Mak 8:27-30; Luk 9:18-21)

¹³ Sain Jesus Sisaria Filipai nediwon isi fen, in dō fiya tar to fiyēdin, “Tamo kayau Tamo Naal nigin ai dedig?”

¹⁴ Idi dirokenen, “Tunī dirok, ō Jon naan igunēdiya tamo, tunī dirok, ō Eliya, tunī dirok, ō Jeremaia oo profet taka be.”

¹⁵ Jesus to fedin, “Ba ā uleg? Aya nigin ā ai gef?”

¹⁶ Simon Pita aiten yalen, “Ō anī Kristus, Ō mata ibodōya Negur Naal.”

¹⁷ Jesus solof iron, “El fiya ō ado, Simon Jona nē naal, ere nigin, on keleī are tamo nē keleī bunem sã, are neu Dei saa ilun tamal in keleī bunem.

¹⁸ Anī nigin, aya ō arokonok, ō Pita,* meein enī teten neu sios anouf, laa nē megeir anim sios to wal fiyēf.

¹⁹ Aya saa tano nē ki ō afonōf, ereb ō tenebur ein ufok, are saa ilun ouneg ifōf, ereb ō tenebur ein biru wof, are saa ilun ouneg biru fouf.”

²⁰ Age ye fen, Jesus ī Kristus yeya anī, aib taka to dirokenēf nigin, in dō fiya tar wedereid iron.

Jesus Busuk Bun Laaf Fen, Mata Kel Fã Youf Yen

(Mak 8:31-9:1; Luk 9:22-27)

²¹ Sain anī bunem ilauf bun, Jesus yogo nigin in dō fiya tar yaor fe irokenēdin, ī Jerusalem ilauf bagai, an darau musei, mudur adodo, pris odudug, lo ifelnēdiya tamo imeid bun yalouf, an

* **16:18:** Pita, ani nē gariya, meein.

ĩ dukesiyouf, naa towo bure fele di, mata kel fã youf.

²² Pita Jesus yale, yerin irou ile ou fiyen, ĩ iron, “Odug, sã bagai! Enĩ ganan õ nigin to bagai wõ youf!”

²³ Jesus falei yel, Pita irokenen, “Satan, dumeun ule! Õ aya naaburau gudũ wof; on kisi are Negur nẽ sã, on kisi tamo nẽ dogol.”

²⁴ Age ye fen, Jesus in dõ fiya tar irokenedin, “Aib taka aya dõ fiyau fenẽ, ĩ yogon oroya lai fesil fen, ĩ yogon aa tetek faali fe fen, anĩ aya dõ fiyau.

²⁵ Ere nigin, aib taka yogon mata isennẽf nigin oro fef are, fõ yalouf, aib taka yogon mata, aya nigin irailauf are, mata anĩ gurug fouf.

²⁶ Tamo taka ĩ, teneub enĩ ganan kakarai fe fen, akorou yef, anĩ are, ĩ yogon malakanon irailauf, ere biya ĩ yalouf? Takag, tamo taka yogon malakanon nigin ere mala solof fen, ĩ kel yalouf?

²⁷ Tamo Naal, in Tama nẽ fula fiya medeĩya ado in engel geid disiyouf, agef fen, tamo mugu mugu erab age fef anĩ kilei, ĩ mala solo age fiya bagai ifenẽdiyof.

²⁸ Aya momoi arokeneik, tunĩ ein difaref fau to gare de mog, idi Tamo Naal in tano bun isi di, dilouf.”

17

*Jesus Bouwa Falei Fen
(Mak 9:2-13; Luk 9:28-36)*

¹ Naa sigis bure fele di, Jesus, Pita, Jems, taka Jon Jems nē tura geif fen, idi mugu arei odug ilun diselen.

² An Jesus idi meleid bun bouwa falei felen. In nawa gaa gen fula felen, in kolos lalau fen, yal gen lalanan.

³ Agef mog, an idi meleid bun Moses, Eliya ado wō de fen, Jesus weim wogō den.

⁴ Pita Jesus irokenen, “Odug, ada ein ibodōya nigin biya bagai. Ō oroyōf are, aya salafat towo anouf, taka ogon, taka Moses nē, taka Eliya nē.”

⁵ Pita fau wogō ye mog, lalo lalau bagai idi kerub fedin, ait taka lalo namen iron, “Eī neu Kesu, ī nigin aya wau laa fedig, ī nigin aya wau kulī yedig. Ī karī wiyēg!”

⁶ Anī in dō fiya tar karī den, idi neweid kususur de fen, tenebur gurorō de tererē den.

⁷ Anī ere, Jesus isin, kobū feid fen, ī iron, “Fafāg, to kumīg.”

⁸ Idi ditadsen, taka to dilen, Jesus dogol.

⁹ Idi arei bun diyok disi fen, Jesus idi iro-kenēdin, “Ā ereb ulegel enī, aib taka to urokenēg, fau Tamo Naal laa bun tamal kel fā ye di.”

¹⁰ In dō fiya tar Jesus to difiyen, “Ere nigin lo ifelnēdiya tamo dirōdig, ‘Eliya ī ketem isiyouf bagai’ dedig?”

¹¹ Jesus aitedin yalen, “Mmoi bagai, Eliya isi fen, ereb ereb ganam madur fediyouf.

¹² Anī ere, aya ā arokeneik, Eliya mogo isi bure felen, idi anī ī nigin to kelei ken, ereb ereb ganam idi waud iron kilei, ī nigin mogo age difen. Age fiya gen, Tamo Naal idi imeid bun darau yalouf.”

¹³ Jesus age wogō ye di, in dō fiya tar idi wed-ereid fokō yen, Jon naan igunēdiya tamo nigin irok den.

Jesus Kesu Kaa Sane Ado El Fiyen

(Mak 9:14-29; Luk 9:37-42)

¹⁴ Sain idi tamo kayau gedin disin, tamo taka Jesus wagen isi fen, ibor bobou fen.

¹⁵ Ī iron, “Oduḡ, neu kesu nigin malalon yō. Ī mir yuk sain, sane bagai firi ye fen, sain musei yāḡ iledig, naanūḡ iledig.

¹⁶ Aya, ĩ, on dō fiya tar wagedin arou elen, anī ere, idi el fiyēya kisi feleya sã.”

¹⁷ Jesus solof iron, “Sain enei nē tamo kayau, ibor enī, sane, momoiya sã, sain ganī aya ā geid tabodōf? Sain ganī aya ā nigin wau aukesilauf? Kesu wageun ein urousig.”

¹⁸ Jesus kaa sane ou fiyē di, kesu bun tamal ulō yeis ile mog, kesu ĩ bou karika len.

¹⁹ Age fe di, in dō fiya tar mugun Jesus wagen disi to difiyen. “Ere nigin amã kaa sane iruya kisi feleya san?”

²⁰ Jesus irokenēdin, “Ere nigin, āgenei momoiya naal bagai nigin. Aya momoi arokeneik, ā momoiya naal masted faat age fiya adouf are, ā arei enī urokenēgouf, ‘Ein tamal godo urou ule, oun ufar,’ ago ge di, ĩ dōf age fouf. Ereb erab ganān ā age fiya kisi feleya.”*

Jesus Baban In Laa Nigin Iron

(Mak 9:30-32; Luk 9:43-45)

* **17:20:** Itotoya tunī eig de ditoton: *kisi feleya.* ²¹ Anī ere, kaa sane eig fiya ege to ulō yeis ilauf, kurig fen, kosē ge di.

²² Sain idi disi, Galili guru difen, Jesus idi irokenēdin, “Tamo Naal ī fau tamo imeid bun dinouf.

²³ Idi fau ī dukesiyouf, anī ere, naa towo bure fele di, ī fau baban mata kel fā youf.” Age ye di, in dō fiya tar waud morō gudū fesin.

Tempel Nē Takis

²⁴ Jesus in dō fiya tar geid, Kapenaum taun disi di, tempel takis yaleya tamo, Pita wagen disi to difiyen, “Āgenei tise tempel nē takis to inodig de?”

²⁵ Pita iron, “Ariya, ī takis inodig.”

Sain Pita fō namen isi di, Jesus ket wogō yen, “Simon, ō ere kisi wof? Ai bunem tenebur nē king anidi takis daledig, idi neid kesu bunem de, oo tamo tunī bunem?”

²⁶ Pita solof iron, “Tamo tunī bunem.”

Jesus ī irokenen, “Anī nigin, kesu idi bunem sã.

²⁷ Anī ere, adam idi waud saneya to tafenediyouf nigin, ō daliyoun ule, on mū urāf. Gau uruwa walouf anī awa gede fen, an silwa koin moni ulouf, wale fen, takis ogon ado neu nigin wenēdiyouf.”

18

Saa Tanon Odug Ibodōya Nigin

(Mak 9:33-37; Luk 9:46-48)

¹ Sain anī bun, in dō fiya tar Jesus wagen disi, to difiyen, “Aim saa tanon odug bagai ibodok?”

² Ī kesu naal taka iweignē isi di, idi atun ifarnen.

³ Agef fen, ī iron, “Aya momoi arokeneik, ā kesu nanaal gen falei gouf anī dogol, age fiya sãf are, ā saa tanon to bagai ulagauf.

⁴ Anĩ nigin, aib taka yogo nigin kuru kel fen, kesu enĩ geněf are, ĩ saa tanon odug bagai ibodok.

⁵ “Takag, aib taka kesu naal eig fiya, aya yanau nem yalef are, ĩ aya yaleyaf.

⁶ Anĩ ere, aibem taka age fe di, kesu aya nigin momoi def enidi taka, mosor bun kubũ youf are, tamo anĩ meein odug guyutu bun ifo ken, maaĩwō irāya nigin biya.

⁷ “Teneubur tamo kayau idi meleidlon ado, ere nigin, ereb to biya anĩ age fe di, tamo mosor bun dilalauf. Tobonunā age fiya bagai wō youf, anĩ ere, tamo nanĩ be bunem isif, ĩ malalon ado!

⁸ Ogon imam be, yem be mosor bun ineyōf are, gudũ fen uraile. Ō imā tobega be, yē tobega ado mata bun ileyā nigin biya bagai, ere nigin, imā totoũ be, yē totoũ adouf are, yā faimud ibodkeleya anĩ bun an dirāyōf.

⁹ Age fiya bagai, ogon malam mosor bun ineyōf are, ubodol uraile. Ō malā tekelei ado mata bun ileyā nigin biya bagai, ere nigin, malā totoũ adouf are, hel nē yā mala bun dirāyōf.

Sipsip Fō Yeleya Nē Yaab Od
(Luk 15:3-7)

¹⁰ “Ā lo welegei, kesu nanaal enidi taka to meleĩ irim gouf. Ere nigin, aya ā arokeneik, idi neid engel saa ilun dibodok, sain ganau neu Dei saa ilun ibodok no diledig.*

¹² “Ā ere kisi ado? Tamo taka ĩ wan handred sipsip ado, tekelei idi atun fō yalauf are, marau ĩ

* **18:10:** Itotoya tunĩ eig de ditoton: *diledig*. ¹¹ *Fō delen anĩ kel yaleya nigin Tamo Naal isin.*

nainti-nain sipsip uya bun itorneïd fen, ile, tekelei fõ yelen anï to imirëf de?

¹³ Aya ã momoi arokeneik, ï fata foug are, ï sipsip tekelei anï nigin wau kulïya odug, sipsip nainti-nain to fõ delen nigin anï nẽ kulïya wal fiya.

¹⁴ Age fiya bagai, ãgenei Temeï saa ilun ibodok, kesu nanaal enidi taka fõ yeleya nigin to orodig.

Turã Taka Mosor Inoyõf

¹⁵ “Ogon turã taka mosor inoyõf, ule ã uruwom atun dogol in kũ fenëya ufelnëf. Ì õ karï yõf, õ ogon turã mogo kel walel.

¹⁶ Anï ere, ï to karï yõf, baban tekelei be uru age fiya õ geid fen, ulagauf, ago di, ‘od ganan isennëya uruwom be, towom sigoredim kurõ difesiyouf anï megeir gouf.’†

¹⁷ Ì idi karï fediya nigin itorõf, sios urokenëf. Ì sioseg karï fiyëya nigin itorõf are, ï haiden be takis yaleya tamo sane gen unenëf.

¹⁸ “Aya ã momoi arokeneik, ereb taka ã tenebur ein ufokalagauf, are saa iluneg ifokalauf, ereb taka ã tenebur ein biru walagauf, are saa iluneg biru falauf.

¹⁹ “Baban, aya ã arokeneik, tenebur ein ã uruwom ereb taka nigin wauï tekelei fen, to gouf, neu Dei saa ilun ibodok, ï döf ã nigin age foug.

²⁰ Ere nigin, uruwom be, towom be, aya yanau nem guru difef, aya an idi geid mabodok.”

Kabï Tamo Wau To Yüdig Nẽ Yaab Od

† **18:16:** Diuteronomi 19:15

²¹ Age ye di, Pita Jesus wagen isi, to fen, “Oduḡ, neu turau aya nigin mosor inouf, sain ganĩ neu turau nẽ mosor nigin wederou tu kalauf? Wederou tu kelef ile, sewen daũ de?”

²² Jesus aiten yalen, “Aya õ arokonok, õ sewen dogol to agouf, sewenti anĩ are sewenem tobol wouf.

²³ “Anĩ nigin, saa tano ã, king taka, ne ferfer geid in wareg madur fiya nigin oron gen.

²⁴ King ã wareg madur fiya nigin gariya inon, tamo taka ã bun ten milion kina yalen anĩ, ã wagen dirou disin.

²⁵ ã wareg anĩ yukesiya kisi feleya sã nigin marau iron, ã yogo ado in aiwa, in gere tar ado in safina ganan na nigin sur fedu di, in wareg anĩ yukesiya kisi falauf yen.

²⁶ “Kabĩ tamo, marau wagen ibor bobou fe fen, igonen, ‘Õ aya nigin waũ unois fen, sain wana len, aya wareg anĩ ganan kisi afelkonõf.’

²⁷ Kabĩ tamo anĩ nẽ marau, ã nigin wau yu ken, wareg anĩ ganan lai fesil fen, itornẽ di, ilen.

²⁸ “Anĩ ere, kabĩ tamo anĩ oreis ile fen, ã yogon kabĩ tura taka fotou fen, ã bun wareg wan hundred kina ado. ã ka fe, ula irou fen, iron, ‘Õ aya bun wareg walen anĩ kel wana!’

²⁹ “In kabĩ tura kubũ ye, ibor bobou fe fen, igonen, ‘Õ aya nigin waũ unois fen, sain wana len, aya wareg anĩ mala kela afonõf.’

³⁰ “Anĩ ere, ã to karĩ fiyen. ã tamo yale irou, kalabus bun iran, are de wareg inouf anĩ dogol.

³¹ Anĩ kabĩ tura tar tunĩ, ĩ age fen anĩ dile fen, idi waud odug sanen, anĩ nigin, dile, idi neid marau ereb age fen anĩ ganan wogõ difiyen.

³² “Age de di, marau tamo, kabĩ tamo anĩ iweignē isi di, ĩ irokenen, ‘Õ kabĩ tamo sane. Aya ogon wareg ganan lai afonon, ere nigin, õ aya ugonan.

³³ Aya õ nigin wau inan gen, õ ogon kabĩ tura nigin waũ inõya san de?’

³⁴ In marau tamo name ise fen, darau ifenēya nigin kalabus lo fiya tamo imeid bun inenen, are de wareg ganan inouf anĩ dogol.

³⁵ “Age fiya bagai, neu Dei saa ilun ibodok, ã atun tureĩ tar neid mosor nigin wauĩ bun wedereĩ to tu kalauf are, ãg age yeĩf.”

19

Tamo Kayau Ado Bagu Fiya Anĩ Fara Fiya (Mak 10:1-12)

¹ Jesus od enidi wogõ ye bure fel fen, Galili distrik itor ken, Judia distrik ilen, Jordan naan sitakã.

² Tamo kayau musei dõ difiyē di, ĩ an idi dagi el fedin.

³ Farisia tamo tunĩ ĩ wagen disi, kisi difiye ken, idi to difiyen, “Tamo taka, yogon kayau gariya fire fire bun iruf anĩ, lo dõ fiya de?”

⁴ Jesus aitedin yalen, “Ã Negur nē Itotoya to uweseg ulegen de? Gariya bun, Negur ereb ereb kare fedin ĩ, ‘tamo ino kayau ino fen,’* ”

* **19:4:** Jenesis 1:27

⁵ Negur iron, ‘Anĩ nigin, tamo ã in sina tama itorneĩd fen, in kayau ado bagu difouf, idi uru-wom bouweid tekelei.’†

⁶ Age difef, idi uru sã, idi tekelei. Anĩ nigin, Negur tamo kayau ado bagu fedin anĩ, tamom to fara fouf.”

⁷ Idi to difiyen, “Age fiyauf are, ere nigin Moses iron, tamo taka in kayau fara fiya nẽ pepa ifen ken, iru di, ilauf yen?”

⁸ Jesus idi irokenẽdin, “Moses ã āgenei wauĩ totol anĩ ile fen, āgenei kayau iruya nigin to katũ yein. Anĩ ere, gariya bun age fiya sã.

⁹ Aya ã arokeneik, aib taka in kayau seseirã inoya sã mog, kayau iru fen, kayau taka yalef are, ã seseirã inof.”

¹⁰ In dõ fiya tar Jesus dirokenen, “Tamo kayau atun morõ agef yenek nigin, ã kayau to yalouf are biya bagai.”

¹¹ Jesus irokenẽdin, “Tamo ganan od enĩ dõ fiya kisi feleya sã, teke tekeleim Negurem age fedif anidi dogol.

¹² Tunĩ idi, sineid namenem, bouweid kesu irouya nigin tutuk sã gõ fedidig, tunĩ are tamom korõ difedidig, tunĩ saa tano nigin kisi de fen, kayau to daledig. Tamo taka kisi enĩ dõ fiya nigin kisi falauf, dõf age fouf.”

Jesus Kesu Nanaal El Fiya Ifenẽdin

(Mak 10:13-16; Luk 18:15-17)

¹³ Jesus ima tetedin ino fen, kosẽ fiyẽdiyouf nigin, kesu nanaal ã wagen guri de dirousin. Anĩ

† 19:5: Jenesis 2:24

ere, in dō fiya tar, idi guri de dirousin anidi ou difiyēdin.

¹⁴ Jesus iron, “Utornēdig len, kesu nanaal aya wageun disiyouf, idi to katū wedig, ere nigin, saa tano are eig fediya neid.”

¹⁵ Age ye fen, ī ima tetedin inol fen, an tamal tokō fel ilen.

Tamo Gaū Safina Musei Ado
(Mak 10:17-31; Luk 18:18-30)

¹⁶ Tamo taka Jesus wagen isi to fiyen, “Tise, ere biya anī aya age afe fen, mata ibodkeleya alouf?”

¹⁷ Jesus aiten yalen, “Õ ere nigin ereb biya nigin aya to wiyaf? Tekelei ī dogol biya. Mata ibodkeleya bun ulau fenē, õ itāfiya dō woid.”

¹⁸ Tamo Jesus irokenen, “Itāfiya nanī bagai?”

Jesus iron, “Õ tamo taka to ukesiyouf, seseirā to unouf, to bē walouf, õ taka nigin idegēya od to urōf,

¹⁹ ogon sinā tamā yeneid walesauf,‡ õ ogo nigin waū laa fef gen, nē tā nigineg ago.’§ ”

²⁰ Tamo gaū iron, “Anī ganan aya dō afen, ere taka anī aya fau dō fiya sā?”

²¹ Jesus ī irokenen, “Õ madur bagai you fenēf, ule, ogon safina ganan na nigin sur wo fen, maleg tamo wenēdiyof, agouf, õ saa ilun safina biya adouf. Agol fen, usi, aya dō wiya.”

²² Od enī tamo gaū karī ye fen, ī wau morō fe di, itor ilen, ere nigin, ī safina musei ado.

‡ 19:19: Eksodas 20:12-16; Diuteronomi 5:16-20 § 19:19: Levitikas 19:18

²³ Age fe di, Jesus in dō fiya tar irokenēdin, “Aya ã momoi arokeneik, safina musei ado tamo, saa tanon ileya nigin malai bagai.

²⁴ Baban aya ã arokeneik, kamel ã gabar iwaya nē nil ku bun ileya nigin karika bagai, safina musei ado tamo, Negur nē tano bun ileya nigin malai bagai.”

²⁵ Od enī in dō fiya tar karī den, idi fatuk terē de fen, to difen, “Age fiyauf are, aim anī mata ibodkeleya yaleya kisi feleya?”

²⁶ Jesus idi lo feid fen, iron, “Tamo yogo bun age fiya kisi feleya sã, anī ere, Negur yogo bun erēb erēb ganān age fiya kisi feleya.”

²⁷ Pita Jesus aiten yalen, “Amã erēb erēb ganān mator ken, ò dō mayok! Ere anī amã nemã mala solo malouf?”

²⁸ Jesus idi irokenēdin, “Aya ã momoi arokeneik, erēb erēb ganān mata falei fouf sain anī bun, Tamo Naal ã yogon king nē sia bun fula fiya medeīya ado ibodōf, ã aya dō wiyagef, ãg king nē sia tuwelf bun ubodōg fen, Israel ibor tuwelf es wedigouf.

²⁹ Taka fō be, tura tar be, main tar be, tama, sina, gere tar, kabī, aya yanau nigin itoron, idi ganān mala solo wan handred wal fiya dalouf, mata faimud ibodkeleya anī dalouf.

³⁰ Anī ere, musei malabag dibodok, idi dumen dibodōf, musei dumen dibodok, idi malabag dibodōf.

20

Wain Kabī Tamo Neid Yaab Od

1 “Saa tano nē tobonunã are, teneub marau taka ã, bonimeï bagai ile fen, yogon wain kabier kabĩ dalouf nigin tamo oroi yaledin age fiya gen.

2 Kabĩ marau naa tekelei nigin ten kina afeneĩf ye di, idi ganan anĩ yo de di, in wain kabier sur fedin.

3 “Nain kilok bonimeï age fiya, ã ilen, tamo tunĩ maket modoũ bun ege difar mog, iledin.

4 ã idi irokenēdin, ‘Ãg uleg, neu wain kabier kabĩ waleg, ago gouf, mala de afeneĩf.’

5 Age ye di, idi dilen.

“ã baban gaa atun ado aragau tri kilok age fiya ile feneg, de age fen.

6 Aragau faif kilok age fiya, ã ilen, tunĩg fau difar mog, iledin. ã idi to fiyēdin, ‘Ere nigin ã ege bagai gaa ganan ein ufaregel?’

7 “Idi aiten dalen, ‘Ere nigin, taka nem amã to oroi yalemam.’

“ã idi irokenēdin, ‘Ãg uleg, neu wain kabier kabĩ waleg.’

8 “Sain aragau di, wain kabĩ marau in kabĩ tamo neid orowa irokenen, ‘Kabĩ tamo uweigneĩd fen, dogo neid mala wenēdiyof, dumen disil idi bun gariya uno fen, ule, uyu disil bun ouf.’

9 “Kabĩ tamo aragau faif kilok age fiya kabĩ dalen disi fen, mugu mugu ten kina dalen.

10 Sain idi bonimeï nem ket iweigneĩdin anidi disin, idi kisi difen, amã idi wal fiya malouf den, anĩ ere, idig mugu mugu ten kina dalen.

11 Sain idi moni dalel fen, idi teneub marau nigin nauseir den.

¹² Idi diron, ‘Tamo enidi dum bagai uweignēdi di, aua tekelei dogol kabī dalel, anī ere, amā, naa enī ganan bonimei nem isi, gama yeiref, kabī totol malel, gaa uruwa dō famam, anī ere, ō amā idi geid ten kina dede wanamam.’

¹³ “Anī ere, kabī marau ī, idi neid taka solof irokenen, ‘Mou, aya ō sane to ayok. Ō ten kina nigin ada uruwom sigoroda to tekeleil de?’

¹⁴ Ogon kabī mala wale fen, ule. Aya ō afonom age fiya, tamo dum bagai oroi aleyen anī, de age fiya afenēf nigin wau irok.

¹⁵ Aya neu safina ereb taka age fiya nigin wau irok anī, aya to age afouf de? Aya neu biya age afef nigin, ō aya kiyeī wanaf de?’

¹⁶ “Anī nigin, idi dumen dibodok anidi malabag dibodōf, idi malabag dibodok anidi dumen dibodōf.”

Jesus In Laa Nigin Irō, Towo Fen

(Mak 10:32-34; Luk 18:31-34)

¹⁷ Jesus Jerusalem iselau fenē, ī in dō fiya tar tuwelf mugu bagai gei feid fen, irokenēdin,

¹⁸ “Ada Jerusalem teselef, an Tamo Naal ī pris odudug, lo ifelnēdiya tamo imeid bun dinenēf. Idi ī laa fouf nigin bou bun od dūf.

¹⁹ Age de fen, idi ī haiden Juda sã anidi imeid bun dino di, kono difiyē, wagī difiye ken, aa tetek bun dukesiyouf. Naa towo bun, ī mata kel fã youf!”

*Jems Jon Ado Neid Sineid, Ne Wau Iron Anī
Jesus To Fiyen*

(Mak 10:35-45)

²⁰ Age fe di, Sebedi nē kesu uru, sineid geid Jesus wagen disin. Idi neid sineid ibor bobou fe fen, wau irok anī Jesus to fiyen.

²¹ Jesus to fiyen, “Ere anī ò orok?”

Kayau iron, “Õ urōf, neu kesu uru enī, ogon tano bun taka ima biyalē ibodōf, taka ima kilē ibodōf.”

²² Jesus idi irokenēdin, “Ã ereb to gef anī nē gariya, ã keleī sã, naan aya ãf anī ã yōya kisi feleya de?”

Idi aiten dalen, “Amã kisi feleya.”

²³ Jesus idi irokenēdin, “Ã momoi neu kap bun naan are wāgauf, anī ere, imau biyalē ibodōya be, kilē ibodōya are, ayam ifenēya kisi feleya sã. Modoũ anidi are, neu Dei idi nigin dodok fen anidi neid.”

²⁴ In dō fiya tar ten, od anī karī de fen, uru tura ado nigin seye den.

²⁵ Jesus idi iweig laisi fen, iron, “Ã keleī, haiden idi dogo neid uyu irouya, tamo kayau lo fiya nigin totol dinodig, idi dogo neid odudug, tamo kayau nigin megeir yaor difedig.

²⁶ Anī ere, ã bun kisi to agef yenēf, ã atun aib taka odug ibodōf nigin orof, ï āgenei kabī tamo ibodōf.

²⁷ ã atun aib taka uyun ibodōf nigin orof, ï āgenei ferfer ibodōf.

²⁸ Age fiya gen, Tamo Naal ï disennēf nigin to isin, anī ere, ï tamo kayau isenneid fen, tamo kayau musei idi neid mosor anī fotokar yogon mata ifenēdiyof nigin isin.”

Tamo Uru Meleid Ifofakelen Anĩ Meleid Birikã Felen

(Mak 10:46-52; Luk 18:35-43)

²⁹ Jesus in dõ fiya tar geid Jeriko ditor dile mog, tamo kayau musei dõ difiyen.

³⁰ Tamo uru meleid ifofakelen naab yerin dibodon. Sain idi Jesus isi ilef yeya karĩ de fen, diweig diron, “Odug, Dawid Naal, amã nigin malalon yõ!”

³¹ Tamo kayau idi ou difiyeĩd fen, foro dalauf nigin dirokenẽdin, anĩ ere, idi wade bagai diweig diron, “Odug, Dawid Naal, amã nigin malalon yõ!”

³² Jesus dẽ yel fen, idi iweigneĩd fen, ĩ to fedin, “Ere naig ayẽif nigin ã oroyeik?”

³³ Idi aiten dalen, “Odug, amã malamã fara wol kanamãf nigin oromak.”

³⁴ Jesus idi nigin meleidlõn fe fen, idi meleid kobũ fedin. Kaisã bagai, idi meleid fara fele di, sã lo dife fen, idi Jesus dõ difen.

21

Jesus Tamo Yana Ado Gen Jerusalem Namen Ilen

(Mak 11:1-11; Luk 19:28-40; Jon 12:12-19)

¹ Idi Jerusalem kelẽ difiye ken, Moul Arei bun Betfage fonõ wõ den, Jesus in dõ fiya tar uru sur feid fen,

² ĩ idi irokenẽdin, “Fonõ wagein ifaref tokõ weleg, ulõ wesig fen, kaisã bagai donki ifõya naal ado uledigouf. Idi biru weledig fen, wageun gurig usig.

³ Taka nem ã ereb yeĩf, ĩ urokenēgouf, Odug ĩ kabĩ ifenēdiyou fenē orof, ago ge di, kaisã bagai sur fediyouf.”

⁴ Profet eig ye wogõ yen anĩ kisi falauf nigin agef wõ yen:

⁵ “Saion nē tamo kayau urokenēgouf,
‘Ulef, ogon king õ garan isif,
imatkeis fen, donki bun ibodok,
donki naal teten.’ ”*

⁶ In dõ fiya tar dilen, Jesus iron kilei age difen.

⁷ Idi donki naal ado dirousi di, tetedin idi neid gabar du difedi di, Jesus anĩ tetedin ibodon.

⁸ Tamo kayau musei, idi neid gabar naabur du difedin, tunĩ idi aa were kokour dife, naabur du difedin.

⁹ Tamo kayau uyu dilen ado, dume dõ difen diweig diron,

“Hosiana,† Dawid Naal bun!”

“Odug yana bunem isif, ĩ el fiya ado!”‡

“Hosiana, saa ilun bagai!”

¹⁰ Sain Jesus Jerusalem ulõ yesi di, taun anĩ bun tamo kayau ganan terē de fen, toti difen, “Tamo eĩ aim?”

¹¹ Tamo kayau diron, “Eĩ Jesus, profet Nasaret taun Galili teneub bun tamal.”

Jesus Tempel Bun

(Mak 11:15-19; Luk 19:45-48; Jon 2:13-22)

* **21:5:** Sekaraia 9:9 † **21:9:** Anĩ nē gariya, ‘Usenamã!’ Od anĩ tamo kayau Negur yana yaleseya nigin wogõ dedig. ‡ **21:9:** Sam 118:26

¹² Jesus tempel modoũ bun ile, wõ ye fen, na dale dile disi dife mog, an tamo kayau adok iru-didin. Ī moni solo fediya neid tebol ado kuburir na sur fediya neid fatar eleg feledin.

¹³ Jesus idi irokenēdin, “Negur nē Itotoya irok, ‘Neu fõ ĩ kosē nē fõ douf,’ § anī ere, ā ‘bē tamo neid iminēya fõ’* unogen.”

¹⁴ Meleid ifofakeleya, yeid kirorõya, Jesus wa-gen tempel bun disi di, ĩ el fedin.

¹⁵ Anī ere, Jesus erob biya bagai age fe di, kesu nanaal tempel modoũ bun diweig diron, “Hosiana, Dawid Naal bun,” age de di, pris odudug, lo ifelnēdiya tamo geid, idi anī dileid fen, seye den.

¹⁶ Idi Jesus to difiyen, “Kesu nanaal enidi erob def, õ karī wof de?”

Jesus aitedin yalen, “Ariya, ā Negur nē Itotoya to uwesegen de?

“ ‘Kesu momou kesu nanaal geid sigoreid bun selu kulõ fiya nigin Negur idi mogo saika fedin.’ † ”

¹⁷ Agef fen, Jesus an tamal idi itorneĩd, taun anī itor ken, Betani fonõ ilen, an bõ tekelei ibodon.

Aa Fig Gariri Kelen

(Mak 11:12-14, 20-24)

¹⁸ Bonimeĩ bagai, Jesus Jerusalem kel ile fen, naab luwen naũ fen.

¹⁹ Mala irakelen, aa fig naab yerin ilen, Jesus iyok iselen fele fen, aa fig biya sã ege aarau dogol.

§ **21:13:** Asaia 56:7 * **21:13:** Jeremaia 7:11 † **21:16:** Sam 8:2

Jesus aa fig irokenen, “Õ baban to bagai umauf!” Kaisã bagai, aa fig gariri kelen.

²⁰ In dô fiya tar anĩ dile mã, idi terẽ de kulõ de fen, diren, “Naig fe di, aa fig kaisã bagai gariri kelen?”

²¹ Jesus aitedin yale iron, “Aya ã momoi arokeneik, ã wauĩ momoi ge mã, wauĩ to ilef isi fouf, ã aa fig enĩ bun age afel dogol to ago gouf, sã arei enĩg urokenẽgouf, ‘Kusu fen, maaĩwõ irãyõf,’ are ï dôf age fouf.

²² ã momoi gouf are, ereb taka nigin tog fen, kosẽ gouf, ã walogouf.”

*Jesus Aim Igirnen Anĩ To Difiyen
(Mak 11:27-33; Luk 20:1-8)*

²³ Jesus tempel modoũ namen ulõ yeis fen, an tamo kayau od ifelneĩd mog, pris odudug, tamo kayau neid mudur adodo, ï wagen disi to difen, “Ere igirĩya bunem õ ereb ereb enĩ ago wof? Aim õ igirĩya enĩ ifonon?”

²⁴ Jesus aitedin yale iron, “Ayag to fiya tekelei afeneĩf. ã solog urokanagauf are, ereb igirĩya bunem ereb ereb enĩ age afef, aya ã arokeneĩf.

²⁵ Jon nẽ naan igunẽdin, are nainenem isin? Are saa ilun tamal de, tamo bunem?”

Idi dogo dogol katõ de fen, diren, “Ada ‘Ï saa ilun tamal,’ tauf, ï irõf, ‘Ba anĩ, ere nigin ã ï nigin to momoi wiyẽgen?’

²⁶ Anĩ ere, ada ‘Tamo bunem’ tauf, ada tamo kayau nigin kumĩ tafedif, ere nigin, tamo kayau idi ganan Jon nigin profet taka dedig.”

²⁷ Anĩ nigin, idi Jesus ait solo de diren, “Amã keleĩ sã.”

Age de di, Jesus iron, “Ago gouf are, ayag, ere igrĩya bunem ereb ereb enĩ age afef anĩ to arokeneif.

Kesu Uru Bun Yaab Od

²⁸ “Ã ere kisi gef? Tamo taka ĩ naal uru adon. Tama ĩ kesu matu garan ile iron, ‘Neu kesu, gama wain kabier ule, kabĩ walouf.’

²⁹ “Ĩ aiten yalen, ‘Aya tuwauf,’ dum ĩ in kisi falei ye fen, ilen.

³⁰ “Agef fen, tama kesu taka garan ile, od tekelei anĩ irokenen. Kesu aiten yalen, ‘Dei, aya age afouf,’ anĩ ere, ĩ ileya sã.

³¹ “Idi uru atun, aim anĩ tama oron anĩ age fen?”

Idi aiten dalen, “Matum.”

Jesus idi irokenēdin, “Aya ã momoi arokeneik, takis yaleya tamo, kayau bouweid na nē sur difedig geid, ã atun, idi ketem Negur nē tano bun uyu dilauf.

³² Ere nigin, Jon naan igunēdiya tamo ĩ, madur ibodōya nē naab ifelneif nigin ã garan isin, ã ĩ nigin to momoi gen, anĩ ere, takis yaleya tamo, kayau bouweid na nē sur difedig geid, idi momoi den. Ã ĩ ulegeneg, ã wauĩ to falei ge fen, ĩ to momoi wiyēgen.

Tamo Kabĩ Lo Difedig Nē Yaab Od

(Mak 12:1-12; Luk 20:9-19)

³³ “Yaab od taka nigin wedereĩ unog. Teneub marau taka ĩ yogon kabier aa wain itenen, ĩ kau ifō kalĩ felen, wain sumin asi fiya nigin ku yalen, kabĩ lo fiya nē fō inon. Agef fen, ĩ mala solo yalouf

nigin wain kabĩ, kabĩ lo difedig tamo tunĩ imeid bun ino fen, uyu takã ilen.

³⁴ Sain biya bure fele di, teneub marau wain biya fito fiya nigin in ferfer susur fe di, kabĩ lo difedig tamo garan dilen.

³⁵ “Kabĩ lo difedig tamo, teneub marau nẽ ferfer dirouneĩd fen, taka dun, taka dukesin, taka meein tulu difen.

³⁶ Age dife di, teneub marau ferfer tunĩ sur fedin, are idi musei uyulil sur fedin wal fiya. Age fe di, kabĩ lo difedig tamo uruwa age difen gen, baban yogon ferfer bun age difedin.

³⁷ Dum bagai, teneub marau yogon naal idi garan sur fiyen. Ĩ iron, ‘Idi neu kesu nigin fau karĩ difiyẽf.’

³⁸ “Anĩ ere, kabĩ lo difedig tamo, naal anĩ dile fen, idi abob dirokenen, ‘Eĩ inim wain kabĩ akorouf. Usig, ada ĩ taukeis fen, yogon akor talouf.’

³⁹ Age de fen, idi ĩ dale, wain kabĩ mayarẽ dira ken, dukesin.

⁴⁰ “Age fiya nigin, sain wain kabĩ nẽ marau isiyouf, ĩ kabĩ lo difedig tamo ere naig fediyouf?”

⁴¹ Idi Jesus aiten dalen, “Teneub marau, idi sane bagai sane ye fen, idenkesiyouf, ĩ wain kabĩ anĩ, kabĩ lo difedig tamo tunĩ imeid bun ino fen, na yaledi di, idi wain mayof sain bun fito de fen, yogon biya difenẽf.”

⁴² Jesus idi irokenẽdin, “Ã od Negur nẽ Itotoya bun yenek anĩ to uwesegen de?

“ ‘Meein are fõ inoya tamom sane de fen, ditoron anĩ,
gama monog tor wõ yen,

anĩ Odug yogo age fe di,
 malamã yun.’‡

⁴³ “Anĩ nigin, aya ã arokeneik, Negur nẽ tano ã bun tamal son yeĩ yale, tamo kayau idi aayũ faat biya yũf anidi ifenẽdiyof.

⁴⁴ Aib taka meein anĩ teten kubũ youf, mered fe fisik fouf, takag, aib taka meein anĩ ĩ teten kubũ youf, ĩ danĩf aas lauf.”§

⁴⁵ Sain pris odudug, Farisia tamo geid, Jesus nẽ yaab od karĩ den, idi kelein, Jesus idi nigin wogõ yen.

⁴⁶ Idi Jesus ironẽya nigin naab dimiren, anĩ ere, idi tamo kayau nigin kumĩ den, ere nigin, tamo kayau idi Jesus nigin profet taka dedig.

22

Tamo Kayau Yalouf Bun Tar Nẽ Yaab Od (Luk 14:15-24)

¹ Jesus yaab od nem baban irokeneĩd fen, iron:

² “Saa tano ĩ, king taka, ĩ naal kayau yalouf nigin tar dodok fen age fiya gen.

³ ĩ yogon ferfer sur fedid di, tamo iweignẽdin yogon tar bun disiyof nigin dirokenẽdin, anĩ ere, idi isiya ditoron.

⁴ “Ĩ baban ferfer tunĩ sur feid fen, iron, ‘Idi aya aweignẽdin anĩ urokenẽdig: Aya tar mogo saika afel. Aya bulmakau yaro biya biya ado adenen, erab erab ganan mogo dodok afelel. Bagu fiya tar bun usig.’

‡ **21:42:** Sam 118:22, 23 § **21:44:** Itotoya tunĩ bun, itotoya 44 to ibodok.

⁵ “Anĩ ere, idi to karĩ difiyēdin, idi diyalelen, taka yogon kabier ilen, taka ĩ yogon bisnis kabĩ yalen.

⁶ Tunĩ idi ferfer dirouneĩd fen, tadũ difiyeĩd didenkesin.

⁷ Anĩ nigin, king name odug sane fen, yogon kusĩ tamo sur fedid di, dilen, ferfer didenen anidi didenkeis fen, nedi taun yã dinon.

⁸ “Agef fen, king, ne ferfer irokenēdin, ‘Bagu fiya nē tar mogo dodok afelel, aya tamo aweigneĩd fen, naa afenēdin anidi, dogo sane age difen nigin, isiya kisi feleya sã.

⁹ Anĩ nigin, ã ulagauf, naab kaleyan aib aib uledigouf are, urokenēdig len, idi tar bun disiyouf.’

¹⁰ Age ye di, ferfer dilelen, naab naab diyo ken, tamo kayau dileid fen, biya ado sane ganan gou difedin, age dife di, tamo kayau ado bagu difedidig nē guru fiya modoũ bun tamo kayau isokosen.

¹¹ “Age dife di, king namen isin, tamo kayau fele fedin, an ĩ tamo taka kolos biya ifonũya sã fotou fen.

¹² King ĩ to fiyen, ‘Mou, naig fe di, õ bagu fiya nē naki sã anĩ guru fiya enĩ namen usil?’ Tamo ĩ od sã ibodon.

¹³ “Age fe di, king yogon kabĩ tamo irokenēdin, ‘Ima ye ado ufõg, mayarē gugum bun urãg, an are wifirig ye fen, gobora kikokõ yediyouf.’

¹⁴ “Anĩ nigin, tamo kayau musei iweignēdif, anĩ ere, teke tekelei igirnēdif.”

Sisa Bun Takis Inoya

(Mak 12:13-17; Luk 20:20-26)

15 Age fe di, Farisia tamo dilen, Jesus in od bun naig fe mog, talouf de fen, od katõ difen.

16 Age de fen, Farisia tamo, idi neid dõ fiya tar, Herod nē tamo tar geid, Jesus wagen sur difedi di, dilen, idi Jesus dirokenen, “Tise, amã keleĩ, õ momoi wogõya nē tamo, anĩ õ Negur nē naab momoi bagai ufelnēdidig, õ tamom to wewu diyõdig, ere nigin, õ idi yana ado be sã anĩ to es wedig.

17 Anĩ amã urokanamã, ogon kisi ere wof? Sisa* takis ifenēya nigin biya de, sã?”

18 Anĩ ere, Jesus idi neid namedin kisi sane kelei ken, iron, “Ã meleid yaleya tamo, ere nigin ã aya kisi wiyagef?

19 Takis ifenēya nigin koin moni ufelnag.” Idi koin moni taka wagen diroule di,

20 Jesus idi to fedin, “Eĩ ai nawa nē malakanon? Eĩ ai yana nē itotoya?”

21 Idi aiten dalen, “Sisa nē.”

Age de di, ã idi irokenēdin, “Ereb Sisa nē are Sisa wenēg, erab Negur nē are Negur wenēg.”

22 Od enĩ idi karĩ de fen, terē den. Age de fen, idi Jesus ditornē diya dilelen.

Kel Fãya Bun Ai Nē Kayau Ibodõf?

(Mak 12:18-27; Luk 20:27-40)

23 Naa de tekelei anĩ bun, Sadusia tamo idi dirõdig anĩ, laa bun tamal to ke de fã dedig, dedig anidim, Jesus wagen disi to difiyen.

24 Idi diron, “Tise, Moses iron, tamo taka kesu sã mog laa fef, in tura waab yale fen, tura fotokar kesu iroukenēf.

* 22:17: Rom neid king odug.

²⁵ Amã atun, tura tura sewen dibodon. Matu ï kayau yalen laa fen, ï kesu sã, anï nigin, ï, in kayau, ne tura itorkenen.

²⁶ Age fiya bagai, tura dõ fiya ïg age fen, anï dõ fiya tri ïg agef ile sewen adoken.

²⁷ Idikeleya bun, kayau ïg laa fen.

²⁸ Anï nigin, kel fãya bun, idi sewen anï atun, ï ai nẽ kayau bagai ibodõf? Ere nigin, idi ganan kayau anï dalen.”

²⁹ Jesus aitedin yale irokenẽdin, “Ã od kũ wenẽgef, ere nigin, ã Negur nẽ Itotoya ado Negur nẽ megeir keleï sã.

³⁰ Laa bun tamal kel fãya bun, an tamo kayau ado abob yalef ya sã, idi engel saa ilun difaref gen dibodõf.

³¹ Anï ere, laa bun tamal kel fãya nigin, Negur ã irokenein anï, ã to uwesegen de?

³² Negur iron, ‘Aya Abraham nẽ Negur, Isak nẽ Negur, Jakop nẽ Negur.’† ï laa neid Negur sã, ï mata ibodõya neid Negur.”

³³ Anï tamo kayau od enï karï de fen, ï agef ifelnẽdin anï nigin terẽ den.

Ïtãfiya Odug Bagai Ganan Wal Fiya

(Mak 12:28-34; Luk 10:25-28)

³⁴ Jesus ï Sadusia tamo od bun sigoreid ifokelen anï karï de fen, Farisia tamo idi guru difen.

³⁵ Idi atun, lo keleï tamo takam Jesus kisi fiye ken, eig fiyẽ to fiyen,

³⁶ “Tise, ïtãfiya nanï anï, ganan wal fiya odug bagai Lo bun irok?”

† **22:32:** Eksodas 3:6

37 Jesus irokenen, “ ‘Ō, Odug ogon Negur waũ adok, malākanon adok, kisi adok bunem, ĩ nigin waũ laaf.’ ‡

38 Ītāfiya enī ĩ matu, Lo bun ganan wal fiya odug bagai irok.

39 Anī dō fiya are eig fiya, ‘Ō ogo nigin waũ laa fef gen, nē tā nigineg ago waũ laaf.’ §

40 Lo ado Profet neid od ganan, ĩtāfiya uru enī teten difaref.”

Ai Nē Naal Anī Kristus?

(Mak 12:35-37; Luk 20:41-44)

41 Sain Farisia tamo idi guru difesi di, Jesus idi to fedin,

42 “Kristus nigin ā kisi ai gef? Ai nē naal anī Kristus?”

Idi aiten dalen, “Dawid naal.”

43 Jesus idi irokenēdin, “Dawid naig fe di, anī Awa Uurem irokenen, ĩ nigin ‘Odug’ yen?” Ī nigin Dawid iron,

44 “ ‘Negur neu Odug irokenen:

“Imau biya melem ubod mog,
ogon kiwai tar

on yē farume gō afalauf.” *

45 Dawid ĩ nigin ‘Odug’ yen ouf are, naig fe di, Kristus ĩ Dawid naal ouf?”

46 Taka nem, ĩ aiten yale solof irōya kisi feleya san, naa anī bunem ĩlen ganan, takam baban ĩ to fiyēya nigin kumī den.

‡ 22:37: Diuteronomi 6:5 § 22:39: Levitikas 19:18 * 22:44: Sam 110:1

23

Jesus Farisia Tamo Ado Lo Ifelnēdiya Tamo Ketē Fiyēdin

(Mak 12:38-40; Luk 11:39-52; 20:45-47)

¹ Dum Jesus, tamo kayau in dō fiya tar geid irokenēdin,

² “Lo ifelnēdiya tamo, Farisia tamo geid, Moses nē sia bun dibodōdig.

³ Anī nigin, ā idi karī wiyēdig fen, ereb idi ā ago gei de di, ā ago gouf. Anī ere, ereb idi age difef anī, ā to agog, ere nigin, idi dirōdig anī to dō de age difedig.

⁴ Idi morō odudug difofa ken, tamo kayau oroweid se difedig, anī ere, idi dogo bagai, morō enei dalesauf nigin imeid gege tekelei bagai gebeya nigin to orodidig.

⁵ “Idi ereb ereb ganan age difedig, are ege tamo meleid yaleya: Age de fen, idi tamo meleid yaleya nigin, lo itāfiya bokis naal odudug nuwa bun difeid fen, demeid bun ado imeid dā bun difofādig, idi neid kolos nē malū meluluk adodo dinodidig.

⁶ Idi, saaf odudug bun ado Juda neid uub fō bun, modoū malabag ibodōya anī orodidig.

⁷ Idi maket modoū bun, tamo kayau idim sere difiyeid fen, ‘O tise’ difediyouf anī orodidig.

⁸ “Anī ere, ā tise to diyēif, ere nigin, ā Tise tekelei dogol ado, ā adok tura tura.

⁹ Ā tenebur ein aib taka to dei gouf, ere nigin, ā Temeī tekelei dogol ado, ī saa ilun ibodok.

¹⁰ Ā mudur ado to diyēif, ere nigin, ā Mudur Ado tekelei dogol, are Kristus.

11 Æ atun, aib taka ganan wal fiya wõ you fenē, ã āgenei kabĩ tamo ibodõf.

12 Ere nigin, aib taka ã yogo yana yalesef, ã lai fesilauf, aib taka ã yogo nigin lai fesilauf, ã yana adouf.

13 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! Æ tamo kayau meleid bun saa tano nigin sukar unogedig. Æ aug namen to ulegedig, idi dilau fenē age difef, ã katĩ welegedig.*

15 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! Æ, tamo tekelei waleg fen, ã āgenei dõ fiya unenēgouf nigin, teneub bun uyokeleg fen, maaĩ naab bun uyõgefeg ago gedig, agog fen, tamo ã anĩ ufelnēge di, ã āgenei dõ fiya wõ yef are, ã ã hel nē gere tar ubodõgef wal yeĩya sane bagai wõ yef.

16 “Mala ifofakeleya uyu irouya, ã nigin meleĩlon ado! Æ urõgedig, ‘Aib taka tempel yana bunem in od isen ken, total od irok, are ege, anĩ ere, aib taka tempel nē gol bunem in od isen ken, total od irok, ã dõf age fouf.’

17 Æ neneya, meleĩ ifofakeleya! Ere anĩ odug, gol de, oo tempel gol fateul ifenēdig anĩ?

18 Takag ã urõgedig, ‘Aib taka alta yana nem in od isen ken, total od irok, are ege, anĩ ere, aib taka

* **23:13:** Itotoya tunĩ eig de ditoton: *welegedig.* ¹⁴ *Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! Æ waab neid fõ sosoin wedig kuwesig fen, tamo kayau meleid yaleya kosē meluk ago gedig. Anĩ nigin, ã darau odug bagai walogouf.*

sesewi fiya nẽ safina alta bun ifaref anĩ yana nem in od isen ken, total od irok, ã dõf age foug.’

19 Æ, mala ifofakeleya tamo! Ere anĩ odug, safina de, oo alta sesewi fiya fateul ifenẽdig anĩ?

20 Anĩ nigin, aib taka alta yana nem in od isen ken, total od irok, ã alta ado safina ganan alta teten ifaref anim in od isen ken, total od irok.

21 Taka ã tempel yana nem in od isen ken, total od irok, ã tempel ado, Negur tempel namen ibodok anim in od isen ken, total od irok.

22 Taka ã saa yana nem in od isen ken, total od irok, ã Negur nẽ king sia ado, Negur ã an ibodok anim in od isen ken, total od irok.

23 “Lo ifelnẽdiya tamo, Farisia tamo geid, ã meleid yaleya tamo, ã nigin meleĩlon ado! Æ kabier tamal sako nanaaleg farag fen, ten tekelei unogedig, anĩ ere, ã, lo nẽ odug, are safina wal fiya anidi nigin to kisi gedig, are lo nẽ madur fiya, wau ifenẽya, wau momoiya. Æ anĩ adok to tai gedig. Æ teten nẽ anĩ dõg fen, dum nẽ anĩg tai gem, are dem.

24 Æ, mala ifofakeleya uyu irouya! Æ soloulã tar bun ibodok anĩ ulul nem yaleleya nigin kous gedig, anĩ ere, ã kamel tar bun ibodok anĩ uto-bogedig.

25 “Lo ifelnẽdiya tamo, Farisia tamo geid, ã meleid yaleya tamo, ã nigin meleĩlon ado! Æ kap beĩ ado agara anĩ kulo gedig, anĩ ere, name bun amuyẽ isokos fen, taka nẽ safina yaleya nigin imeĩ su lai ge fen fe tetenem yaleya ado, akorou yeya aug naumeĩ nigin dogol yenek.

26 Farisia tamo, mala ifofakeleya! Kap beĩ ado name ket kulo wedig, ago ge di, teteneg fili youf.

27 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! Æ aau lalau nem matmat sigor naki fiya gen, teten lo fiya nigin biya bagai, namen anĩ are tamo gare den tuweid ado ereb ereb ganan amuyē isokosen.

28 Age fiya bagai, ãg teten tamo kayau meleid bun madur tamo gen ubodōgedig, anĩ ere, nameneĩ mala yaleya ado sane bagai isokosen.

29 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! Æ profet neid matmat unog fen, madur tamo neid matmat garab wiyēgedig.

30 Æ urōgedig, ‘Ada tubuda tar dibodon sain bun, ada tabodom are, ada idi geid to bagu tafem, profet naudeid to filu fadam.’

31 Anĩ nigin, ã aug nigin yaor gef, ere nigin, ã idi profet didenkesin anidi neid ibor tar.

32 Ægenei tubuĩ tar neid mosor tobol ge di, isokosef!

33 “Æ gogour bagai! Æ gogour sane gere tar! Æ naig ge fen, hel nē es fiyauf bun tamal uyagauf?

34 Age fiya nigin, aya, profet, keleĩ biya tamo, tise ado ã bun sur afediyouf. Idi tunĩ udenkesigouf, tunĩ aa tetek bun udenēdigouf, tunĩ ãgenei uub fō bun wagagã gouf, fonō fonō idi darau wenēdig fen, urudigouf.

35 Anĩ nigin, madur tamo Abel nē naud bun ile, Sekaraia Berekia naal, ĩ tempel alta ado atun ã ukesigen, in naud bun, madur tamo neid naudeid

ganan teneub enĩ iroun nigin, anĩ nẽ mala solo sane ã bun isiyouf.

³⁶ Aya ã momoi arokeneik, mala solo kafĩ fiya enĩ ganan, tamo kayau sain enei bun dibodok anidi bun isiyouf.

Jesus Jerusalem Nigin Wau Laa Fen
(Luk 13:34, 35)

³⁷ “O Jerusalem, Jerusalem, õ profet udenkeis fen, õ bun sur fedig anidi meein meein wedidig, sain musei aya õ wau afon ken, ogon gerẽ tar kuru afedig, tataro sina momou waye farumen kuru fedig gen, anĩ ere, ã utorõgedig.

³⁸ Ulogouf, ãgenei fõ fonou lef.

³⁹ Anĩ nigin, aya ã arokeneik, ã aya baban to uleyagauf ile, ã fau urõgouf, ‘Odug yana bunem isif, ã el fiya ado,’† sain anĩ bun, ã aya uleyagauf.”

24

Idikeleya Sain Nẽ Uris
(Mak 13:1-31; Luk 21:5-33)

¹ Jesus tempel bun tamal kutũ yeis, iyok ile mog, in dõ fiya tar Jesus wagen disin, tempel fõ tunĩ anĩ difelnen.

² Jesus to fedin, “Ã enĩ ganan ulegef de? Aya ã momoi arokeneik, meein enĩ taka, meein tura teten to yenẽf, anĩ adok fau isog irailauf.”

³ Jesus Moul Arein* ibod mog, in dõ fiya tar mugun wagen disin dirokenen, “Urokanamã, ere sain enĩ wõ youf? Ere uris bagai anĩ, on isiya nẽ ado idikeleya nẽ?”

† 23:39: Sam 118:26 * 24:3: ‘Oliv Arei’ dedig.

⁴ Jesus aitedin yalen, “Takam to idegneĩf nigin lo weleg.

⁵ Ere nigin, musei aya yanau nem disi dirõf, ‘Aya Kristus,’ age de fen, idi tamo kayau musei didegnẽdiyof.

⁶ ã kusĩ wõya karĩg fen, tamo sigoredim kusĩ nigin wogõ douf anĩ karĩ gouf, ã anĩ nigin to terẽ gei. Ereb ereb anĩ agef wõ youf, anĩ ere, idikeleya sain fau dum isiyof.

⁷ Teneub taka fã ye fen, ã teneub taka nigin kiwai ifenẽf, tano taka ã tano taka nigin kiwai ifenẽf. Naũ odug mimĩ ado, uyu taka taka bun wõ youf.

⁸ Enei ganan, kayau kesu ibodõf nigin darau gariya inof gen.

⁹ “Sain age foun bun, ã idi imeid bun ulagauf, darau odug laa bun dineneĩf, teneub ganan bun tamo kayau ã nigin to orodiyof, ere nigin, aya yanau ã ado nigin.

¹⁰ Sain anĩ bun, musei momoiya dudum difouf, idi dogo tutur abob kiwai difenẽf, idi abob to orodiyof.

¹¹ Agef mog, idegẽya profet musei wowã douf, idi tamo kayau musei didegnẽdiyof.

¹² Tobonunã sane anĩ fou yalauf nigin, tamo kayau musei wau laa fiya nigin folo rouf.

¹³ Anĩ ere, aib taka ã megeir ifar ile, idikeleya bun, Negur ã isennẽf.

¹⁴ Saa tano nẽ biya od enĩ wogõ difediyof anim, teneub ganan bun tamo kayau wedereid irou fen, uris gen ifenẽdiyof, anĩ gama idikeleya isiyof.

15 “Sain ã log mog, ninir fonou ineněf,† are profet Daniel sigor bun wogõ yen anĩ, Jerusalem fateul modoũ bun ifarauf are (ani uweseg keleĩ youf),

16 idi Judia teneub bun dibodok, arein diya diselauf.

17 Taka ĩ yogon fõ sokor ibodok, ĩ to kel isil, aaben ereb ereb gei foug.

18 Taka ĩ kabier ibodok, yogon gabar yaloug nigin to kel ilauf.

19 Naa anĩ bun, kayau bouweid ado, kayau kesu su ifenek ado, idi meleidlon adoug.

20 Feluk sain Sabat naa bun ado, ã to uyagoug nigin Negur kosẽ goug.

21 Sain anĩ bun, morõ odug biya isiyoug, morõ age fiya gariya bun teneub inon isi gama, taka to wõ yen, dum buneg taka to wõ youf.

22 Negurem naa anĩ to godo falaisim are, taka to mata ibodom, tamo kayau igirnẽdin idi nigin ye fen, naa anĩ godo falaisiyoug.

23 Sain anĩ bun, taka ã irokeneĩf, ‘Ulegef, Kristus yeir!’ oo ‘Ī your!’ ã anĩ to momoi ge.

24 Fau idegẽya Kristus, idegẽya profet ado wõ de fen, idi kisi falauf are, Negur igirnẽdin anidig didegnẽdiyoug nigin uris odug memelik ado difelnẽdiyoug.

25 Karĩg, aya tetunem ã arokenein.

26 “Anĩ nigin, takam ã irokeneĩf, ‘Kristus ĩ your, gerere tuan,’ ã to ulagoug, ‘Kristus ĩ yeir, aab namen,’ ã anĩ to momoi ge.

† 24:15: Daniel 9:27; 11:31; 12:11

²⁷ Gaa iseyanem kolimei fili ye di, ile, gaa ileyaneg iledig, age fiya bagai, Tamo Naal in isiyouf bun age fouf.

²⁸ Nain be ereb bouwa buru waaif nē an, tum guru difouf.

²⁹ “Morō sain anī bure fele di, kaisā bagai
 “ ‘gaa gugum kalauf,
 ogō to lalan youf,
 saa ilun tamal barisa kuku rediyouf,
 saa nē megeir guyoyō douf.’

³⁰ “Sain anī bun, Tamo Naal nē uris saa bun wō youf, teneub ganan bun tamo kayau waud gudū fouf. Idi Tamo Naal saa lalo bun, yogon fula fiya medeīya barikā megeir ado isi mog, dilouf.

³¹ Agef fen, ī yogon engel, taur ait odug ado susur fedi di, idi, yogon tamo kayau igirnēdin anidi, teneub akor ganan bun, saa akor ganan bun ado kuru difediyouf.

³² “Gama ā, aa fig bun keleī walogouf: Susu bonuf fen, aarau inodif, ā keleī, saneya melsak.

³³ Age fiya nigin, ā anī ganan ulogouf are, ā keleī, in isiya mogo melsā, bobogē bagai ifaref.

³⁴ Aya ā momoi arokeneik, tamo kayau sain enei nē idi to sa kel mog, enī ganan wowā youf.

³⁵ Saa teneub ado sa kalauf, anī ere, neu od to bagai sa kalauf.

*Naa Sain Ado Takam To Keleī
 (Mak 13:32-37; Luk 17:26-30, 34-36)*

³⁶ “Taka nem, anī nē naa sain ado to keleī, saa ilun engel idig sā, Naal īg sā, Dei yogo dogol keleī.

³⁷ Noa nē sain bun age fen age fiya bagai, Tamo Naal isiyouf bun age fouf.

³⁸ Kuwei odug nē naa fau mog, tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen.

³⁹ Idi ereb wō youf anī to keleī mog, kuwei isi, adok kuweir dilelen. Age fiya bagai, Tamo Naal ī isiyouf bun age fouf.

⁴⁰ Tamo uru idi kabier kabī dalef difarauf, tekelei yalouf, taka itornēf.

⁴¹ Kayau uru idi falawa falei dife mog, tekelei yalouf, taka itornēf.

⁴² “Age fiya nigin, meleī unog fen, log, ere nigin, ā keleī sā, naa nanī be bun āgenei Odug isiyouf.

⁴³ Ā keleī youf: Fō marau, bō ereb sain, bē tamo isiyouf keleī youf are, ī mata ibod ken, bē tamo in fō to narī fouf nigin ololo fouf.

⁴⁴ Age fiya nigin, āg saika gouf, ere nigin, Tamo Naal ī fau sain to isiyouf gouf bun isiyouf.

Ferfer Biya Ado Ferfer Sane

(Luk 12:42-46)

⁴⁵ “Ferfer taka aim anī dō fiya kisi biya ado de? Ī yogon odugem, ī yogon odug nē fō bun anidi neid saaf, dogo neid sain kilei dōf ifenēdiyof nigin ima bun inon anī.

⁴⁶ Sain tamo odug kelouf bun, ferfer biya bagai age fe di, ilouf, tamo odug ī nigin biya fiyēf.

⁴⁷ Aya ā momoi arokeneik, tamo odug ī, yogon safina ganan ferfer anī ima bun inouf.

⁴⁸ Anī ere, ferfer taka sane ī wau bun irōf, ‘Neu tamo odug ilen, sain meluk biya gerō ibodok, ī kukula to isiyouf.’

⁴⁹ Age ye fen, ã, in kabĩ tura tar idenēdiya gariya ino fen, gama ã yogo, saaf biya naan biya, aai sē fiya tamo geid dōdig.

⁵⁰ Ferfer anĩ nē tamo odug, in isiya nē naa, ferfer to isiyof ye fen, kisif mog, in isiya sain, ã keleĩ sã mog, isiyof.

⁵¹ Tamo odug, ferfer anĩ gudũf fisik fe fen, mala yaleya tamo geid nedi modoũ bun inenēf, an are wifirig ye fen, gobora kikokō yediyof.”

25

Kayau Taulei Ten Idi Bun Yaab Od

¹ Jesus tobol fe iron, “Sain anĩ bun, saa tano ã, kayau taulei ten, idi neid lam gei de diyok dilen, tamo mois tarabã difiyēf age fiya gen.

² Faif idi kisi neneya ado di, faif idi kisi biya ado.

³ Kisi neneya ado, idi neid lam gei difen, anĩ ere, keresin to dalen.

⁴ Anĩ ere, kisi biya ado, keresin kulumã ado lam dalen.

⁵ Tamo mois kaisã to isin, idi adok mulã fedo di, denenan.

⁶ “Bō atun ait taka iweig iron, ‘Ulegēf, tamo mois mogo yeir, ulolō wesig fen, fotou wiyēg!’

⁷ “Kayau taulei ganam fafã de fen, lam wik koriri difeselen.

⁸ Kisi neneyam, kisi biya ado dirokenēdin, ‘Āgenei keresin tunĩ wanamãg, amã nemã lam gare felediyof fenē.’

⁹ “Kisi biya adodom, kisi neneya dirokenēdin, ‘Eo, keresin eĩ, ã ado amã ado to kisi falauf. Amam ifeneĩya ban, uleg, oun keresin na nē dinodig bun, aug nigin na waleg.’

10 “Kisi neneya idi, keresin na nigin dile mog, tamo mois mogo isin. Kayau taulei idi ololo difiyen, weim bagu fiya nē tar bun, aaben dilelen. Age dife di, sukar kotū felen.

11 “Dum, kisi neneya idig disin, idi diron, ‘Tamo odug, tamo odug, amā nigin sukar kā wo!’

12 “Anī ere, tamo mois aitedin yalen, ‘Aya ā momoi arokeneik, aya ā keleī sā.’

13 “Age fiya nigin, ā lo weleg, ere nigin, naa kilok ado ā keleī sā.

*Kabī Tamo Moni Gadō Fedin Nē Yaab Od
(Luk 19:11-27)*

14 “Takag, saa tano ī, tamo taka ī, uyu takā gerō naab ilau fenē nigin, ī yogon ferfer iweigneīd fen, yogon safina kulatun de kenēf nigin, imeid bun inon age fiya gen.

15 Taka ī faif tausen kina ifenen, taka tu tausen kina ifenen, taka wan tausen kina ifenen, idi dogo mugu mugu neid safina kulatun fiya nē keleī kilei kilei ifeneīd fen, ī uyu takā gerō naab ilen.

16 Tamo faif tausen kina yalen, kaisā bagai ilen, moni kabī bun ino fen, baban faif tausen kina yalen.

17 Tamo tu tausen kina yalen, īg agef fen, baban tu tausen kina yalen.

18 Tamo wan tausen kina yalen, anī ere, ī ile, meku yale fen, tamo odug nē moni teneub kur inokelen.

19 “Sain meluk bure fele di, ferfer neid odug kel isi fen, moni ferfer mugu mugu ifenēdin anī, idi naig dife kabī difenen anī, faded de dirokenēf nigin ferfer ganān iweig laisin.

20 Tamo faif tausen kina yalen, ã baban faif tausen kina taka ado irou isi fen, ã iron, ‘Tamo odug, õ aya faif tausen kina wanan, ulef, aya baban faif tausen kina taka ado.’

21 “In tamo odug ã irokenen, ‘Õ de agon, õ ferfer biya dõ fiya biya bagai! Õ safina naal bun kulatun biya ubodon nigin, aya õ imã bun safina musei anouf. Usi fen, ogon tamo odug nẽ kulãya namen ubod!’

22 “Tamo tu tausen kina yalen, ãg isi fen, ã iron, ‘Tamo odug, õ aya tu tausen kina wanan, ulef, aya baban tu tausen kina taka ado.’

23 “In tamo odug ã irokenen, ‘Õ de agon, õ ferfer biya dõ fiya biya bagai! Õ safina naal bun kulatun biya ubodon nigin, aya õ imã bun safina musei anouf. Usi fen, ogon tamo odug nẽ kulãya namen ubod!’

24 “Age fe di, tamo wan tausen kina yalen, ã isi fen, iron, ‘Tamo odug, aya kelein, õ tamo total ado, onom to utenen anã kusu wodig, onom faat to uraran anã fito wodig.

25 Anã nigin, aya õ nigin kumã au fen, ele, ogon moni teneub kur anokelen. Ulef, ogon safina yeir.’

26 “In tamo odug ã irokenen, ‘Õ, ferfer sane fõ tamal! Õ kelein, ayam to atenen anã kusu afedig, ayam faat to araran anã fito afedig de?’

27 Õ kisi agom, neu moni benk bun uno di, benk im kabã yalekanam, ago wom, sain aya kelauf bun, moni kabã yalen anã nẽ mala ado, moni õ benk wenen anã bagu fiya kel isin ado alem. Anã õ to agon.’

28 “Age ye fen, ï ari fedin, ‘Wan tausen kina ï bun son ge fen, tamo ten tausen kina ado anĩ wenēg.

29 Taka ï ereb ado, aya toru afouf, age fe di, ï musei adouf. Taka ï sã bagai, ereb taka ï adog, ï bun tamal son fouf.

30 Ferfer sane anĩ mayarē gugum namen urāg, an are wifirig ye fen, gobora kikokō yediyouf.’

Sipsip Meme Ado

31 “Sain Tamo Naal, yogon fula fiya medeīya ado engel ganan geid disiyouf, ï in ibodōya modoũ fula fiya medeīya bun ibodōf.

32 Teneub ganan bun, tamo kayau ï wagen kuru difediyouf, age dife di, ï tamo kayau foi fediyouf, sipsip lo fiya tamo, sipsip meme ado foi fedig gen age fouf.

33 ï sipsip ima biyalē inoid fen, meme ima kilē inodiyouf.

34 “Agef fen, King ï, idi ima biyalē anidi iro-kenēdiyouf, ‘Neu Deim el yeik ā, usig, āgenei akoreĩ waleg, gariya bun teneub inon bunem isi gama, tano āgenei nigin saika fen anĩ.

35 Ere nigin, aya naũ fiya mog, ā yōya nē safina wanagen, aya naan ail fiya mog, ā naan yōya nigin wanagen, aya yaũ tamo abod mog, ā aabē urou uleyagen.

36 Aya gemũ abod mog, ā gabar uflaīnagen, aya dagi abod mog, ā kulatun wiyagen, aya kalabus bun abod mog, ā usig ki wiyagen.’

37 “Age ye di, madur tamo kayau aiten dalen, ‘Odug, ere sain õ naũ ubod mog, amã saaf mafonon, õ naan ail yō mog, naan mafonon?

³⁸ Ere sain õ yaũ tamo mailiyo ken, amã nemã fõ bun maleyon, õ gemũ ubod mog, gabar mafi-laĩnon?

³⁹ Ere sain õ dagi ubod mog, amã õ mailiyon, õ kalabus bun ubod mog, amã ki mayon?’

⁴⁰ “King aitedin yale irõf, ‘Aya ã momoi aro-keneik, ã neu turau tar yeneid sã enidi taka el wiyēgen, are aya el wiyagen.’

⁴¹ “Age ye fen, ã ima kilẽ anidig irokenēdiyof, ‘Gelu yein ã, wageun uyag uleg, yã mala fitotoleya failmud, Satan in engel geid idi nigin dodok fen anĩ, an uleg.

⁴² Ere nigin, aya naũ abod mog, ã ereb taka to wanagen, aya naan ail fiya mog, ã naan to wanagen.

⁴³ Aya yaũ tamo abod mog, ã aabẽ to urou uleyagen, aya gemũ abod mog, ã gabar to ufi-laĩnagen, aya dagi abodon, kalabus bun abod mog, ã to kulatun wiyagen.’

⁴⁴ “Idig aiten dale dirõf, ‘Odug, ere sain õ naũ ubodon, naan sã ubodon, yaũ tamo ubodon, gabar sã ubodon, dagi ubodon, kalabus bun ubodon, amã õ to masennon?’

⁴⁵ “King aitedin yale irõf, ‘Aya ã momoi aro-keneik, ã neu idi yeneid sã enidi taka to el wiyēgen, are aya to el wiyagen.’

⁴⁶ “Age ye di, idi darau failmud ibodkeleya nẽ bun dilauf, madur tamo kayau idi mata failmud ibodkeleya nẽ bun dilauf.”

*Jesus Yukesiya Nigin Naab Dimiren
(Mak 14:1, 2; Luk 22:1, 2; Jon 11:45-53)*

¹ Jesus od enī ganan wogō ye bure fel fen, ã in dō fiya tar irokenēdin,

² “Ã kelei, naa uru bure fele di, Pasa naa isiyouf, age fe di, Tamo Naal idi imeid bun dino di, aa tetek bun dukesiyouf.”

³ Dum pris odudug, tamo kayau neid mudur adodo, pris mudur ado in yana Kaiafas in fō bun guru difen.

⁴ An idi Jesus idegēya naab bun dale fen, dukesiyouf nigin katō difen.

⁵ Idi diron, “Sifa inoya bun to age tafouf, age tafouf, tamo kayau idi seye de fen, kusī dalesauf.”

*Betani An Kayau Taka Jesus Mudur Bun Moul Fi Felen
(Mak 14:3-9; Jon 12:1-8)*

⁶ Jesus, Betani fonō an, Simon lepra dagi kulu adon in fō bun ibod mog,

⁷ kayau taka, Jesus wagen moul sumeĩ biya bagai moni odug nem anĩ, moul ifeya nē gulub* ado irou isin anĩ, Jesus tebol bun saaf yoko ibod mog, ã mudur bun moul fi felen.

⁸ Anĩ in dō fiya tar dile mã, idi nameid sane fen, diron, “Ere nigin enĩ sekil fef?”

⁹ Moul enei na odug nem sur fiyam are, moni anĩ yale maleg tamo ifenēdiyam.”

¹⁰ Anĩ Jesus kelei ken, idi irokenēdin, “Ã, ere nigin kayau enĩ wau morō wenēgef? Kayau enĩ aya bun biya bagai age fel.

* **26:7:** Meein alabasta nem dinon.

¹¹ Maleg idi ã geid faimud ubodõgouf, anĩ ere, aya ã geid faimud to tabodõf.

¹² Sain kayau moul enĩ, neu bouwau bun fi felel are, mekur ainēf nigin dodok fiyal.

¹³ Aya ã momoi arokeneik, tenebur ein nain be biya od enĩ wogõ douf, ereb kayau anĩ age fen anĩg wogõ douf. Age dife di, idi ĩ nigin dum dum wogõ de fen, karĩ dalauf.”

Judas Jesus Kiwai Tamo Imeid Bun Inoya Nigin Yo Yen

(Mak 14:10, 11; Luk 22:3-6)

¹⁴ Agef fen, dõ fiya tar tuwelf idi atun taka, yana Judas Iskariot tamal, pris odudug wagedin ile fen,

¹⁵ to fedin, “Sain aya ĩ imeĩ bun ano di, ere anĩ ã aya wanagauf nigin kisi gef?” Age ye di, idi teti silwa koin moni anĩ diweskene ken, difenen.

¹⁶ De anenem, Judas ĩ Jesus kiwai tamo imeid bun inoya nigin naab imirek ilen.

Odug Nē Bõ Saaf

(Mak 14:12-26; Luk 22:7-23; Jon 13:21-30; 1 Korin 11:23-25)

¹⁷ Bret yis sã sifa inoya naa matu anĩ bun, in dõ fiya tar Jesus wagen disi to difiyen, “Õ amã nain anĩ Pasa saaf wãf nigin, amã dodok mafe konõf anĩ oroyok?”

¹⁸ Jesus iron, “Taun uleg, tamo taka wagen wõg fen, urokenēg, ‘Tise irok: Aya neu naa mogo melsã. Aya, neu dõ fiya tar geid, ogon fõ bun Pasa saaf male fen, sigigi mafouf.’ ”

¹⁹ Anĩ nigin, in dõ fiya tar, Jesus iron anĩ dõ de fen, Pasa saaf nigin dodok difen.

²⁰ Aragau di, Jesus, in tuwelf geid, tebol bun saaf doko dibodon.

²¹ Idi saaf dokon, Jesus iron, “Aya ã momoi arokeneik, ã atun takam, aya kiwai tamo imeid bun ineyauf.”

²² Idi waud gudũf fen, mugu mugu wogõ fiyēya nigin gariya dinon, “Odug, momoi bagai, aya sã?”

²³ Jesus aitedin yale iron, “Taka ã, amã uruwom imamã takai beĩ bun nu mafesil, im aya kiwai tamo imeid bun ineyauf.

²⁴ Tamo Naal, ã nigin Negur nē Itotoya irok kilei, agef bagai ilauf. Anĩ ere, tamo ã Tamo Naal kiwai tamo imeid bun inof, ã malalon ado! ã sina to gõ fem, are dem.”

²⁵ Age ye di, Judas, tamo ã Jesus kiwai tamo imeid bun inouf, iron, “Momoi bagai, aya sã, Rabi†?”

Jesus aiten yale iron, “Are õ ogo urok.”

²⁶ Idi saaf dokon, Jesus bret yale, Negur de fiye ken, bret anĩ mumãf, in dõ fiya tar ifeneĩd fen, iron, “Bret enei waleg fen, wõg, eĩ neu bouwau.”

²⁷ Agef fen, ã kap yale, Negur de fiye ken, kap anĩ ifeneĩd fen, iron, “Ã ganan, enĩ bun wõg.

²⁸ Eĩ neu naudou bar itenēya nigin, are tamo kayau musei mosor yalel kenēdiyof nigin fi felef.

²⁹ Aya ã arokeneik, aya baban wain enĩ to ãf, gaman ile, aya ã geid, neu Dei nē tano bun, wain mata tãf anĩ bun.”

³⁰ Anĩ bure fele di, idi seg taka dalel fen, idi Moul Arei bun diselen.

† **26:25:** Rabi, anĩ nē gariya, Juda neid tise.

*Pitam Jesus Wa Fiyēf Nigin Jesus Iron
(Mak 14:27-31; Luk 22:31-34; Jon 13:36-38)*

³¹ Jesus idi irokenēdin, “Bō enī bun, ā ganan aya utornagauf, ere nigin, are Negur nē Itotoya irok kilei:

“ ‘Aya sipsip marau aukesi di, sipsip ganan firagagaũ difouf.’ ‡

³² Anī ere, aya, laa bun tamal kel fā au fen, aya ket Galili uyu alauf.”

³³ Pita, Jesus aiten yale iron, “Idi ganan ō ditornōfeg, aya are to bagai atornōf.”

³⁴ Jesus Pita irokenen, “Aya ō momoi arokonok, bō enī bun tataro kokorok yeya sã mog, ō aya nigin wa towo wouf.”

³⁵ Anī ere, Pita Jesus irokenen, “Momoi ada uruwom gare tau mogoufeg, aya ō nigin to bagai wa afouf.” Age ye di, dō fiya tar ganan, od tekelei anī diron.

*Getsemane Oun
(Mak 14:32-42; Luk 22:39-46)*

³⁶ Age de fen, Jesus in dō fiya tar geid, modoũ taka yana Getsemane dilen. An, ī idi irokenēdin, “Aya oun ele, kosē au mog, ein ubodōgouf.”

³⁷ Jesus, Pita Sebedi gere tar uru gei feid fen, dile mǎ, ī wau gudūf fen, moro kalaisin.

³⁸ Age fe di, ī idi irokenēdin, “Neu malaukanon tobega le fen, wau morō gudū falaisi, laa nē daũ bun ifaref. Ein ufareg fen, ā aya geid lo tafalauf.”

³⁹ Naal godof iroule fen, kubū ye, nawa tenebur kumokur fe fen, kosē yen, “Neu Dei, kisi falauf

‡ **26:31:** Sekaraia 13:7

are, darau nē kap enī walel kanauf. Anī ere, neu oroya to dō wouf, on oroya anī dogol dō wo.”

⁴⁰ Age fel fen, Jesus in dō fiya tar gedin kel isin, mulā den mog, iledin, ī Pita to fiyen, “Tamo ā, aya geid aua tekelei lo fiya nigin to kisi feleya de?”

⁴¹ Ā, lo weleg fen, kosē gouf, are ā kisi yeīya bun to kubū gouf nigin. Uur are orof, anī ere, bouwa anī malegef.”

⁴² Ī, anī dō fiya, baban kel ile, kosē yen, “Neu Dei, kap enī bun aya to āf are, ō kap enī yaleleya nigin kisi feleya sā, age fouf, ō ogon oroya dō wouf.”

⁴³ Ī kel isin, baban denena mog iledin, ere nigin, idi meleid morō gudū fesin.

⁴⁴ Agef fen, ī idi itorneīd fen, baban kel ilen, kosē yen anim towo, od tekelei iron anī baban kosē yen.

⁴⁵ Agef fen, ī in dō fiya tar gedin kel ile, idi irokenēdin, “Ā fau si unog fen, yenēyai gef? Ulegef, sain mogo melsā, Tamo Naal mogo mosor tamo imeid bun ilef.

⁴⁶ Fafāg fen, teleg! Kiwai imeid bun inoya tamo yeir isif!”

Jesus Dirounen

(Mak 14:43-50; Luk 22:47-53; Jon 18:3-12)

⁴⁷ Jesus fau wogō ye mog, in dō fiya tar tuwelf idi anī atun taka, Judas isin. Tamo musei dimig adodo seburer adodo ī geid disin. Pris odudug, tamo kayau neid mudur adodo idim sur difedi di, disin.

⁴⁸ Gama Judas, Jesus kiwai tamon inoya tamo ï, Jesus yaor fiyēf nigin idi uris ifenēdin: “Tamo aya umã fiya bunem aan afiyēf anï, ï waleg.”

⁴⁹ Judas, kaisã bagai, Jesus wagen ile iron, “O Rabi, fel!” Age ye fen, ï umã fiyen.

⁵⁰ Jesus ï irokenen, “Mou, er eb wofon usif, are ago.”

Age ye mog, tamo Jesus wagen dile dirounen.

⁵¹ Age dife di, tamo Jesus weim difaren anidi takam, ima iran, dimig ul feis yalen, pris mudur ado nē ferfer weder salōf iran.

⁵² Jesus ï irokenen, “Ogon dimig in modoũ bun uno, ere nigin, idi ganan dimig ul difeis dalef, dimig bun gare douf.

⁵³ Æ kisi gef are, aya, neu Dei isennauf nigin aweignē di, ï kaisã bagai, engel musei biya, sewenti-tu tausen wal fiya imau bun inoya kisi feleya sã de?

⁵⁴ Age afouf are, Negur nē Itotoya anï nigin iron enï ganan, naig fe kisi fel, agef wō youf?”

⁵⁵ Sain anï bun, Jesus tamo musei irokenēdin, “Æ bē tamo walegedig gen, aya ã dimig adodo seburer adodo waleyagau fenē usigef de? Naa ganan, aya tempel fofomala bun abod ken, od afelnēdidig, anï ere, ã aya to urouyagen.

⁵⁶ Anï ere, profet neid itotoya kisi falauf nigin, enï ganan wō yen.” Age ye di, in dō fiya tar ganan ditornē diyalelen.

*Jesus Juda Kaunsel Neid Kot Mala Bun Ifaren
(Mak 14:53-65; Luk 22:54, 55, 63-71; Jon 18:13,
14, 19-24)*

⁵⁷ Idi Jesus dalen, pris mudur ado Kaiafas garan dirou dilen, an lo ifelnēdiya tamo, tamo kayau neid mudur adodo geid guru difen.

⁵⁸ Anī ere, Pita, Jesus dume naal soso fiye ken, dōf tokō fel ile, pris mudur ado nē fofomalan wō yen. Ī namen ile fen, kabī tamo geid dibod ken, naig be difiyēf nigin lo fen.

⁵⁹ Pris odudug, Juda neid kaunsel ganan geid, Jesus laa bun dinenēf nigin, bou bun idegēya od dinou fenē dimiren.

⁶⁰ Musei wagen disi fen, disenneīd fen, idegēya od diraran, anī ere, Jesus laa bun dinenēf nigin od gariya taka to dilen.

Dum tamo uru wō den,

⁶¹ anidim diron, “Tamo enim iron, ‘Aya Negur nē tempel narī afel fen, naa towo bun baban anouf, are kisi feleya.’ ”

⁶² Age de di, pris mudur ado fā ye, ifar fen, Jesus irokenen, “Ō to solo urōf de? Eī ere od anī, tamo enidi ō nigin dirousif?”

⁶³ Anī ere, Jesus mutū ifaren.

Pris mudur ado Jesus irokenen, “Ō mata ibodōya Negur mala bun urōf nigin, od arokonok. Ō momoi Kristus, Negur Naal be anī, amā urokanamāf.”

⁶⁴ Jesus aiten yalen, “Ao, ō ogo yer urok. Anī ere, aya ā ganan arokeneik: Dum bun, Tamo Naal Negur megeir ado ima biyalem ibod ken, saa lalo bun isi mog, ā ulogouf.”

⁶⁵ Jesus age ye di, pris mudur ado karī ye fen, in kolos serek fe fen, iron, “Ī Negur kono fel! Ere nigin ada od megeir fiya nigin tamo baban

tamirēf? Ulegef, ã gama Negur kono fel anī karī gel.

⁶⁶ Anī ã ere kisi gef?”

Idi aiten dalen, “Ī laa bun ilauf.”

⁶⁷ Age de fen, idi, Jesus nawa bun disisne ken, imedim dun. Tunim wala fã de fen,

⁶⁸ diron, “Kristus, kurō weis urokanamã, aim ò inok?”

Pita Jesus Nigin Wa Fen

(*Mak 14:66-72; Luk 22:56-62; Jon 18:15-18, 25-27*)

⁶⁹ Pita, pris mudur ado nē fō fofomalan ibod mog, kabī kayau momoul taka wagen isi iron, “Ōg Jesus Galili tamal weim uyōgen.”

⁷⁰ Anī ere, ganan meleid bun ĩ waf fen, iron, “Ō od urok enī, aya keleī sã.”

⁷¹ Age ye fen, ĩ iyok ilen, bobog bun, an kayau momoul takam ile fen, tamo kayau an difaren idi irokenēdin, “Tamo enī, Jesus Nasaret tamal ĩ geiden.”

⁷² Ī baban waf fen, total od iron, “Tamo are aya keleī sã!”

⁷³ Sain naal ile di, idi an difaren Pita garan dile fen, diron, “Momoi bagai, ò idi neid taka, on od wogōya bun ogo yaor yok.”

⁷⁴ Age de di, ĩ mogo yogo bouwa geluf fen, total od irokenēdin, “Tamo are aya keleī sã!”

Age ye mog, kaisã bagai tataro kokorok yen.

⁷⁵ Age fe di, Pita Jesus wogō yen anī nigin weder fokō yen, “Sain tataro kokorok yeya sã mog, ò aya nigin wa wo towo wouf.” Anī nigin, ĩ weder fokō ye di, ĩ mayarē ile fen, inã odug yalen.

27

Judas Ī Yogo Kosim Bun Ula Iseginen
(Mak 15:1; Luk 23:1, 2; Jon 18:28-32; Aposel
1:18, 19)

¹ Bonimei bagai, pris odudug, tamo kayau neid mudur adodo geid, Jesus yukesiya nigin od difon.

² Idi ĩ difõ dale diroule, gawaman nẽ mudur Pailat ima bun dinon.

³ Anĩ Judas, Jesus kiwai ifenen, ĩ lof mog, Jesus dukesiyouf nigin ĩ bou bun od dun anĩ ile fen, ĩ kisif wau yu ken, teti silwa koin moni kel iroule, pris odudug, tamo kayau neid mudur adodo geid ifenẽdin.

⁴ Judas iron, “Aya mosor anon, ere nigin, ĩ mosor sã mog, ayam kiwai anon.”

Age ye di, idi aiten dalen, “Amã ere mayõf? Are ogon sakir.”

⁵ Judas moni irou ile, tempel namen irara ken, ilen. Anĩ ĩ iya ile, yogo kosim bun ula iseginen.

⁶ Pris odudug moni gei de fen, diron, “Lo to wal tafouf nigin, moni enĩ tempel nẽ kolekta bokis bun to ufeg, ere nigin, moni enĩ naud mala.”

⁷ Katõ fiya bure difel fen, moni anim, mis inoya tamo nẽ teneub anĩ na dale fen, yaũ tamo mumã difediyouf nigin, idi kisi difon.

⁸ Anĩ bunem, gamag teneub anĩ yana, Naud nẽ Mayã dedig.

⁹ Are profet Jeremaia nẽ od, eig ye wogõ yen anĩ kisi felen: “Idi teti silwa koin moni dalen, moni anĩ Israel tamo kayau ĩ nigin digiren.

¹⁰ Idi moni anim, mis inoya tamo nẽ teneub na dalen, Odug aya agef irokanan kilei.”*

Jesus Pailat Mala Bun Ifaren

(Mak 15:2-15; Luk 23:3-5, 13-25; Jon 18:33-19:16)

¹¹ Jesus, Rom gawaman nẽ mudur Pailat, mala bun ifare di, gawaman nẽ mudur Pailat ã to fiyen, “Õ Juda neid king de?”

Jesus iron, “Are de yer, õ urok anĩ.”

¹² Sain pris odudug, tamo kayau neid mudur adodo geid, Jesus bou bun od dun, ã aitedin to yalen.

¹³ Pailat Jesus to fiyen, “Õ boũ bun od dirarak to karĩ wof de?”

¹⁴ Anĩ ere, Jesus aiten to yalen, ã bou yũya od tekelei bagai nigin taka to solof iron. Age fe di, gawaman nẽ mudur, odug biya terẽ yen.

¹⁵ Gama gawaman mudur nẽ tobonunã, Pasa sifa naa bun, tamo kayau, tamo taka kalabus bun digirĩ di, yalisnẽdig.

¹⁶ Sain anĩ bun, idi kalabus tamo taka, yana sane bagai adon, ã yana Barabas.

¹⁷ Bonimeï, tamo kayau, Pailat nẽ fõ bun guru difesi di, Pailat to fedin, “Nanĩ ã aliskeneĩf anĩ oroyeik, Barabas de oo Jesus ã Kristus dedig anĩ?”

¹⁸ Ere nigin, ã yogo kelein, tamo kayau neid mudur adodo idi, kiyẽ bunem, Jesus ã ima bun dinon.

¹⁹ Pailat od es fiya modoũ bun ibod mog, in aiwa od sur fen, “Tamo anĩ ã mosor sã, ã nigin ereb taka

* **27:10:** Sekaraia 11:12, 13; Jeremaia 19:1-13; 32:6-9

to ago wouf, ere nigin, aya, nor bõ, ï nigin ami ken, morõ odug ï nigin ailel.”

²⁰ Anĩ ere, pris odudug, mudur adodo geid, tamo kayau od irõya nigin wedereid diroun, are idi Barabas yalisnëya nigin ado, Jesus dukesiyouf nigin nonĩ douf nigin age difen.

²¹ Gawaman nẽ mudurem to fedin, “Aya ã aliskeneĩf nigin, uru enidi ã nanĩ oroyeik?”

Idi aiten dalen, “Barabas anĩ.”

²² Pailat to fedin, “Age fiyauf are, aya, Jesus, Kristus dedig nigin, ere naig afouf?”

Idi ganan diron, “Aa tetek bun ùf!”

²³ Pailat to fedin, “Ere nigin? Ere mosor ï age fen?”

Anĩ ere, idi total bagai diweig diron, “Aa tetek bun ùf!”

²⁴ Pailat ï anĩ ile fen, ï od irõya nigin naab taka sã, anĩ tamo kayau idi total bagai dino fen, kusĩ dou fenẽ age dife di, ï naan yale fen, tamo kayau meleid bun ima kulof fen, ï iron, “Tamo enĩ naud aya bun sã, are ãgenei sakir!”

²⁵ Tamo kayau ganan aiten dale diron, “Yogon naud utor len, amã bun ado nemã kesu tar bun yenẽf!”

²⁶ Age de di, ï Barabas yalis ifenẽdin. Agef fen, ï irõ di, Jesus wagĩ de fen, ï aa tetek bun dũf nigin, kusĩ tamo imeid bun inon.

Kusĩ Tamo Jesus Diselinen

(Mak 15:16-20; Jon 19:2, 3)

²⁷ Gawaman mudur nẽ kusĩ tamo, Jesus dale gawaman mudur nẽ fõ namen dile fen, an mayã taka, kusĩ tamo ganan gou difalaisi salili difiyen.

²⁸ Idi Jesus nē kolos dinukeis fen, kolos meluk giriya anī difounnen.

²⁹ Age dife fen, idi malū duri ado dale, teter tanak kori de fen, ī mudur bun kurū difen. Idi werī tibog dale, ima biyalē dino fen, wagen bobou de fen, diselinen. Idi diron, “O Juda neid king gai gai ibodōf!”

³⁰ Idi ī disisne ken, idi baban werī tibog ima bun tamal dale, mudur bun baba baban dun.

³¹ Idi diseline kel fen, kolos meluk giriya anī dinukeis, yogon kolos bagai anī baban difounnen. Age de fen, kusī tamom idi, ī aa tetek bun dūf nigin dirou diselen.

Jesus Aa Tetek Bun Dun

(Mak 15:21-32; Luk 23:26-43; Jon 19:17-27)

³² Sain idi mayā anī ditor diyok dile fen, idi Sairini tamal tamo taka fotou difen, yana Simon. Idi ī, Jesus nē aa tetek faali foug nigin nugo difiyen.

³³ Idi disel, modoū yana Golgota (anī nē gariya, Mudur Tuwa nē Modoū) wō den.

³⁴ Kusī tamo idi, an wain makik ado falei difen anī, Jesus yāf nigin difenen. Anī ere, ī yō ile fen, yōya nigin itoron.

³⁵ Sain idi ī aa tetek bun du kel fen, idi aisaī dira kodē de fen, yogon kolos morou morou gadō difen.†

³⁶ Age de fen, idi an dibod ken, lo difiye kelen.

† **27:35:** Itotoya tunī dum ditoton: *gadō difen, are od profet wogō yen anī kisi falauf nigin: “Idi neu gabar idi atun gadō de fen, neu kolos nigin aisaī dira ken, kodē den.”* (Sam 22:18)

³⁷ Ī bou bun od dinon anī, idi yogon mudur ilun ditoton: EĪ JESUS, JUDA NEID KING.

³⁸ Age de fen, kusī tamo idi, bē tamo urug, ĩ geid aa tetek bun didenen, taka yogon ima biyalē, taka yogon ima kilē.

³⁹ Tamo kayau dile disi dife, Jesus kono difiye ken, kasā difiyē, mudureid dira ken,

⁴⁰ idi diron, “Ō onom tempel narī wol fen, baban naa towo bun anouf won, ō ogo nigin usennēf! Ō Negur Naal wouf are, aa tetek bun tamal kutū weis!”

⁴¹ Age difiyen gen, pris odudug, lo ifelnēdiya tamo, tamo kayau neid mudur adodo, idi Jesus diselinen.

⁴² Idi diron, “Tunī anī isennēdin, anī ere, ĩ yogo nigin isennēya kisi feleya sã! Ī Israel nē king! Utorñeg len, gama aa tetek bun tamal kutū yesiyouf. Age fe di, ada ĩ nigin momoi tauf.

⁴³ Ī Negur nigin momoi yedig. Ī irōdig, ‘Aya Negur Naal,’ anī nigin, Negur ĩ nigin orouf are, utornēg len, gama Negurem ĩ isennēf.”

⁴⁴ Age difiyen gen, bē tamo Jesus geid, aa tetek bun didenen idig, ĩ nigin kono fiya od in bou bun diran.

Jesus Laa Fen

(Mak 15:33-41; Luk 23:44-49; Jon 19:28-30)

⁴⁵ Tuwelf kilok gaa ado nē ile, tri kilok aragaun, gugum isin, teneub ganen kerub fen.

⁴⁶ Tri kilok age fiya mog, Jesus wade bagai iweig iron, “Eloi, Eloi, lama sabaktani?” –anī nē gariya, “Neu Negur, neu Negur, ere nigin ō aya utornal?”‡

‡ 27:46: Sam 22:1

⁴⁷ Tunĩ an difaren, anĩ karĩ de fen, diron, “Ī Eliya iweignek.”

⁴⁸ Kaisā bagai, idi atun takam gudu re ile, sponsŖ yalen, wain kai ado bun nu feis fen, tibog bun ino fen, Jesus yāf nigin ifenen.

⁴⁹ Tunĩ ganan diron, “Gama utornēg, Eliya isi isennē mog, tailauf.”

⁵⁰ Jesus baban ait odug nem iweig di, in uur ul fe yale di, laa fen.

⁵¹ Sain anĩ bun, gabar meluk odug tempel namen modoũ fateul bun ibodon anĩ, serek fe uru fen, ilunenem irosuil teneburen. Teneub yoũf fen, meein fara fedin.

⁵² Matmat bobog kā fedid di, tamo kayau fateul musei gare den idi, baban mata fafā den.

⁵³ Idi matmat bunem fafā den anidi, Jesus kel fā ye di, Jerusalem fateul taun dile fen, tamo kayau musei meleid bun wowā den.

⁵⁴ Kusĩ tamo tunĩ, idi neid orowa geid, Jesus tari difiyen, teneub yoũ fe di, ereb ereb ganan wowā ye di, dile fen, fatuk bagai terē de fen, diron, “Momoi bagai, ĩ Negur Naal!”

⁵⁵ Kayau musei an difaren, idi so del fen, lo difen. Idi Galili anenem Jesus aruna yaleya nigin dō difen anidi.

⁵⁶ Idi atun Maria Magdala tamal, Maria Jems Joses ado neid sineid, taka Sebedi gere tar neid sineid.

Jesus Mũ Difen

(Mak 15:42-47; Luk 23:50-56; Jon 19:38-42)

Ŗ **27:48:** Maaĩwō tamal safina taka, ku nanaal musei ado naan dũ fedig.

⁵⁷ Aragau mog, safina ado tamo, Arimatea tamal, yana Josef isin, ĩ Jesus nē dō fiya tar anī nē taka.

⁵⁸ ĩ Pailat wagen ile, Jesus nē bouwa buru nigin to fiyē di, Pailat yo ye fen, Jesus nē bouwa buru ĩ ifenēya nigin, kusī tamo irokenēdin.

⁵⁹ Josef bouwa buru yale gabar lalau amuyē sã anim sile fen.

⁶⁰ Agef fen, ĩ yogon matmat mata sa bun ku yalen ani bun, Jesus nē bouwa buru inenen. ĩ meein odug wele fe di, isi, matmat awa ku katī fel fen, ilen.

⁶¹ Maria Magdala tamal, Maria taka ado, matmat wagen dibodon.

Kusī Tamo Matmat Lo Difen

⁶² Naa taka, Sabat naa nē dodok fiya naa anī bure fele di, pris odudug, Farisia tamo geid, Pailat wagen dilen.

⁶³ Idi diron, “Tamo Odug, amã karī maulef, idegēya tamo ĩ matan iyo ken, iron, ‘Naa towo bure fele di, aya laa bun tamal, baban mata kel fã auf.’

⁶⁴ Age fiya nigin, õ urõ len, naa towo bun matmat total bagai tari difouf. Age fiya sãf, in dō fiya tar disi, bouwa buru bē dale mã, tamo kayau didegneĩd fen, ĩ laa bun tamal kel fã yel douf. Idegēya dum isiyouf anī gai sane bagai, uruwa nē wal fiyauf.”

⁶⁵ Pailat iron, “Lo fiya tamo tekelei waleg. Uleg fen, ã, taka nem matmat bun ileyā nigin, total bagai katī feleyā nigin, ã keleĩ anī kilei bagai, matmat agog total bagai lo gouf.”

⁶⁶ Anĩ nigin, idi dile, matmat bun meein teten wõ dũ dino fen, lo fiya tamo anĩ dinenen.

28

Jesus Laa Bun Tamal Mata Kel Fã Yen (Mak 16:1-10; Luk 24:1-12; Jon 20:1-10)

¹ Sabat naa bure fele di, uub nē naa matu bun bonimei mumurei ado, Maria Magdala tamal, Maria taka ado matmat dilou fenē dilen.

² Sain anĩ bun kaisã bagai, mimĩ total ado wõ yen, ere nigin, Odug nē engel saa ilun tamal isin, matmat bun ilen, meein welef yerin ile di, teten ibodon.

³ Agef fen, in lo fiya kolimei filiya gen, in kolos lalau medeīya saa lalo lalau gen.

⁴ Matmat lo difen tamo, idi ĩ nigin kumĩ de, tererē de fen, laa tamo gen denenan.

⁵ Engel kayau irokenēdin, “To kumĩ wog, ere nigin, aya keleĩ, ã Jesus aa tetek bun dun anĩ umirnēgef.

⁶ ĩ ein sã, ĩ iron kilei, mogo laa bun tamal mata kel fã yel. Usig fen, ĩ yenen modoũ uleg.

⁷ Agog fen, kaisã bagai uleg, in dõ fiya tar urokenēdig: ‘ĩ laa bun tamal kel fã ye fen, ĩ ketem Galili ilef. An ã ĩ ulogouf.’ Aya mogo ã arokeneim.”

⁸ Age ye di, kayau idi, kaisã bagai matmat ditor dilen, kumĩ den, anĩ ere, waud kulīya ado, Jesus nē dõ fiya tar dirokenēdiyoyou fenē nigin gududu den.

⁹ Age de mog, Jesus tarabã feid fen, iron, “Fel.” Idi ĩ wagen disin, in ye dirou fen, seli dabin.

¹⁰ Age dife di, Jesus idi irokenēdin, “Ã, to kumĩ wog, uleg fen, neu turau tar idi, Galili dilauf nigin urokenēdig; idi an aya dileyauf.”

Matmat Lo Fiya Tamo Neid Od

¹¹ Kayau naab luwe dile mog, matmat lo difen tamo tunĩ, taun namen dile, pris odudug bun, ereb ereb ganan wõ yen anĩ nigin od dinon.

¹² Pris odudug, mudur adodo geid, guru de, kisi katõ de fen, idi kusĩ tamo moni odug difenēdin.

¹³ Idi, matmat lo difen tamo dirokenēdin, “Ã urõgouf, ‘Jesus nē dõ fiya tar bõ disi fen, mainana kel mog, in bouwa buru bē dalen’ gouf.

¹⁴ Od enĩ gawaman nē mudur bun ilauf are, amã faded mafiyē di, ã morõ to walogouf.”

¹⁵ Anĩ nigin, kusĩ tamo moni dalen, idi diron kilei age difen. Od enĩ, Juda tamo kayau bun iyokelen, gamag agef yenek.

*Jesus In Dõ Fiya Tar Soosi Kabĩ Odug Ifenēdin
(Mak 16:14-18; Luk 24:36-49; Jon 20:19-23;
Aposel 1:6-8)*

¹⁶ Age fe di, in dõ fiya tar ilewen Galili dilen, arei Jesus irokenēdin nē an dilen.

¹⁷ Sain idi Jesus dilen, idi seli dabinen, anĩ ere, tunĩ waud urun.

¹⁸ Age dife di, Jesus wagedin isin irokenēdin, “Megeir adok, saa ilun nē ado tenebur nē anĩ ganan, Negurem aya ifanan.

¹⁹ Anĩ nigin, ã, teneub ganan bun, tamo kayau ganan bun uleg fen, neu dõ fiya tar unenādigouf, Dei yana nem, Naal yana bunem, Awa Uur Fateul yana bunem, idi naan ugunēdigouf.

²⁰ Agog fen, od aya ã arokenein anĩ ganan dõ difouf nigin ufelnẽdigouf. Momoi bagai, aya ã geid sain faimud tabodok, ile, sain idikalauf bun.”

Mata Ifeněya Ně Od
The New Testament in the Marik Language of Papua
New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files dated 31 Aug 2023

d7099f9d-3bdf-5620-8eb3-7e6c51cab7ea